

إيمان إسماعيل الشاذلي
إيمارا حمدي

المرأة بين الجسد والروح

رواية

الطبعة
الثانية



إيمان إسماعيل الشاذلي
المرأة بين الجسد والروح
رواية

الطبعة
الثانية

رقم الإيداع
2018 / 22206

ISBN
978-977-798-102-6

هاتف / واتسآب

+2 01091985809 +2 02/ 37390893

www.lotusforpub.com

lotusforpub@gmail.com



يناير 2019

كل ما ورد بهذا الكتاب مسئولية مؤلفه من حيث التراء والأفكار والمعتقدات،
وكونه أصيلاً له غير منقول؛ وأية خلافات قانونية بهذا الشأن لا تتحملها دار
النشر، وجميع الحقوق محفوظة للمؤلف ولا يجوز إعادة نشر الكتاب أو جزء
منه بأية طريقة دون موافقته أو موافقة دار النشر.

جميع الحقوق محفوظة للمؤلف



هَدَاءٌ

إلي من علمني الحياة، إلي صديقي وحيي الأول، أبي..
حبيبي وصيقي كم أشتقت لحضنك وحنانك
وصوتك، مرت سنوات علي غيابك ولكنك هنا
داخلي.. حبيبي.. أتمني لو استطيع الهرب لحضنك
لترحل عني أحزاني وهمومي، وحشتني يا طيب أب..
وحشتني يا سي حمدي..

المقدمة

النهارة عيد ميلادي ٦٥، الكل يبجهز لحفلة عيد ميلادي وأنا عامل نفسي مش واخذ بالي، شاغل نفسي بالشغل في المكتب وده قبل ما يدخل عليه حفيدي أحمد ومعاه باقي أطفال العائلة، طالع مجنون زي جدته، قالي أنه عايز يعرف يعني أيه حب، ومن غير ما أفكر أو أتردد للحظة نطقت «لولا».. فضحكوا كلهم والشقي أحمد قال وهو غضبان: - مين لولا دي، بعد كل اللي جدته بتعمله عشانك، تطلع بتحب واحدة غيرها.

فضحككت وفتحت درج المكتب وخرجت منه دفتر لونه أزرق كنت بسجل فيه يومياتي وفتحته علي نفس تاريخ النهارة لكن من ٣٥ سنة، لما قبلتها، المجنونة العنيدة اللي غيرت حياتي وعلمتني معني الحب، لولا..

تلك العيون كيف اخترقت قلبي.. كيف لا أشتاق..

يا فرحة أنارت منارة نفسي

بعد ما كانت مأوى للحزن

ونوراً يضيء البحر من حولي

وما حولي من أحزانٍ ودمعي

النهادة ١٤ مارس عام ٢٠١٦..

فتحت عيني وأخذت نفس عميق لبداية يوم جديد كانت الساعة ستة الصبح زي العادة، ولأول مرة من سنين خطفت النجوم والكواكب المرسومة في السقف عيوني وسرحت فيها ولون السماء وجمالها، أصل كان نفسي أكون رائد فضاء مجرد حلم انتهى بقرار من جدي بدخولي كلية التجارة الخارجية وده طبعاً عشان أقدر أساعده في الشركة، شركة البنداري جروب، ورثها عن والده وجده وكبرها والدور وصل لعندي، ولأني للأسف أول حفيد للعائلة وصدقوني ده كان غصب عني وبدون موفقتي قرر والدي الابن الأصغر شاكر عبد الرحمن أنه يتجوز والدي مديحة فهمي بنت عمه قبل تخرجهم من الجامعة وبعد تسع شهور شرفت أنا، الموضوع مش حلو بالعكس لأنه مطلوب مني أني أكون نسخة من جدي، كنت بتعامل علي أني شخص كبير عاقل مش من حقه يلعب ويجري ويتنطط لكن مسموح له يلعب الشطرنج وألعاب الذكاء وقراءة الكتب، وفي مرحلة المراهقة لقيت نفسي مكمل دور الكبير العاقل وبدأت أتحول لنسخة من جدي، حتى قلبي بقي عجوز ميعرفش يعني أيه حب، وبعد تخرجي من الكلية بستتين بقيت المدير العام لشركة البنداري وده بعد مرض جدي، ولأنه كان بيعتبرني خليفته كان بيמרني علي الشغل

من وأنا عندي ١٦ سنة، فكنت بشتغل في الشركة وبدرس ، مجرد التفكير في حياتي بحس بحزن، لان النهاردة عيد ميلادي الثلاثين ولسه عايش مع عائلتي ووحيد، عايش في فيلا كبيرة وغرفتي كانت في الدور الأرضي جنب غرفة جدي عبد الرحمن البنداري، كانت غرفة كبيرة جواسجن كبير... أنا أحمد.. الحفيد الأكبر لعائلة البنداري...

نسيت أعرفكم علي عائلتي، هي عائلة قديمة جداً ومحافضة جداً وفي نفس الوقت مجردة من المشاعر لدرجة تخوف فالتفكير ممنوع، والحب ممنوع، وكل اللي مطلوب منك تنفذ الأوامر وبس، بناكل كلنا في مواعيد محددة، وطبعاً بنشتغل كلنا إما في شركة البنداري أو في مستشفى البنداري الخاص، ومش من حقك تخرج عن المخطط اللي تم وضعه وبعناية من قبل جدي، ومش من حقك تتجوز من برا العائلة ولو حصل ووقفوا هتعيش في النهاية جواسوار منزل البنداري، وده السبب أني فضلت وحيد طول السنين اللي فاتت ليه أتجوز ويتحكم علي ولادي بالسجن المؤبد في بيت البنداري، واقع مؤلم أتفرض عليه وأنا استسلمت له...

غمضت عيني وخرجت من السرير، دخلت الحمام وفتحت الدش وفضلت مغمض عيني ومستمتع عشر دقائق وبعدين خرجت وفتحت الدولاب واخترت بدلة المشكلة أن كلهم يشبهوا بعض ولبستها، وبعد ما خلصت أخذت الموبايل وشنطة اللاب والأوراق وقبل ما أخرج اتبتهت لشكلي في

المرأة، السنين مرت بسرعة من غير ما أحس، ومفيش جديد مجرد أيام بتتكرر، عايش ومش عايش والمفروض أني أكمل حياتي بنفس الشكل لأخر عمري...

أخذت نفس عميق وخرجت واتجهت للسفرة، بوست ايد جدي وبصوت هادي صبحت عليه وقعدت في المكان المخصص ليه بعد جدي:

- صباح الخير يا جدي.

رد وهو مبتسم:

- صباح الخير يا حبيبي، تخيل حسين راح علي الشركة من ربع ساعة، وقال أن في أجتاع مهم النهاردة.

حسين ده يبقى ابن عمي زاهر وطبعاً بيشتغل في الشركة لكن مطلع عيني:

- فعلاً في أجتاع للأقسام النهاردة الساعة 10.

- واضح أن حسين بدأ يهتم بالشغل ويركز فيه.

- فعلاً، هو بدأ يشتغل، بس كمان بيحشر نفسه في اللي ميعرفوش.

ضحك جدي وكمل أكل، وبعد مرور دقائق بدأت العائلة تظهر واحد وراء واحد وكل اللي يقعد يصبح علينا ويبدأ يأكل، وبرغم عددنا الكبير كنت ترمي الأبرة ترن من كثر الهدوء، مفيش حد بيتكلم ولا حتى بيهمس، فطرت وأتحركت وقبل ما أوصل للباب وقفني صوتها، ماما، اللي دائماً غضبانه مني وده لأنني بشبه جدي جداً..

- أكيد فإكر أن النهاردة حفلة عيد ميلادك، وكفاية اللي حصل السنة اللي فاتت، لما جيت متأخر بعد الناس كلها ما جت، وكنت مكشر طول الوقت، كأنك قاعد في جنازة مش في عيد ميلادك، يريت تبقي تيجي بدري وأبقي أضحكك شويا.

ابتسمت ورديت عليها بكل هدوء:

- حاضر يا ماما، وهبقي أضحك.

مشيت وعقلي محتار، كل سنة بيعملوا حفلة لعيد ميلادي، ليه مش عارف؟! المشكلة أني مش بحب الحفلات لكن ماما بتحب الحفلات، تحس أنها مستعدة تحضر حفلة كل يوم من غير ما تزهدق، بجد حالة ميئوس منها، بس ده مش ذنبي، فتح السواق راضي باب العربية وركبت ومن غير ما يسأل هنروح فين أتحرك في اتجاه الشركة، شركة البنداري... الطريق كان زحمة والأفكار فضلت تدور في دماغي عن الحفلة وأصدقاء العائلة وبناتهم واللي بيحصل كل سنة والكلام عن الجواز والخناقات بيني وبين ماما عن مروة بنت عمي ماهر وأن المفروض أني أتجوزها، وفجأة وقفنا ولقيت نفسي في الشركة قدام المبني الإداري، نزلت ودخلت المبني وبسرعة موظف الأمن فتح الأسانسير وطلعت به للدور السادس الموجود به مكتبي ووصلت للمكتب وبرغم فخامته إلا أنه كئيب.. ملك سكرتيري اللي استمرت معايا لأربع سنين

أ تجاوزت من المهندس رجب وطبعاً طلب منها أنها تسبب الشغل وتتفرغ لبيتها وعنده حق، صعب أنها توفق بين طلباتي في الشغل وبيتها وخصوصاً السفر والمقابلات مع العملاء برا، ولحد ما القى سكرتيرة، موجود برا كارثة بكل معني الكلمة اسمها سوزان، ومضطر أني أتحملها لحد ما القى سكرتيرة تنقذني منها..

بدأت أتصفح الملفات والأوراق الموجودة علي المكتب وبدون أي إنذار، صوتها اللي يشبه إنذار بدء يرن:
- مستر أحمد، المهندس حازم عايز يقابل حضرتك.
- طيب، دخليه.

دخل حازم وهو متوتر وزى ما يكون في مشكلة كبيرة، وبصوت مهزوز قال:

- صباح الخير يا مستر أحمد، أنا، كنت عايز..
رميت الملف اللي في أيدي، وبصيت له بحدة:
- أدخل في الموضوع يا حازم.

بلع ريقه وبصوت مهزوز قال:

- أنا عايز أوضح ل حضرتك، أن العطل اللي حصل للآلة الجديدة، أنا مليش دعوة بيه المهندس شادي هو المسئول عنه مش أنا، لما الآلة وصلت المصنع رفض أني أساعد في تركيبها من شهرين، وقال أنه هو المسئول عنها، والأستاذ حسين أكد كلامه، ولما أتعطلت دلوقت، بيقول أن أنا المسئول، وصدقني يا فندم أنا...

قطعت كلامه لأنه عصبي يعني أيه الآلة الجديدة أتعطلت:
- أتعطلت، الآلة الجديدة أتعطلت، أنت أكيد بتهزر، ده استهتار، أتفضل روح صلحها، وبعد كده نتكلم عن مين السبب، أنت لسه وقف بتعمل أيه.
- حاضر يا فندم، عن أذن حضرتك.

خرج حازم جري، وسبني مخنوق وغضبان بسبب تصرفات حسين، أمتي هيبطل يحشر نفسه في شغلي؟! المفروض أنه مسئول عن شئون العمال في المصنع مش الآلات، وفجأة صوت العاصفة فصلني:

- مستر أحمد، مستر ماجد بيقول ل حضرتك أنهم جاهزين، ومنتظرين حضرتك في غرفة الاجتماعات.
- طيب، بلغيه أي هكون موجود معاه بعد خمس دقائق.

كان لازم أفصل وأفكر بس في الاجتماع، دخلت غرفة الاجتماع وطبعاً الكل موجود ومن ضمنهم الباشا حسين، المشكلة الأكبر أن الكل كان مستعد للشغل إلا أنا كنت عايز أختفي، يمكن لأني زهقت من الشغل والشركة والمصنع والمشاكل اللي مش بتخلص، الملل بقي زي الهواء اللي بتنفسه، زي الدم اللي بيجري في عروقي...

بدأ ماجد الاجتماع وأتكلم عن عرض شركة الفتح اللي متقدم لنا، وبعدين بدأ حسين في الكلام عن العمال ورغبته في تعيين رئيس جديد للعمال، وفضلوا يتكلموا واحد وراء الثاني، ملف وراء ملف وبعد مرور أربع ساعات انتهى

الاجتماع، أربع ساعات من المناقشات المملة في العقود
وتجديد الأقسام، وأخيراً رجعت مكتبي وطلبت من الكارثة
تدخل:

- سوزان، تروحي حالاً لماجد وتستلمي منه الملف اللي فيه
قرارات الاجتماع تكتبيه وتبعته علي الإيميل وتصوري الملف
خمس نسخ وتحفظيه عندك لحد ما أطلبه منك، فهمتي.
- حاضر يا فندم، أي أوامر ثانية.
- لا، روحي شوفي شغلك.

خرجت ورجعت أنا لشغلي والملفات اللي علي المكتب
والإيميلات وعروض الشركات والقرارات اللي مش
بتخلص، وبعد مرور ساعة افتكرت موضوع الآلة فطلبت
من الكارثة تكلم حازم تسألوا عمل أيه، وبعد عشر دقائق
ردت عليه بأنه انتهى من تصلحها لكن لسه هيجربها عشان
يتأكد وبعدين هيبعلغي، الساعة بقيت خامسة أخيراً خلصت
الشغل اللي قدامي وفاضل أني أطمئن علي الآلة وفعلاً دخلت
الكارثة عليه:

- مستر أحمد، المهندس حازم بيبليغ حضرتك أن الآلة
اشتغلت.

- تمام، أتصلي براضي واطلبي منه يجهز العربية.

بدأت ترتبك وتقطع في الكلام:

- راضي، حضرتك، في مشكلة، راضي..

نفسي مرة واحدة أطلب منها حاجه وتنفذهما بسرعة من غير ما تعصبي وتحسني بغبائها:

- مشكلة، مشكلة أيه، أنطقي.

كانت مرتبكة جداً وخائفة:

- المشكلة، أن راضي السواق مش موجود، أخوه أتصل وقال أن والده تعب ونقلوه المستشفى، هو خرج من ثلاث ساعات وقال أنه مش هيتأخر، وحضرتك في العادة لما بيكون في اجتماع بتتحرك من هنا الساعة ٦، تحب حضرتك أتصل بيه.

فعلاً غبية، عصبتني من غير سبب، عنده عزره:

- ولا كلمة زيادة، أطلبني من الأمن يخرجوا العربية من الجراج، أنا هأسوقها بنفسني.

ابتسمت ابتسامه هبل:

- حاضر يا فندم، حالاً.

وبعد خمس دقائق أتحركت من المكتب، وقبل ما أدخل الأسانسير لمحت شادي، طبعاً عايز يتكلم معايا عن الآلة ويبرر موقفه، لكن أنا مش فاضي لكلامه الفارغ فهمته بحركة من أيدي أنه بعدين نتكلم، ومع وصولي للعربية أخذ الأمن مني الشنطة ودخلها العربية وأخذت منه المفتاح وركبتها وبدأت أتحرك لخارج أسوار الشركة...

أنا فعلاً خرجت من الشركة جسم بس عقلي كان مشغول بالمشاكل والقرارات اللي لازم أخذها بخصوص حسين

وشادي، وفجأة حسيت بألم في صدري، الألم اللي معذبني، حتى الدواء اللي وصفه الدكتور مروان مبقاش يأتريزي الأول، وافتكرت أول مرة حسيت فيها بالألم ده، كنت في آخر سنة في الجامعة وبسبب ضغوط الدراسة والشغل تعبت، واكتشفت أني بعاني من مشكلة في القلب هي مش كبيرة لكن ممكن تكبر، لكني قررت أني أحفظ بالسرده ل نفسي، كان صعب أعرفهم بمرضي، خرجت الدواء من الشنطة وقبل ما أخذه، خرج من الشارع الجانبي موتوسيكل حاولت أوقف العربية لكن صدمته، أنا غبي كان المفروض أركن العربية وأدور براحتي، أيه العمل دلوقت...

نزلت بسرعة، لقيت الموتوسيكل مقلوب علي الأرض واللي كان ركبته وقع جنبه والدم مغطي ذراعه الشمال، الشارع كان فاضي خالص، وفجأة بدأ يتحرك، الحمد لله أنه لسه عايش، قربت منه ومديت ايدي ومسكته من ذراعه وساعدته يقف، وخلع الخوذة، وأنا أتسمرت مكاني، مش مصدق، معقول اللي شايفه ده فقدت الإحساس بالوقت والمكان، ده أنا حتى نسيت الألم، كان شعرها قصير ومموج زي موج البحر لكن يجنن ولا عيونها نظرة منهم وقفت الكلام اللي كنت عايز أقوله، بالرغم من أنها كانت متعصبه والغضب والشرار ييطق من عنيتها لكن عندها حق، مين أنا؟! عشان أجرحها وأتسبب في ألمها، فضلت هائم في جمالها من غير ما أغمض عيني، لحد ما أجمل شفايف بدأت تتحرك وأخيراً سمعت صوتها:

- غبي، عجبك اللي عملته، مش عارف تسوق، بتسوق ليه..

كنت سعيد وأنا بسمع صوتها برغم أنها كانت بتغلط فيه
وسرحت في عنيتها:

- أنت، أنت يا بني آدم، فوق وسيب ايدي، أنت يا غبي.
أنا فعلاً أبقي غبي لو سبتها، لكن مضطر، سيبتها وحاولت
أشرح لها أن اللي حصل كان غضب عني بس الكلام كان
بيهرب مني:

- أنا أسف، أنا كنت بسوق وبعدين، الحادثة، أنا بجد
أسف جداً، أنا..

قطعت كلامي بصوت كله غضب:

- خلاص كفاية، أنت شكلك مجنون ومش بتعرف تسوق
أصلاً، أعمل أيه دلوقت هو أنا ناقصة مشاكل.

- أنا غبي ومعترف بده، بس المهم دلوقت ايدك، الجرح
الي فيها لازم يتعالج، ولحسن الحظ أن في مستشفى قريبة من
هنا.

- مستشفى، لا، لا، مش هروح مستشفيات، ممكن بقي تغور
وتسييني.

وبدأت توقف الموتوسيكل لكن كان بيقلت منها بسبب وجع
ذراعها، أما أنا فكنت واقف براقبها، والمفروض أني بتكلم
مع نفسي بس الواضح أن صوتي كان عالي شويًا:

- عنيدة لكن تجنن..

وفجأة عنيتها بقيت في عينه وكلها غضب، حسيت أنها عايزة تقتلني، فحاولت أني أخرج نفسي من الموقف:

- أنا كنت أقصد، أنك بتألمي وأنت محتاجه حد يوصلك للبيت علي الأقل، وفي نفس الوقت أنتي رافضة أني أساعدك، وأنا السبب في الحادثة، أرجوكي توافقي أني أوصلك لحد البيت، وأنا مستعد لأي تعويض تطليه، ممكن.

وبعد لحظات من السكوت ردت:

- أوك، هركب معاك، بس بشرط.

- موافق، المهم أني أوصلك، لأنني حاسس أني..

قطعت كلامي:

- بس كفاية، شرطي أنك تسوق من غير كلام كثير، فهمت.

- فهمت، أنا أسف.

وبسرة فتحت لها باب العربية واستنتها لما ركبت وقفلت البابا وليت أجزاء الموتوسيكل وحطتهم في شنطة العربية اللي متقفلتش طبعاً، وبدأنا نتحرك، وهي بدأت توصف لي الطريق، وبدون أي إنذار الألم رجع ثاني، لكن المرة دي فرملت ووقفت علي جنب فكانت رأسها هتتخبط لأنها مكتتش لبسه حزام الأمان، أنا خفت أني أعمل حادثة ثانية، لكنها غضبت:

- أنت متأكد أنك عاقل، وأنت بتعرف تسوق، كفاية كده

أنا هنزل هنا، أنت شكلك عايز تموتني، مجنون وغبي، أنا غلطانه أني ركبت معاك.

فتحت الباب وقبل ما تخرج، كنت مسكت الدواء في أيدي
وبصوت كله ألم:

- ممكن تستني، أنا وقفت عشان أخذ الدواء، لأني خفت
أدور عليه وأنا بسوق زي المرة اللي فاتت، أخبط حد ثاني
وأعمل حادثة جديدة.

قفلت الباب وهي مرتبكة، وابتسمت وهي بتقول:

- الدواء، وأنا اللي فكرتك مجنون، أسفة.

أخذت الدواء وغمضت عيني لثواني لحد ما الألم بدأ يهدأ،
وقولت:

- الموضوع، أن الدكتور قال أنه لازم أخذ الدواء لما..

قطعت كلامي بقسوة، بس كانت بتتألم:

- كفاية كلام، أنت مش أخذت الدواء، ممكن بقي نتحرك،
ذراعي بيوجعني.

سكت لكن كنت مستغرب من نفسي، ومش فاهم ليه كنت
بحاول أشرح لها مرضي، أزاي وأنا خافي ده عن عائلتي، هي
مش أجمل واحدة قبلتها لكن فيها حاجه غريبة شدتني،
يمكن عنيتها، بس كل اللي متأكد منه أنها حركت جوايا
شخص ثاني، شخص كنت فاكر أنه مش موجود، صحيت
جوايا أحساس غريب وجميل، وبكل هدوء سألتها عن
الاتجاه:

- شمال ولا يمين..

- شمال في أول يمين.

- تمام شمال في أول يمين، علي فكرة أنا أحمد، نتحرك فين ثاني.

- لا كده كفاية، أركن هنا، خلاص أحنأ وصلنا.

وقفت ونزلت بسرعة وفتحت لها الباب، خرجت وهي مبتسمة، كانت بتبتسم لشخص كبير واقف عند بوابة البيت اللي طلبت نقف عنده، وأول لما شافها جري علينا:

- لولا، في أيه؟! مالك، أيه اللي حصل؟!!

- بابا، أهدي، الموضوع بسيط.

بابا، أكيد طبعاً، وهو ممكن يكون غير كده، قلبي كان بيدق بسرعة كبيرة من اللي ممكن يحصل لما يعرف أي أنا السبب في اللي حصل لبنته، ممكن يقتلني وعنده حق، لكن ده حصل غصب عني وجهت كلامي ليه وأنا مش عارف هيعمل فيه أيه لما يعرف:

- ذراعها بينزف، أنا طلبت منها نروح المستشفى، لكنها رفضت.

ردت بصوت هادئ وهي مبتسمة:

- الجرح بسيط، وبعدين ينفع أروح مستشفى، وحببي دكتور. ابتسم لها وقال:

- بسيط لكن لازم يتعالج.. وبعدين أيه اللي حصل.. الجرح ده سببه أيه؟!!

كنت متردد لكن لازم يعرف:

- حادثة، أنا آسف جداً لأن أنا اللي..

قطعت كلامي بسرعة وقالت:

- للأسف حادثة، لكن بسيطة، سواق غبي خبطني، وأنا طلبت منه أنه يمشي.

ابتسمت فكلامها معناه أنها ساححتني، وكان أنقذتني من موقف صعب:

- فعلاً سواق غبي، بس أكيد هو ندمان علي الي حصل، أنا للأسف، مضطر أني أمشي.

- تمشي، تروح فين، مش ممكن طبعاً، لازم الأول تدخل وترتاح شويًا، بابا دخله معاك.

دخلت هي الأول وأحنا وراها وبسرعة قعدت علي الكرسي، البيت كان بسيطاً جداً لكن مريح لدرجة كبيرة وقفت علي جنب وفضلت أتأمل ملامحها، جميلة حتى وهي بتتألم لكن من جويا كنت حاسس بالذنب في الي حصلها وفجأة صوته نبهني:

- أدهم، أدهم، شنطة الإسعافات بسرعة، أختك جرحت نفسها.

دقائق وظهر أدهم ومعاه شنطة الإسعافات وهو يقول:

- قولي ضربتي مين، حرام عليك.

ردت بصوت غاضب:

- شكلك عايز تضرب أنت كمان.

فضحك أدهم ضحكة عالية:

- مفترية، اتقي ربنا..

وقبل ما يكمل كلام، لمحني وأنا براقب باباها وهو بيعالج جرحها:

- ومين ده بقى؟!!

قالت وهي بتضحك:

- ده أحمد، الشخص اللي أنقذ حياتي من السواق الغشيم اللي خبطني، مش بس كده فضل معايا ووصلني لحد هنا، آيه، مش هتشكروا منقذ حياتي.

كلامها فرحني لكن في نفس الوقت كنت مندهش من تصرفها، لكن حسيت براحه وخصوصاً بتصرف والدها وكلامه معايا:

- أنا متشكر لك يا ابني، الحمد لله أنك كنت موجود وساعدتها..

وبعدين بدا عليه الاستغراب وقال :

- لولا، هو أنتي إيه اللي رجعت بدري أصلاً من الشغل؟! ملامحها أتغيرت وبقيت ملامح طفلة بريئة، ابتسمت وهي بتقول:

- هيكون آيه السبب يعني، طردت نفسي من الشغل طبعاً. وبصوت كله غضب:

- مش ممكن، أنتي هتموتيني، ده رابع شغل تطردي نفسك منه، أنتي الأحسن تقعد في البيت، كفاية شغل لحد كده. ضحكت من غير قصد وقولت:

- هي مجنونة وعنيدة، بس، أنا متأكد أنها ممكن تشتغل في أماكن كثير.

ضحك أدهم ضحكة عالية ومستفزة، وحط أيده علي كتفي وقال:

- عندك حق، هي فعلاً مجنونة وعنيدة، لكن صدقني صعب جداً تشتغل، لأنها كمان متهورة وعصبيه.

ظهرت ملامح الغضب عليها أما أنا فضحكت وخطرت لي فكرة تخليني أشوفها كل يوم وبسرعة قولتها:

- أنا فعلاً لحظت الموضوع ده لكن أنا ممكن أساعدها، الشركة عندي محتاجه سكرتيرة، شركة البنداري جروب، ممكن تقبليني هناك بكر الساعة تسعة في مكتب المدير العام، ويكون معاكي السيرة الذاتية وملفك بالكامل، وهتستلمي الشغل في نفس اليوم.

نظراتها كان فيها تهكم:

- المدير العام مرة واحدة، أنت متأكد ولا.

- طبعاً متأكد..

وفجأة افتكرت الحفلة وماما والمشاكل اللي ممكن تحصل بسبب التأخير:

- أنا فعلاً مضطر أني أمشي، بكر في شركة البنداري، مكتب المدير العام هستناكي هناك الساعة تسعة، متأخريش.

- أوك، مش هتأخر، نتقابل الساعة تسعة في مكتب المدير العام. خرجت جري، لكن خرجت بجسمي أما عقلي وقلبي كانوا معاها، أزاى قدرت تأسرني بالشكل ده، مش عارف، مش قادر استني لبكر عشان أشوفها ثاني.

هي كمان فضلت تفكر فيه، من غير ما تسألوني أزاى عرفت؟! قالت لي أنها فضلت تفكر فيه وتسال نفسها إذا كنت حقيقة ولا مجرد خيال، وأزاى ظهرت فجأة وبرغم قسوتها معايا كانت حاسه بحاجه غريبة جواها بتشدها ليه، وكلامي عن الوظيفة كان حقيقة ولا هزار، وأنها فضلت الليل كله تفكر فيه ونامت مع طلوع الفجر..

أما أنا فأخيراً وصلت للبيت وبسرعة دخلت أبدل البدلة، كنت تعبان جداً ومرهق لدرجة كبيرة، قعدت علي طرف السرير وغمضت عيني ارتاح شوي، لقيتها قدامي وشعرها بيطير، وعيونها، آه من ضحكتها لسه بترن حوليه، المتهورة العنيدة، أما في الحفلة فكانت الناس بتسأل عني والكل كانوا في انتظاري أكيد ما هو عيد ميلادي ومن الطبيعي أني أحضره..

الحفلة كانت صاحبة والكل منتظرنى، أما أنا فمن غير قصد نمت وهربت لدنيا الأحلام وهي معايا، أما ماما فكانت غضبانه وبتسأل عن سبب تأخيري:

- أحمد فين لحد دلوقت؟! حد يروح يستعجله.

رد عليها رءوف أخويا الأصغر مني بـ 6 سنين:

- ماما، أهدي أحمد وصل وبيغير، أكيد هيخرج دلوقت.

أما أسر أخويا الأصغر من رءوف، واللي لسه هيتخرج من كلية الهندسة السنة دي، كان بيضحك وهويقول:

- أنا هروح أستعجله.

وفعلاً بدأ أسر يخبط علي الباب لكن أنا كنت في دنيا ثانية، ولم زهق فتح الباب لقاني نائم علي طرف السرير، وفجأة حسيت بايد بتلمسني ولما فتحت عيني لقيته بيساعدني أنام وغطاني وقفل النور والباب ومشي وفضل يضحك لحد ما وصل لماما، تخيلوا معايا شخص ينام وميحضرش حفلة عيد ميلاده.

صرخت ماما في وشه:

- فين أخوك؟! وبتضحك كده ليه؟!

- ماما، أحمد، أحمد، نائم.

- أنت بتقول أيه؟! نائم، ده أكيد بيستعبط، أنا هروح أصحيه.

مسكها بابا من أيديها ومنعها:

- مديحه، خلاص كفاية فضايح، سبيه يرتاح وبكرا نبقي نتكلم معاه.

وفي الحفلة فضلت الناس تسأل عني، فاضطرت ماما أنها تخترع قصة، ماما أستاذة في التأليف، وخلصت الحفلة والناس مشيت، لكن ماما فضلت غضبانة ونفسها تقتلني وبصراحة عندها حق..

أما أنا فصحيت كمان متأخر نص ساعة، يمكن لأن جسمي كان محتاج يرتاح لكن بالنسبة للعائلة ده يعتبر كارثة، خرجت من السرير بسرعة ودخلت الحمام ولبست وخرجت لقيت كل العائلة قاعدين في هدوء، قعدت ولسه هأكل، صوتها

- وقفني زى صفارة الإنذار، كانت غضبانه:
- أخيراً أفكرت أن لك عائلة، وهتفطر معاهم كمان، لا، ده
كثير علينا.
ولأني عارف أنها غضبانه وده حقها، لأن المفروض كنت
أحضر الحفلة فرديت بهدوء:
- ماما، أنا فعلاً أسف، غضب عني، الحادثة هي السبب،
وبعدين كان لازم أطمئن أنها بخير وأوصلها لبيتها، أسف أي
نمت، كنت تعبان.
قام بابا وحط أيده علي كتفي وقال:
- حادثة، مع مين يا أحمد؟!
- مع موتوسيكل، بس الحمد لله، الحادثة كانت بسيطة.
جدي قال بصوت حازم:
- الحمد لله يا حبيبي أنك بخير، لكن السواق ده لازم يتغير.
- لا يا جدي، أنا اللي كنت بسوق، دى غلطتي أنا.
نطت حبيبي إسراء وهي آخر العنقود، هي في ثانية كلية
تجارة خارجية، حضنتني وقالت:
- الف سلامة عليك يا حبيبي، قولي في حاجه بتوجعك.
- لا، يا حبيبي أنا كويس.
وبصوت كله حزم قال بابا:
- المرة دى عدت علي خير، لكن سواقة ثاني لا يا أحمد،
فاهمني.
ردت عليه وأنا مبتسم:

- أنا قوت كده، حادثة واحدة كفايه.

كملت فطاري وخرجت وأنا مبتسم ووصلت للشركة وأنا بردوا مبتسم ودخلت مكتي وقعدت وكل تفكيري فيها وأني هشوفها ثاني، لكن المشكلة أنك لما تكون منتظر حاجة الوقت بيبقي طويل وممل، كل عشر دقائق كانوا بيمروا كأنهم عشر ساعات وأخيراً الساعة بقت تسعة إلا ربع، وفجأة حسيت قدأيه أنا غبي أزاى نسيت، أنا نسيت أقول لسوزان بأن لولا هتوصل الساعة تسعة، فضغطت علي زر الاستدعاء، فدخلت الكارثة،
- أيوة يا فندم.

- عايزك تركزي في كلامي كويس، في أنسه هتسأل عن مكتب المدير العام أسمها لولا، لما توصل البوابة خليهم يدخلوها، وخلي واحد من الأمن يوصلها بنفسه لحد هنا، وأول لما توصل عرفيني ودخليها فوراً، وأطلي من الفراش ينظف المكتب اللي قصادك فهمتي، أنتي لسه واقفه عندك بتعملي أيه، روعي بسرعة، أعلمي الي قوت لك عليه.
- حاضر يا فندم، لولا، وأبلغ الأمن، والمكتب.

خرجت بسرعة وأنا فضلت منتظر، وفي نفس الوقت، كانت لولا فعلاً وقفه عند بوابة الشركة وكانت بتحاول تسيطر علي قلقها من أي ممكن أكون كذاب وتعرض لموقف محرج، وأول لما لولا كلمت الأمن وعرفتهم باسمها ورغبتها في الدخول لمكتب المدير العام دخلوها علي طول، وبلغوا

سوزان بوصولها، وبعد عشر دقائق وصلت لولا لمكتب
سكرتيرة المدير العام، وأول لما شفتها سوزان ابتسمت لها
وكلمتني:

- الأنسة لولا وصلت يا فندم، أتفضلي، المدير منتظر
حضرتك جوا.

كانت مستغربه من اللي بيحصل:
- المدير منتظرني أنا، غريبة.

أنا بقي كنت بضبط نفسي، وأول لما أتفتح الباب ودخلت
من غير ما أحس ابتسمت، وبمجرد لما هي شافتني وقفت
مكانها، كانت مصدومة، حسيت أني سامع دقات قلبها زي
ما كنت حاسس أنها سامعه دقات قلبي، دقيقة تقريباً عدت
وهي واقفه ساكته وأنا مبتسم لحد لما قدرت تستوعب
الموقف، فقالت:

- أحمد، أسفه، أستاذ أحمد، معقول، أنت المدير العام.

العنيدة كانت مصدومة ومرتبكة، ضحكت وأنا بقول:

- أيوة أنا المدير العام، أتفضلي أرتاحي، تشربي إيه؟

- لا، ولا حاجه.

- سوزان، أنتي لسه هنا بتعملي أيه؟ روعي حضري المكتب،
وانسخي عقد تعين سكرتيرة المدير العام بسرعة، أمشي.

كانت سوزان مندهشة أكثر من لولا نفسها من اللي
بيحصل:

- حاضر يا فندم.

- خرجت سوزان، أما لولا قعدت وقالت:
- بسرعة كده استلمت الوظيفة، أقصد يعني، من غير مقابلة.
- الوظيفة أصلاً كانت ملكك، قوليلي إيه رأيك في الشركة، مناسبة ولا غيرها.
- ضحكت ضحكة مزقت قلبي:
- يعني، مش بطاله، أنا مش مصدقه أني أتعينت بسرعة، شكلي بحلم.
- لا، ده مش حلم، ووظيفة سكرتيرة المدير العام مش وظيفة سهلة خالص، ومحتاجه شخص يكون ذكي وشجاع ومتهور، وده متوفر فيكي، بس لازم تتعلمي بسرعة كل اللي يخص الوظيفة، ده مهم جداً.
- فضحك ضحكة ثقة:
- حاضر يافندم، أي أوامر ثانيه.
- فضحكت أنا كمان وقولت:
- لا، لولا، في عندك أي استفسار، عن الشغل أو المرتب.
- لا، أنا موافقة علي المكتوب في العقد، وشكراً علي الوظيفة.
- المفروض أني أنا اللي أشكرك، كان ممكن أنك تجبسيني، صح، جرحك عامل أيه، أحسن، ولا لسه موجوده.
- لا، الحمد لله تمام، أحسن، وبعدين الحادثة كانت صغيرة.
- دخلت سوزان وفي ايدها العقد، مش ممكن أنسي النظرة اللي كانت في عيونها، والدهشة لما لقيتني بضحك مع لولا،

يمكن لأني عمري ما ضحكت في الشغل، اتسمرت مكانها،
فنديت عليها بصوت عالي:

- سوزان، سوزان، تعالي خذي، ده ملف لولا فيه كل أوراقها
سلميه مع العقد وخليهم يكملوا الإجراءات، وبعدين تجيبه
عشان أمضيه، لولا روحي معاها استلمي مكتبك.
- حاضر يا مستر أحمد.

وبالفعل استلمت لولا مكتبها وفي خلال أسبوع واحد كانت
فهمت طبيعة الشغل وأتعودت عليه وأخيراً رجعت الأمور
للاستقرار مرة ثانية، المواعيد أصبحت دقيقة والملفات
منظمة، مش بس كده حياتي نفسها بقيت مختلفة، بدأت
أحب حياتي،

بقيت بصحي من النوم مبتسم وسعيد، أكيد طبعاً لأنها
هتكون في المكتب منتظراني، بقيت مجنون بيها لدرجة أن
حبها بقي كل حاجه، بقي الهواء اللي بتنفسه، بقي الدم اللي
بيجري في عروقي، ستة شهور، مروا بسرعة البرق يمكن
لأني سعيد..

من غير ما أقصد دخلتها حياتي بالكامل، في المكتب معايا،
في المصنع معايا، لو سفرت للغردقة أو شرم في شغل معايا،
وحتى لما سفرت لندن في رحلة عمل كانت معايا، حتى
لما بروح للدكتور بتكون معايا، كل حاجه في حياتي بقيت
عرفاها وبتشاركني فيها، كانت بتساعدني حتى في اختيار
البدل والعطور.

وأخيرا لقيت اللي كنت عمري كله بدور عليه، حلمي بوجودها معايا أتتحق، لدرجة أن همومي وأنا معاها بتختفي، قدرت أنها تحتويني بكل معاني الكلمة، معاها بقيت حر، طير طائر في السماء..

أنا بحبها، لا أنا بعشقها، بقيت مدمن، مدمن لصوتها ولعيونها ولروحها اللي نورت حياتي، أصبحت لولا جزء من حياتي مش ممكن أقدر أستغني عنه..

من غير ما أقصد أتغيرت وكل اللي في الشركة والمصنع من موظفين وعمال بقوا عارفين عن وجود علاقة غريبة بتربطني بيها وقد أيه هي مهمة في حياتي، يمكن لأني كنت بتصرف تصرفات غريبة عمري ما كنت بعملها، كنت غرقان في الحب وجماله..

لكن لكل مرحلة نهاية وكانت لسعادتي أنا كمان نهاية، فبدأت المشاكل تظهر، وسبب قربها مني بقيت هدف سهل للمشاكل مش بس علي المستوي المهني لا، كمان علي المستوي الشخصي...

عندما تفارقنا الروح .. نظل جسد بلا روح ..
عين بلا دموع ..

ملحمة تحدث داخل نفسي
ما الذي أريده وما لا أريد !?
تساقط الأشواق وتلتهب
وتتفجر الأحلام وتحترق

لأول مرة من يوم ما قبلتها، أصحي من النوم قلقان وحزين وحاسس أنها هتبعد عني، حبيتي ونور قلبي، مش عارف أعمل أيه مخنوق، قعدت معهم من غير ما أكل أي حاجه، كنت بفكر فيها وفي الحلم المخيف اللي وجع قلبي، صوتها وهي بتبكي كان بيقتلني، خرجت وركبت العربية وفجأة فصلني صوت راضي أنا في الشركة، نزلت واتجهت للمكتب كانت قاعدة منتظراني وهي مبتسمة، قامت ودخلت ورايا وفضلت تتكلم معايا عن الشغل والمواعيد وأنا ولا هنا، وأول لما وصلت للكرسي قعدت كنت حاسس بألم في صدري، بس بحاول أني أخبي عليها، لكنها حسيت بوجعي وبسرعة فتحت الدرج وخرجت الدواء وساعدتني أخذه، وأول لما اتحسنت صممت تعرف مالي، كذبت عليها لأول مرة وقولت لها أن في مشاكل في البيت، حطيت ايديها علي كتفي وطلبت مني ابتسم، وفعلاً ابتسمت كنت عايز أطمئنها عليه، لكن فضل إحساسي بالألم والحزن والحلم اللي خائف أنه يتحقق شاغل تفكيري...

اليوم كله شغل، اجتماعات ومقابلات، وفجأة وأنا قاعد ماسك ملف وبدرسه دخلت عليه المكتب وهي خائفه وبتتنفس بسرعة كأن في كارثة حصلت:

- مستر أحمد، في مشكلة في المصنع، واحد من العمال أتجرح وبينزف وحالته صعبه والعمال متجمعين ومش عارفين يعملوا أيه.

- لولا، أهدي، العيادة فيها دكتور، ولو الحالة خطيرة هيتنقل المستشفى.

كانت الدموع محبوسة جوا عنيتها وهي بترد عليه بحزن:

- للأسف الدكتور غائب، ومستر حسين كان من فترة لغني عربية الإسعاف، ده اللي عرفته من المهندس سالم.

- أتني بتقولي أيه، حسين لغني عربية الإسعاف، مش ممكن، مستحيل.

رमित الملف من ايدي وخرجت معها للمصنع الملحق بالشركة، العمال كانوا متجمعين وغضبانين والعامل بينزف، طلبت من الأمن يجهزوا عربيتي وراضي ينقلوا للمستشفى، وراح معاه اثنين من العمال، ولقيت نفسي في مشكلة كبيرة، الدكتور اللي غائب وعربية الإسعاف اللي مش موجودة وحسين ابن عمي وتصرفاته، وبكل حزم وغضب:

- أنا عايز أفهم، يعني أيه الدكتور غائب، وأزاي عربية الإسعاف تتلغي من غير ما حد يبلغني.

قرب مني سالم وهو مرتبك:

- للأسف يا مستر أحمد، الأستاذ حسين أو امره كانت واضحة أن الشركة مش محتاجة لعربية إسعاف، والدكتور هو اللي عينه، وللأسف هو علي طول غائب.

- ثاني، حسين، هو أنا مش ورايا غير حسين، لولا أطلبني منه يقابلني في المكتب فوراً.

- حاضر.

وصلت لمكتبي وطول الطريق بحاول اتماسك، حسين كده اتعدي كل الحدود، حياة العمال مش صفقة هضيعها علي الشركة، لازم يقف عند حده، معقول اسيبه يخرب الإمبراطورية اللي تعب فيها جدي ومن قبله والده وجده لحد ما وصلت لبي هي فيه، لا مش هيحصل، طول ما أنا عايش وبتنفس، وأنا بفكر في عقاب ليه دخلت لولا عليه: - الأستاذ حسين وصل.

- دخليه فوراً.

مش ممكن أشوف برود أكثر من كده في حياتي كلها، دخل وهو مستغرب وبكل برود قال:

- في أيه، أيه الموضوع الضروري اللي أنت عايزني فيه، كان معايا شغل.

طيب أعمل أيه فيه، شخص غبي ومستهتر:

- أنا أسف أني أزعجتك، مشكلة بسيطة، مجرد حياة عامل كان ممكن يموت.

- تقصد حادثة المصنع، طيب وفين المشكلة، ما هو أتقل المستشفى، أيه المطلوب مني دلوقت؟!

- ولا حاجه، أنت موجود هنا، لأنك متحول للتحقيق وموقوف عن العمل.

- بتوقفني أنا عن العمل يا أحمد، أنت نسيت أنا مين، أوعي تفتكر أني هسكت، تبقي بتحلم، بكرا هدفك ثمن اللي عملته ده غالي.

خرج حسين، والألم بدأ ينهش في قلبي، غمضت عيني و حاولت أني أهدي، وفجأة حسيت بايديها علي كتفي ففتحت عيني، لقيتها وفي أيديها الثانية عصير ليمون وصممت أني أشربه كله وبعد ما شربته صممت أني أضحك، كانت بتحاول تخفف عني أحزاني، لكن ليه مش حاسس أن الأمور هتتحسن بالعكس..

اليوم خلص وودعتها، وطبعاً طلبت مني أني أهدي وأنسي كل اللي حصل، وبمجرد ما وصلت البيت لقيت اجتماع قمة، جدي وبابا وماما قاعدين ونظراتهم كلها غضب كأن في مصيبة، يمكن حسين قالهم أني وقفته عن العمل:
- مساء الخير.

نظرات جدي كانت حادة وغريبة:

- أنت أزاى تعمل كده، أزاى توقف حسين عن العمل، أنت نسيت أنه ابن عمك.

- لا، بس هو اللي نسي، وتصرفه كان غلط ولازم يتعاقب.
- ده كله لأنه خائف عليك.

- خائف عليه من أيه؟! العامل كان ممكن يموت.

رد عليه جدي:

- عامل أيه اللي كان هيموت.

- عامل في المصنع، اتصاب النهاردة، والأستاذ حسين من غير ما يدرس الموقف كان لغوي عربية الإسعاف، حتى من غير ما يقولي، لا وكان عين دكتور من أصحابه المستهترين وطبعاً الباشا مش بييجي الشغل.

- عشان كده أنت وقفته عن العمل.
- أيوة، وحولته كمان للتحقيق.
- يعني هي الحكاية كده، تمام يستاهل، وأنت خلاص
قررت عقابه، نتكلم بقي في الموضوع الأهم واللي أحنا
متجمعين عشانه، وهو أنك تحضر نفسك لأن حفلة الخطوبة
هتكون يوم الخميس والترتيبات كلها تمت، مديحة أهتمت
بكل حاجة.
- حسيت باستغراب، خطوبة، أنا مش فاهم حاجه:
- خطوبة مين؟! -
- ردت أمني بكل هدوء:
- خطوبتك على مروة بنت عمك.
- مروة، مين قال أني عايز أخطبها، أو عايز أتجوزها أصلاً.
رد بابا بأسلوب عنيف أول مرة يتكلم بيه معايا:
- مش مهم أنت عايز أيه، جدك وأنا ووالدتك قررنا ده،
والموضوع انتهى خلاص، خطوبتك الخميس اللي جي،
فهمت.
- اتحجرت الدموع في عيني، وحاولت أني أتكلم معاهم:
- فهمت أيه، أنا، أنا بحب، أقصد أنه من حقي، أني أحب.
وبكل قسوة قال جدي:
- حقك فعلاً، لكن أنك تحب اللي تناسبك وتناسب العائلة،
مش سكرتيرة.
- حسيت بروحي بتنسحب مني، معقول أخسرها، وبكل
غضب وحرزن:

- مش فاهم، يعني أيه أحب اللي تناسب العائلة، أنا من حقي أحب وأتحب، ومش مهم هي مين، المهم أنها تقدر تسعدني وأسعدها، الحب مش صفقة، وبعدين أنا مش صغير.

قربت ماما مني ومسكت ايديه وشدتني ليها بعنف:
- لا، صغير، لما تحب سكرتيرة، تبقي صغير، السكرتيرة دي تنساها، فاهم.
صوت جدي وكلامه دمرني، كنت فاكر أنه الوحيد اللي هيحس بيه:

- أحمد، حفلة الخطوبة يوم الخميس، وبالنسبة للسكرتيرة، تحب تطردها أنت بنفسك، ولا أطردها أنا.
دموعي فارقت عيني وأنا بقول:

- جدي، أرجوك أسمعني، أنا بحبها، أرجوك..
قطع كلامي، مش ممكن أنسي نظرتة وحدثها وإصراره:
- أحمد، أنت سمعتني كويس، خطوبتك يوم الخميس.
حاولت أن أتكلم مع بابا يمكن يسمعني:
- بابا، أسمعني أنت، أنا بحبها، لولا من عائلة طيبة..
قطع كلامي هو كمان، محدش حاسس بيه:
- كفاية يا أحمد، طول عمرك عاقل، أيه اللي حصل لك.

خلاص كل شيء أنتهي، الموت أرحم، صعب أي أغير رأيهم وصعب أي أتحمّل، لكن لازم أبعدهم عنها، مش هقبل أنهم يجرحوها:

- ولا حاجة يا بابا، خلاص يا جدي أنا هطردها، وهسكت خالص، مش هتكلم ولا هتناقش معاكم في أي قرار يخص حياتي، لكن ده مش معناه أني هنساها، وهفضل أحبها لأخر يوم في عمري.

سيبتهم ودخلت غرفتي، الأرض كانت بتلف بيه ومش قادر اشيل جسمي، رميت الشنطة جنب الباب، مش ممكن أصدق أن العادات والتقاليد أهم من حياتي وسعادتي عندهم، أنا أنتهيت، رميت جسمي علي السرير، وأنا بفكر أزاوي أقدر أبعد عنها، معقول أقدر أعيش من غير ما أشوفها أو أسمع صوتها وضحكتها، لكن لو فضلت جنبني هياذوها، لازم أبعد عنها وده لمصلحتها، ده الحل الوحيد، مسكت الموبايل واستجمعت شجاعتي وحاولت أتصل بيها لكن، صعب أني أسمع صوتها وأقولها تبعد، الحل الوحيد أني أكتب لها رسالة، فتحت الرسائل وكتبت لها ودموعي رافضة توقف.. « لولا، ساحيني، أنتي مفصولة عن العمل »

وبعت الرسالة وقفلت الموبايل، كنت خائف تكلمني، كنت هرد أقولها أيه، أني ضعفت، وأنى كان صعب عليه أقف قدام أهلي وادافع عن حبي، الألم بدأ يزيد حاسس أن في حاجه طبقه علي صدري مش قادر أتنفس والألم بينهش في قلبي، الدواء، فين الدواء، وقفت وحاولت أني أوصل للشنطة اللي عند الباب، لكن وقعت، حاولت أني أقف ثاني لكن الألم كان أقوى مني، مش قادر أخذ نفسي، ومش قادر أنطق، وفجأة

انتهى كل شيء، ولما فتحت عيني، لقيت نفسي في الصحراء، أنا أزاي وصلت هنا، فضلت ألف وأمشي يمكن القبي حد، وفضلت أصرخ، لولا، جدي، بابا، في حد هنا، لكن أنا سامع صوت..

أيوة ده صوت أسر، بينادي عليه ويصرخ، ليه بتصرخ أنا سامعك، بس أنت فين أنا مش شايفك، فضلت اتلفت حوليه أدور عليه، وبعدين سمعت صوت بابا ورءوف وجدي كمان بس هم فين، حسيت بروحي بتنسحب مني، وسمعت صوت عمي ماهر ففتحت عيني لقيت نفسي نائم علي السرير والكل متجمع، جدي وبابا وأخواتي وعمي ماهر ماسك ايدي ويسمع نبض قلبي، بعد كده عرفت أن أسر دخل يتكلم معايا لقاني علي الأرض، حاول يفوقني ولم مردتش عليه صرخ عليهم عشان يلحقوني:

- الحقوني، بابا، جدي.

- في أيه يا أسر؟! مالك يا ابني.

- أحمد واقع علي الأرض، مغمي عليه.

دخل رءوف وبابا بسرعة:

- أحمد، رد عليه يا ابني، رد عليه يا أحمد، رءوف أتصل بعمك ماهر بسرعة وقوله يجي، أحمد حبيبي رد عليه.

مسك رءوف الموبايل وأتصل بعمي وقاله علي اللي حصل، وقفل معاه وبدأ يظمن بابا:

- بابا، أظمن، أحمد هيكون بخير، هو بس مغمي عليه.

أما جدي فكان في المكتب، خبطت عليه دادة رحمة وقالت له
علي اللي حصل، فجري علي غرفتي بسرعة:

- في آيه، أحمد حصله آيه؟!!

حاول بابا يتماسك:

- أحمد مغمي عليه يا بابا، مش راضي يرد، بابا قوله يرد
عليه.

حاولوا معايا كثير عشان أفتح عيني لحد ما وصل عمي،
وبمجرد ما كشف عليه وسمع نبض قلبي، خرج من
الشنطة حقنه وجهازها وبعد ما حقني بيها بخمس دقائق،
بدأت أفتح عيني، لكن الألم لسه موجود، حاولت أني
اتماسك لكن صعبت عليه نفسي، بكيت غصب عني، مسح
بابا دموعي وهو يبكي، طيب ودموع قلبي اللي هم مش
حاسين بيها..

طلب مني عمي أني أرتاح وطلب منهم يخرجوا، غمضت
عيني من كثر التعب يمكن روحي تروح لمكانها، وحشتني
ووحشني صوتها..

خرجوا كلهم برا، وبعدين بدأ عمي يفهمهم أن اللي حصل
ده معناه أني بعاني من مشكلة في قلبي، وهي دى الحقيقة اللي
كنت خائف يعرفوها، كلام عمي كان صعب عليهم:

- للأسف أحمد عنده هبوط حاد في القلب، ونبض قلبه
ضعيف، لو تأخرنا شويأ كان ممكن الموضوع يقلب بأزمة
قلبية.

بابا كان هيقع فمسكوا رءوف وأسر:

- أزمة قلبيه، ابني.

- شاكر، أهدي، واضح أنه أتعرض لإجهاد شديد جداً، لازم نحدد المشكلة بسرعة ونعالجها، قبل الموضوع ما يكبر، الحمد لله أننا لحقناه، ودلوقت أحمد لازم يرتاح، ويريت محدش يزعله أو يغضبه.

ماما الوحيدة اللي كانت مش مصدقة أي تعبان وفاكرة أي دى لعبة:

- يعني أية، أنت ناسي أن خطوبته يوم الخميس، يعني فاضل يومين، والناس اللي عزمتهم أقولهم أيه، ابني بيدلع.

كلامها خرج بابا عن شعوره، قام وكان هيمسك في خناقها:

- بيدلع، بيقولك أزمة قلبيه، أنتي أيه، مش بتحسي، وبعدين مين أهم عندك، الناس ولا ابنك؟! ردي، أحنا السبب في اللي حصله، فاهمة، أحنا السبب.

- أهدي يا شاكر، يومين يرتاح وبعدين هأخذه علي المستشفى وهنعرف المشكلة فين ونحلها.

قعد جدي وهو بيبيكي، هو كمان كان حاسس بالمسئولية:

- ماهر، أحمد لو حصله حاجه، أنا هموت، أنا..

وفضل بيبيكي، حضنه بابا، وحاول يطمئه في الوقت اللي كان هو نفسه محتاج حد يطمئه، مرت أيام عليه وأنا علي نفس الوضع، نائم طول الوقت لدرجة أي فقدت الإحساس بالوقت مش عارف الليل من النهار، وكل ما كنت أفتح

عيني، كنت بلقي جدي قاعد جنبي ويبتسم لي أول ما أفتح عيني برغم الدموع اللي في عينه، وبرغم وجعي إلا أني كان صعب عليه وجعه وقلقه، حسيت أني المسئول عن وجع كل اللي بحبهم، فبدأت أتحمل الألم وأعمل اللي كنت دائماً ببرع فيه وهو أني اخبي ألمي وحزني..

طول عمري سند ودرع بيحمي العائلة، مش هينفع أضعف وأستسلم لحزني علي فراقها، لازم أتحمل وأصبر، لأنني مش هقدر أفرح علي حساب عائلتي، كان ممكن أسيب العائلة وأتجوزها، لكن فين السعادة لو أتحرمت منهم، أنا بحبهم وصعب أعيش من غيرهم، ولازم اختار بين سعادي ولا سعادتهم، والاختيار عمره ما كان صعب، فقررت أن الموضوع أنتهي، لولا هتفضل في قلبي وعمري ما هنساها، هتفضل الحب اللي عيشت فيه أجمل أيام عمري، ومش ممكن حد يسرق مني حبها، هيفضل سر جوايا، يعني هعيش جسم لكن من غير قلب، هقفل علي نفسي وأعيش اللي باقي من عمري وحيد..

بدأت أتحرك وأقعد معاهم وأتكلم وأضحك وكأن الأمور طبيعية، مر أسبوع سبع أيام لكن جوايا كانوا سبع سنين، وحشتني ونفسي أسمع صوتها ولو لمرة واحدة، أقولها قد أيه أنا بحبها، لكن ده مستحيل، وفي اليوم الثامن صحيت الساعة ستة وجهزت نفسي ولبست وخرجت عليهم وقعدت مكاني علي السفرة، ورسمت ابتسامة مزيفة:

- صباح الخير.
ابتسم جدي وهو يبرد عليه:
- صباح الخير يا حبيبي، أحمد أنت خارج.
- أيوة، هروح الشغل.
كان مضايق من كلامي:
- شغل، شغل أيه، أنت ناسي أنك لازم ترتاح، أتكلم يا شاكر.
- كفاية راحة أنا بقيت كويس، وبعدين أنا زهقت من الراحة، محتاج أخرج وأشتغل، سلام.
وقفني بابا وحط أيده علي كتفي:
- طيب برحتك، بس خذ بالك من نفسك، لو حسيت بأي تعب كلمني.
- حاضر يا بابا، مش عايز حضرتك تقلق عليه، أنا كويس.
ركبت العربية وأتحر كنا، ووصلنا للشركة والكل كان بيرحب بيه، الكل كانوا فرحين برجوعي إلا أنا، أنا الوحيد اللي مش فرحان برجوعي، دخلت المكتب وقعدت وأفتكرت كلام دكتور مروان اللي قالوا، لما أتصلت بيه أعرفه اللي حصلي، وأني لازم أحذر من مضاعفات المرض لأن لو فضلت الأزمات تتكرر عضلة قلبي هتنهار وتغير عضلة قلب مش أمر سهل، لكن سواء عيشت أو موت مش هتفرق، وساعات الموت بيكون راحة، ويمكن ربنا يجمعني بيها في الآخرة ونعيش سوا...

دخلت سوزان ومعها ملفات حطتها قدامي، وبالرغم أني كنت بعترها دائما كارثة إلا أنها كانت عندها كلها حزن، كنت عايز اسألها عليها يمكن تكون عارفة حاجه عنها، لكن منعت نفسي ..

- سوزان، ملف شركة النور، وقولي لحازم أي عايزه.

كلامها قتلتني قالته بسرعة وخرجت من غير ما تستني رد:

- ثواني وملف شركة النور هيكون عند حضرتك وهبلغ مستر حازم أنك عايزه، بس هي بتسأل عليك كل يوم، ولسه قفله معايا دلوقت.

دموعي خانتني، بجد وحشتني، كنت متخيل أنها نسيته لأنها أكيد غضبت من اللي عملته وده حقها، أنا فعلا غبي علقتها بيه، بس غضب عني حبيتها، مسكت الموبايل وقررت أني لازم أكلمها، لازم تفهم أنها تستاهل شخص يقدر يحارب عشانها ويسعدها، ومع أول رنة فتحت كأنها كانت مستنيه أتصالي:

- أحمد، أنت كويس، رد عليه، أنت ساكت ليه !

- لولا، أنا، أنا أسف على كل اللي حصلك بسببي، لكنه في مصلحتك صدقيني.

- كل ده مش مهم، المهم أنت، عامل أيه، لسه تعبان.

- سأمخيني، أنا نسيته أني مش من حقي أحب وحيتك، نسيته قوانين العائلة، أنا بحبهم وصعب أحاربهم، لازم أبعد وأنتي لازم تنسيني، حكايتنا أنتهت قبل ما تبدأ، كل

الي عايزك تعرفيه، أن أنا بحبك وعمري ما هنساكي .
قفلت معها من غير ما أسمع ردها، قفلت لكن قلبي كان
بيتقطع، وأتخيلت صوتها وهي بتقولي الكلمة الي كان نفسي
اسمعها منها « بحبك » ..

مرت شهور وأنا كل الي بعمله هو الشغل وبس، كنت
بخرج الصبح وأرجع بالليل تعبان وأنام من غير ما أفكر،
وكان الألم هو الصديق الي دائماً ملازمي، كانت بتوحشني
لدرجة أنني هموت وأشوفها لكن صعب..

وفي يوم صمم بابا أنني أرجع أتغذي معاهم، فرجعت بدري
وقعدت معاهم علي الغذاء ولسه هبدأ أكل، كنت تعبان جداً
والألم في قلبي مستمر وبحاول أتحملة، وقفني كلام جدي:

- أحمد، أنا أتكلمت مع والدك وعمك وحددت ميعاد
فرحك علي مروة هيكون بعد شهرين، يوم عيد ميلادك،
أيه رأيك؟

ردت أمي وهي بتضحك:

- والحفلة تبقي حفلتين، عيد ميلاده وفرحه.

حتى بابا كان سعيد وموافق:

- أخيراً هنفرح بيك يا أحمد، مبروك يا حبيبي.

كنت مش عارف أقول أيه، للدرجة مش حاسين بحزني
وألبي، مشاعري مش مهمة ولا فارقة معاهم، ومن غير ما
قصد خرج الكلام مني:

- نفس اليوم الي قبلتها فيه، يوم عيد ميلادي، سواء وفقت
أو لا مش هيفرق معاكم، حياتي ملهاش ثمن.

وقمت دخلت المكتب وفتحت الالاب، قال يعني هشتغل،
ليه بيعملوا معايا كده، أنا عمري ما ضيقت حد فيهم،
النهار طلعت وأنا مش عارف أنا، لا من التفكير ولا الألم
الي مصمم يدمرني، النهار طلعت دخلت غيرت وخرجت
علي الشركة من غير ما أفطر معاهم أو أكلمهم،
الأيام فضلت تمر وأنا كل الي بتمناه أني أشوفها أو أسمع
صوتها، وحشتني العنيدة، معقول تكون نسييني، معقول
تكون بتكرهني بعد ما ضعفت وضحيت بيها، بس أنا
بحبها وهفضل، ومش ممكن أنساها، لكن مش أنا الشخص
الي يستحق أنها تبكي عليه، لأنني ضعفت وسييت حبي يضيع
مني من غير ما أذاع عنه، أنا بعدها عايش لكن من غير
قلب، من غير روح، من غير نفسي، أنا بنهار..

يتغير الإنسان كتغير الفصول..
تارة ربيع وتارة أخري خريف..
وبينهما صيفاً وشتاءً..

الدموع تتساقط كالمطر من شدة الفرح
ما يحدث حقيقي أم مجرد انتفاضة
يتخللني شعور بالحرية
كأنني عصفور حطم قيوده وطار عالياً

وفي يوم زى أي يوم بيمر عليه، صحيت مخنوق مش عارف
ليه، قعدت معاهم لكن مش قادر أفطر، حاسس بألم في
صدري، كانوا كلهم فرحين ويتكلموا عن ترتيبات الحفله
والفساتين، إلا جدي الوحيد اللي كان مركز معايا، يمكن
يكون بدأ يحس بيه وبالنار اللي جوايا، أو يمكن عايز يعرف
أنا بفكر في أيه..

الألم بدأ يزيد، حاسس أني في حد بيخلع قلبي من صدري،
من كثر الألم ملاحني أتغيرت ولوني بقي شاحب، مش قادر
أنطق، يمكن يكون الموت أخيراً قرر يزورني، وقبل ما أقع
مسكني جدي:

- أحمد، مالك يا حبيبي.

كنت بأخذ نفسي بالعافية وصوت نفسي عالي ومتقطع،
حسيت بأني بأقع من قمة جبل لكن فين القاع؟! غمضت
عيني منتظر النهاية، وفجأة فتحت عيني لقيتها واقفه جنبي
والبحر قدمنا، مسكت ايدي وهي بتضحك، وبعدين سابتها
وجريت بعيد وطلبت مني أمسكها، فضلت أجري وراها
لحد ما وقعت علي الأرض وحاولت أخذ نفسي، فغمضت
عيني..

ولما فتحتهم لقيت نفسي نائم علي سرير وفي أجهزة وأسلاك
كثير حوليه، وعمي وناس غريبة معاه، أياه اللي بيحصل،
عيني غمضت غصب عني، فحسيت بايديها علي شعري،
كانت جنبي فقربت منها فهمست « بحبك » مسكت

أيديها وبوستها، ضحكت وقبل ما أقولها أني بحبها، أختفت كأنها كانت حلم، صرخت بأعلى صوتي وأنا بفتح عيني، لا، أرجعي..

لقيت بابا قاعد جنبي ويحاول يهديني وطلب من الممرضة تنادي عمي ماهر، كنت مخنوق ومش قادر أمنع دموعي، دخل جدي لما سمع صوتي والأثنين فضلوا يبكوا علي شكلي واللي أنا فيه، وأول ما عمي دخل صرخ فيهم وخرجهم: - ممكن تخرجوا، حضري الحقنة بسرعة.

وفجأة حسيت بالعالم وهو بيتبخر وأخيرا، أختفيت أنا كأن..

عرفت بعد كده أن لما مسكني جدي، دخلت في غيبوبة ونقلوني للمستشفى، وبعد فحوصات وإشاعات عرفوا أني عندي ذبحه صدرية، وأن عندي مشاكل في عضلة القلب، وأن عمي والدكتور سامي حذروا من أي أزمة ثانية وأني لازم أرتاح وممنوع من الإجهاد الشديد أو الغضب أو الزعل، بس أزاى وكل اللي ييفكروا فيه هو تدمير حياتي..

الأيام بدأت تعدي لحد ما حالتني بدأت تستقر، وأخيرا بقيت أقدر أنتفس من غير أجهزة، وبدأت أتكلم وأقعد شويا، وبعد أسبوعين تقريبا كنت خلاص بقدر أقف وأتحرك لكن بالمساعدة طبعاً، وكان الألم بيختفي ويرجع، لسه ليه عمر، وقفت في الشرفة كنت زهقان وكان أسر معايا، كنت براقب عصفور بيطير كان نفسي أقدر أتحول لعصفور

واروح أشوفها، خرجني من حلمي صوت جدي:

- أحمد حبيبي، أخيراً شوفتك واقف ثاني.

لفيت نفسي لقيته و معاه بابا، كانوا فرحانين وبيضحكوا،

ابتسمت ابتسامة خفيفة:

- الحمد لله.

ضحكوا وقربوا مني، ساعدني أسر وبابا أفرد جسمي

علي السرير، ومن غير ما أعرف كان اقترح دكتور سامي

علي جدي أنه يبعثني لأي مكان أغير فيه جو بدل البيت

والشغل يمكن أعصابي ترتاح، ولأن أكثر مكان كنت بحبه

هو العريش لأنني كنت دائماً بسافر هناك وأنا صغير مع

جدي، طلب جدي من رءوف يحجز شاليهات بالعريش لأنه

هيبت معايا معظم شباب العائلة، وده من خوفه عليه أني

أتعب هناك، فلازم يكون معايا حد يساعدني، وفجأة دخل

رءوف علينا وهو سعيد:

- جدي أنا حجزت الشاليهات، وكل شيء تمام.

- برافو عليك يا حبيبي.

في حاجه غريبة بتحصل، فقررت أفهمها:

- شاليهات أيه !

رد جدي وهو مبتسم:

- الدكتور قال أنك لازم تأخذ أجازة، فحجزت شاليهات

في العريش، ليك ولشباب العائلة، عشان يكونوا معاك،

وهتسافروا بكرة أن شاء الله.

ضحك أسر:

- وخيراً هنسافر، ونغير جو.

وبالفعل تم التجهيز للرحلة، والساعة سابعة الصبح ركبت العربية من المستشفى، وأتحركنا وبعد أقل من ساعة نمت، وفجأة صحيت علي صوت أسر:

- أحمد، صحي النوم وصلنا خلاص.

- وصلنا، طيب كويس، لأنني محتاج أرتاح.

- ترتاح، أنت نائم من أول الطريق.

رد عليه رءوف وهو بيضحك:

- أسكت أنت، تعالي يا أحمد أدخلك الشاليه ترتاح.

دخلت الشاليه ورميت نفسي علي السرير ونمت، فضلت نائم لحد الصبح وأول لما صحيت فتحت الشباك، البحر كان جميل وصافي وأمواجه عاليه، كنت شايفها وقفة هناك علي البحر وشعرها بيطير من الهواء وبتضحك، حسيت أنها موجودة بجد، قلبي حاسس بأنها معايا..

خرجت وبدأت أمشي من غير ما أعرف أنا رايح فين، المهم أني أبعد نسيت الوقت، ولأول مرة من وقت طويل أحس براحه، المكان كان أشبه بالجنة قعدت علي الرمله وافتكرت رحلة لندن الأخيرة، لما خرجنا أنا وهي بعد الشغل، أفتكرت ضحكنا وكلامنا والصور وكميه الأكل اللي أكلتها، فابتسمت لدقائق قبل ما أفتكر أن دي مجرد ذكريات وأنهاراحت مني خلاص ومش هشوفها ثاني، غمضت

عيني وحاولت أفكر لحظتنا الجميلة وضحكتها وصوتها،
الوقت جري ومر بسرعة والشمس بدأت تغرق في البحر،
الليل فرض ضلوعه..

وده معناه أن لازم ارجع، وأول لما قربت من الشاليه، لقيتهم
كلهم كانوا متجمعين وكأن في حاجه، وبمجرد ما لمحني أسر
جري عليه وحضني وكان بيكي وكلهم جريوا ناحيتي،
هو في أيه ! أما رءوف كان غضبان وملامح الخوف والقلق
مسيطرة عليه:

- كنت فين يا أحمد ؟ قلقتنا عليك.

- كنت بتمشي، والوقت سرقني.

بدأ أسر يمسخ دموعه:

- أحنا خفنا عليك، تكون تعبت، وإحنا مش عرفين مكانك.

- أنا مش صغير، وممكن أخذ بالي من نفسي.

سبتهم ودخلت الشالية، وريحت جسمي علي السرير، أنا
عارف أي غلطت أي خرجت ونسيت أعرفهم وكم ان نسيت
أخذ الموبايل معايا، وأكدهم قلقوا عليه، لكن أنا كنت
محتاج أقعد لوحدي، وقبل ما أنام أتكلمت معاهم وعرفتهم
أني محتاج لوقت أكون فيه لوحدي وطلبت منهم يطلوا قلق
عليه ودخلت نمت، مر أسبوع وكل يوم أروح أقعد في نفس
المكان وأرجع بعد غروب الشمس، وفي اليوم الثامن حصل
موقف غريب عمري ما تخيلت أنه ممكن يحصلي..

وأنا مدد جسمي ومغمض عيني وبحاول أتخيلها وهي

بتضحك سمعت صوت حد بيصرخ « ألحقوني، ألحقوني
« فتحت عيني لقيت كتلة سوده في البحر، والصوت من
ناحيتها، أكيد في حد بيغرق، ومن غير ما أفكر رميت
نفسي في البحر ونسيت أن قلبي ممكن يخوني وأتعب وأول
ما مسكتها أكتشفت أنها بنت من صوتها، كانت كلها علي
بعضها سوده مش باين حتى ملاحظها من الشال اللي مغطي
وشها، خرجتها وأول لما وصلنا علي الشط سبتها ونمت علي
الرمل، كنت مش قادر أخذ نفسي وبدأ الألم يظهر في صدري،
حسيت أن روحي بتروح مني فغمضت عيني من شدة الألم،
وفجأة حسيت بأن جسمي بيترفع من علي الأرض، بس
مش عارف أزاى ده بيحصل، حاولت أفتح عيني لقيتها هي
اللي مسكاني وبترفع جسمي:

- أنا هنا، جنبك، أنت أنقذتني.

للحظة حسيت أنها العنيدة، لكن مستحيل، لكني حسيت
بأن ده صوتها، ولاده مجرد تخيل لأنها وحشتني، أيه العمل
دلوقت أنا تعبان ومش قادر أتحرك، لازم أرجع الشاليه،
أتمني أنها تقدر تساعدني:

- ممكن تساعديني، أنا قاعد في شاليه رقم سبعة وأربعين،
القرية اللي هناك، ممكن تروحي تبلغني أخواتي أني تعبان
وتعرفيهم مكاني.

من غير ما تتكلم حوطنتي بايديها وبدأت ترفع جسمي من
الأرض والغريبة أني بدأت أحرك نفسي معاها، كنت حاسس

براحه لدرجة أني غمضت عيني، وفضلنا نمشي، والغريبة أن الألم بدأ يهدي ويخف، الوقت مر بسرعة، صوت الباب وهو ينفتح نهني ففتحت عيني، معقول وصلنا للشاليه، وعلي طول دخلتني علي السرير وقعدتني وفردت جسمي علي السرير، ومن غير ما أتكلم فتحت الدرج وطلعت علبة الدواء وساعدتني أخذه، كنت بأخذ نفسي بالعافية برغم أن الألم هدي عن الأول، غمضت عيني لكن مش معقول الي حاسه ده بيحصل، بدأت تقلعني البنطلون والقميص وبتكمل علي الباقي، دي أكيد مجنونة بس عندها حق كل الي لبسه مبلول خالص، حاولت امنعها لكن مش قادر، مش مهم أيه الي هيحصل، أنا تعبان وهي بتساعدني..

بس دي مجنونة خالص، الحمد لله أنها مغطية نص جسمي بملاية، وقبل ما تروح تجيب أي هدوم، حسيت بنغزة شديدة في صدري فتألمت وحركت ايدي وضغطت علي مكان الألم فرجعت ومسكت ايدي وبعدها وفضلت تدلك مكان الألم، والغريبة أن الألم بدأ يهدي وارتحت وغمضت عيني ثاني..

دقائق وسمعت صوت مروة وهي بتصرخ، صوتها كان عالي، حاولت أفتح عيني لكن الدواء كان مهمد جسمي:

- أظهر وبان علي حقيقتك، بتخوني، ومع مين؟! بدوية حقيرة زي ديه، وأنتي يا خطافة الرجالة يا حيوانه، فين أهلك، مش بعيد يكونوا هم الي مسرحينك، مش كده، أنطقي.

صوتها العالي نبه أخواتي وكام شخص وقفين برا ودخلوا جري يعرفوا فيه أيه، المنظر صعب والكل واقف مذهول، عندهم حق أنا عريان وهي معايا..
أما الكتلة السوداء فبعدت عني وقالت:
- أنا كنت بساعده، هو مريض.

واحد من اللي وقفين أتكلم بغضب، واضح أنه عرفها من صوتها:

- هينار، أيش بتعملي هون، ومن هالشخص ووين ملابسه؟!
ردت مروة عليه بلهجة تهكم:

- طبعاً مش هتعرف ترد، الهانم كانت نائمة معاه.

يمكن تكون ملامحها مش باينه لكن صوتها كان حزين:

- لا، هو مريض، وكان بيتألم.

أخواتي كانوا مذهولين من المنظر، لكن هم عرفني كويس فمسك رءوف ايد مروة وجذبها بعنف وهو يقول:

- أنتي غبية، أحمد مش ممكن يعمل كده، أكيد في حاجة غلط.

ورد أسر هو كمان وأكد كلامه:

- أنتي أكيد مجنونة.

ردت مروة بكل سخرية:

- لا والله، هو عريان وهي نائمة علي صدره، فعلاً ظلمتهم، أكيد كان يبشر حلها درس أحياء.

وفجأة ظهر واحد وبدأ يقرب من الكتلة السوداء وبصوت عالي وحاد:

- راح أذبحك وأذبحوه، الشرف غالي، لازم تموتوا.
كنت سامع كل اللي بيحصل لكن مش قادر أتكلم، فتحت
عيني لقيت شخص يقرب منها وفي ايده حاجة بتلمع،
ركزت ده خنجر، قومت ألمي ونطقت:
- أنت بتعمل أيه، أبعد يا مجنون عنها، أنتوا فاهمين الموضوع
غلط .

- أنت كمان هتموت، بس الفاجرة لازم تموت الأول.
رءوف وقف قدامه وقاله بهدوء:
- أرجوك أهدي، كل شيء ممكن يتصلح، وأكد فيه حل ثاني
غير القتل.

فالرجل اللي نده عليها في الأول رد وقال:
- الحل الثاني، أنه يتجوزها، والموضوع كله ينتهي ونقول أنه
طلبها مننا وإحنا وافقنا وكنا موجودين هون لنكتب الكتاب
والهانم ما كانت تدرى بالاتفاق اللي صار.
القلق سيطر علي أخواتي من اللي ممكن يحصل، لو رفضوا
الحل ده، ممكن يقتلونا فعلاً، ولو وفقوا جدي ممكن يقتلني
ويقتلهم، ولأن الموقف صعب سكت رءوف وأتكلم محمد بن
عمي لأنه الأكبر سنًا:

- وإحنا موفقين علي الحل ده، حد يروح يجيب المأذون.
صرخت مروة بأعلى صوتها:

- يتجوزها يعني أيه، أحمد خطيبي وهيتجوزني أنا.
صرخ أسر فيها:

- أنتي تخرسي، أنتي السبب في المصيبة ديه.
البدوي اللي أقترح الحل اتجه للباب وقال:
- هروح أجيب المأذون، رمضان خليك هون معها، ما
تركها.

قرب رءوف مني وهو مضايق من الكتلة والرجل اللي
معها:

- استحمل يا أحمد، هنتصرف في المصيه دي بعدين، أنت
يا أستاذ، ممكن تأخذها وتخرج شويًا، لأنه لازم يلبس، ولا
نكتب الكتب وهو كده.

- لا، يلبس أحسن، أحنا واقفين برا، قدامي يا فاجرة.
أخذها وخرج وخرجت مروة وهي غضبانه وبدأ رءوف
وأسر ومحمد يساعدونني البس، حاولت أني أتكلم وأفهمهم
اللي حصل، صوتي كان خافت وضعيف:

- كانت بتغرق، أنا حاولت أساعدها وتعبت، قلبي وجعني
وهي ساعدتني لحد ما وصلتني هنا، ربنا يعلم، أنا برئ
وهي كمان، أنا حتى..

قطع كلامي رءوف وقال:

- أحمد، أهدي أنت، كلنا عارفين أنك مش ممكن تعمل
كده.

عشر دقائق، ودخلت إسراء وشذا ونرمين، كانوا مضايقين
من اللي سمعوه من مروة، فقالت نرمين بصوت غاضب:

- أيه اللي سمعته من مروة ده، ومين اللي كانت مع أحمد،

مروة غضبانة، أنا حاولت أمنعها، لكنها صممت وسافرت.
خلصت كلامها وأتكلت شذا:

- طيب والعمل، فرحك علي مروة، كان بعد كام يوم.

أسر راح صارخ فيها وقال:

- ما هي السبب، كان لازم تصرخ، كانت الأول تفهم
وبعدين تتكلم، الغيبة لمت الناس علينا ومن ضمنهم أهل
البيت، أحمد كان تعبان وهي كانت بتساعده، ودلوقت لازم
يتجوزها.

قولت وأنا بتألم:

- خلاص الموضوع أنتهي، الموت قرب، والكل هيرتاح مني.

بكيت إسراء وملست علي شعري وهي بتقول:

- بعد الشر عليك يا حبيبي، ليه بتقول كده، إحنا ولا حاجة
من غيرك.

رءوف ومحمد كانوا بيحاولوا يتناسكوا، الموقف صعب
ومحتاج حل سريع وإلا الناس ممكن تعرف وسمعه العائلة
هتتهز، رءوف أتحرك ناحية الباب وقال:

- أنا هخرج أتكلم معاهم، نتمم كتب الكتاب بسرعة من
غير فضايح، وبكرا الصبح كلنا هنرجع البيت.

خرجوا كلهم وأنا مش عارف أفكر في حل، نص ساعة
ودخل رءوف وأسر ومحمد ومعهم عدد من البدو والكتلة
السوداء والمأذون، وكتبوا الكتاب، ولقيت نفسي متجوز من
واحدة غريبة، وكل اللي أعرفه عنها أن اسمها «هينار»..

خرجوا كلهم وفضلت هي معايا، المفروض أعمل أيه، كنت رافض أتجوز مروة أتجوزت هينار نفس المشكلة، أيه الفرق، كانت ساكنة وكأن مش فارق معاها أنها أتجوزت واحد غريب عنها، وأنا بأكل في نفسي، ونفسي أترمي في حزن لولا وأطلب منها تسامحي، التفكير هيقولني، معقول اللي حصل ده حقيقة، لمجرد أني ساعدت غريقة أتجوزها هي دي النهاية؟! وكل ده صدفة! وفجأة اسمها رن جوايا، هينار، الاسم ده سمعته أو شوفته قبل كده، غبي، اسم أيه اللي بفكر فيه، المفروض أني أفكر في المشاكل اللي هتحصل، وأتنفض جسمي لما حسيت بايد علي كتفي وبكل برود قالت:

- كيفيك.. محتاج لشيء.
- لا، أنا بخير.. لكن بفكر في المشاكل اللي هتحصل.
- أنا معك، ما راح أتركك، تعلم كل شيء مكتوب.
- أرجوكي كفايه كلام فارغ، وبعدين هو أنتي وحيدة، أقصد فين أهلك، وكيلك كان اسمه مختلف عن اسمك، فين والدك ووالدتك وأخواتك.
- أمي ماتت من عشر سنين، وأبي مسافر، وعندني أخ كثير شقي تركني هو كمان وسافر، والشيخ شرف هو كبير القبيلة وهو المسئول عني، راح يجي يوم وتقابلهم وراح تجبهم كثير، أنا واثقة أنك راح تفرح كثير لما تشوفهم.
- كل شيء ممكن، هو مش ممكن ترفعي الشيء ده.. أشوفك علي الأقل.

- أكيد راح بسمح لك تشوفني، لكن، طول عمري كنت بحلم بفرح، ومن تقاليدنا العريس ما يشوف عروسته إلا يوم الفرح، لكن لو بدك شيهه راح شيهه.

- لا خلاص، مش مهم، برحتك.

- تسلّم، راح أنام هون علي هالشئ، تصبح على خير.

- وأنتي من أهل الخير.

وفي نفسي كنت بقول هو شكلها هي فرق معايا في آيه، ولا حاجه، مددت جسمي وغمضت عيني وهربت لأحلامي، ومع شروق الشمس الكل كان جاهز، طلبت من أسر يكتب عنوانا في رسالة ويسلمها للبدوي اللي كان وكيلها، عشان يوصلها لو والدها وأخوها لما يرجعوا، لأنهم أكيد هيحبوا يزروها، ركبنا العربيات وبدأت تتحرك بينا علي القاهرة ولما وصلنا للبيت، الكل نزل ولقيت نفسي قدام مشكلة كبيرة، وهي شرح اللي حصل لجدي، كل اللي فكرت فيه هو أنها هتأذي من غير ذنب، فطلبت منها تفضل برا لحد ما أطلب منها تدخل وطلبت من إسرائ تفضل معاها..

دخلنا وكان جدي وبابا وماما وعمي ومعاهم مروة والغضب ظاهر عليهم وكأنها محكمة والحكم خلاص صدر بإعدامي، وقبل ما أتكلم خرجت كلمات أسر ورءوف ومحمد المدافعة عني وحكوا اللي حصل واللي عملته مروة، وإن تسرعها كان السبب في اللي حصل..

نظر لي جدي:

- وهي فين؟! -
- موجودة براء، ومعها إسرائ.
- أسر، أطلب منها تدخل.
وبسرعة خرج أسر وبعد دقائق دخل وإسراء معاه وهي بعدهم، وطبعاً شكلها ولبسها كان خيف، وبمجرد ما لمحتها ماما أتعصبت وقالت:
- مش ممكن، مستحيل، مش ممكن أقبّل أبداً أن ابني يتجوز ديه،
قاطعها جدي بصوت حاد:
- مديحه، مش وقت الكلام ده خالص، فاهمة، مش عايز اسمع ولا كلمة.
خرج كلامي وكان ساخر، غصب عني:
- السكرتيرة مش قد المقام، بس البدوية بقيت أمر واقع، مين يقدر يعاند القدر وسخريته من تحمكمم، وفي النهاية أنا الخسران.
قرب بابا مني وحط أيده علي كتفي:
- خلاص يا أحمد، وبعدين فرحك كان خلاص، بعد عشرين يوم.
فرد جدي عليه:
- وهيتم يا شاكر، لكن العروسة أتغيرت، لكنه هيتم.
صوت ماما كان كله يأس وغضب:
- مستحيل، أنا مش ممكن أصدق، مستحيل.

وطلعت السلام ودخلت غرفتها وهي هتنفجر من الغضب أما باقي العائلة كانوا مستغربين رد فعل جدي، أنا بقي دخلت غرفتي، كنت محتاج أرتاح ومن الطبيعي أن الكتلة السوداء تدخل معايا هي كمان، عملت نفسي مش شايفها، دخلت الحمام وغيرت ورميت نفسي علي السرير وغمضت عينية ونمت من كثر التعب..

فتحت عيني لقيت الساعة ثمانية الصبح معقول نمت كل ده، وهي فين! معقول كل ده حلم، وقبل ما أفرح، لسه بحط رجلي في الأرض لقيت حاجه سوده في الأرض فزعتني، للأسف طلع كل اللي حصل حقيقة وواقع مؤلم، خرجت من الحمام بعد ما أخذت هدومي معايا ولبستها فيه، لقيتها قاعده علي طرف السرير، وبكل برود وهدوء قالت:

- صباح الخير، طول الليل ما نمت، كنت خائفة عليك كثير تتعب، تحب أحضر لك الفطور.
- لا، شكراً، وبعدين، هنا في ناس مسئولة عن تحضير الأكل.
- براحتك، أنت خارج، الأفضل أن ترتاح.
- لا، عندي شغل كثير، ولازم أخرج.
- طيب، ممكن تأخذ بالك من نفسك، أخاف أنك..
- قاطعت كلامها بغضب وأنا خلاص هتفجر:
- ممكن تفوقي، مش من حقك تقلقي عليه، ولو سمحت خرجيني من دماغك، أنا ميت.
- بعد الشر عنك، بموت قبلك.

- الرحمة يا رب، أنا خارج.
خرجت وأنا نفسي أخنقتها، ومن غير ما أتكلم مع حد أو
حتى أكل مشيت علي الشركة، هو ده الحل الوحيد للمشاكل
الي بعيشها..

وطول العشرين يوم كنت بحاول أنسي وجودها، حتى
صباح الخير مش بقولها، كل يوم أصحي أروح الشغل
وأشتغل وأجهد نفسي في الشركة والمصنع لحد ما أتعب
وأرجع أنام وأصحي وهكذا، لحد يوم الفرحة..

وطبعاً صممت أني أروح الشركة وهناك فضلت أفكر في
الي حصل، في نفس اليوم ده قبلتها ودخلت حياتي، كان
المفروض يكون ده أسعد يوم في عمري كله بس لو كانت
هي عروستي وحشتني ووحشني صوتها وضحكاتها وخوفها
عليه، الوقت جري وكل الموظفين رحووا إلا أنا، وفجأة
وبدون أي مقدمات فزعني صوت رءوف وفتحت عيني:
- قاعد هنا، وكلنا منتظرين حضرتك، تشرف فرحك.

- فرحي، علي مين، ده مش فرح، ده نهايتي.
- أحمد، تقدر تقولي هي ذنبها أيه، مش يمكن يجي يوم
وتقدر تحبها.

- لا، مستحيل، أنا حبيت لولا، وهفضل أحبها لأخر يوم في
عمري، مش ممكن أحب غيرها، مستحيل.

- كفاية يا أحمد، حرام عليك نفسك، أن شاء الله الأمور
تتحسن، ويريت كان بايدي حاجة أعملها، يالا تعالي معايا

لازم نروح الفرحة، مسكني وساعدني أقف ومشيت معاه وأنا مرغم لحضور فرح مجرد التفكير فيه بيقتلني، وصلنا للبيت كانت الحفلة بدأت، الأنوار والموسيقى وناس كثير وزحمة والكل عايز يشوف مين هي عروستي؟ دخلت غرفتي ولبست، وخرجت وكل اللي يشوفني يبارك لي، وأنا ساكت مش عارف أرد أقول أيه، وقعدت جنب جدي، لكن طبعاً ماما قررت أنها تنكد عليه وتعصبي وبكل غضب قالت:

- هي فكره نفسها عروسة بجد، كل ده تأخير، ليه.

من غير ما أفكر، ردبت:

- بس هي عروسة فعلاً.

وفي نفس اللحظة ظهر أسر وهو سعيد ومبتسم:

- يا جماعة.. إسرائ بتقول العروسة جهزت ونزله حالاً..

أحمد المفروض تكون هناك عند السلم.. لازم تستقبلها.

- عند السلم، حاضر.

أتحركت ومعايا جدي وبابا، ومع كل خطوة كان قلبي دقاته بتزيد، لحد ما وصلت لأول السلم ووقفت منتظرها، كان في شعور غريب جويا، أنها موجودة، معقول تكون لسه فكراني، لا أكيد نسيته وعاشه حياتها، والأفضل أن هو ده اللي يكون حصل، مش حابب أنها تكون حزينه، غمضت عيني، فسمعت صوت ضحكتها، فتحت عيني طيب هي فين، أكيد بحلم، غمضت عيني وفتحتها، لا مش بحلم أنا سامع ضحكتها، مستحيل، وفجأة شوفتها، كانت وقفه في

أول السلم من فوق وبتضحك، حبيتي ولبسه فستان أبيض، معقول أكون بحلم، مش مهم، المهم أي أفضل جوا الحلم، ضحكت ومن غير ما أفكر أتحركت وطلعت السلم وهي بدأت تنزل وفي نص السلم أتقبلنا، مسكت أيديها كنت عايز أتأكد أي صاحي، أخذتها في ايدي ونزلنا سوا التحت، وفضلنا ماشيين لحد الكوشة وقاعدنا، وأنا برقبها بعيوني، خائف أفوق من الحلم..

مش أنا بس اللي مدهول، الكل كان مستغرب من تصرفاتي، أما هي فكانت ساكتة بس بتضحك، برغم أي عايز أسألها أزاي لكن كنت ساكت وبضحك، عنيدة ومجنونة، وأخيراً أفتكرت أنا سمعت وشففت الاسم ده فين..

وأخيراً أعلنت الفرقة نهاية الحفله برقصة ختامية للعروسين، بمجرد ما سمعت الإعلان وقفت وانحنيت ومدت ايدي ومن غير ما أتكلم حطيت أيديها في ايدي ووقفت، وبدأت أغنية نشيد العاشقين، شدتها جامد فضحكت ضحكة عالية ورقصنا، الغريب أننا رقصنا بانسجام ورومانسية خصوصاً لما حطت رأسها علي صدري، قلبي كان هيقف من السعادة.. الكل كان منبهر من اللي بيحصل، معقول أن أنا برقص، لا وسعيد وبضحك كمان ورومانسي في حركاتي، أكيد في حاجه غلط، أما أنا فكانت طائر من الفرحة، مش مصدق نفسي يا ناس، كنت خائف أن قلبي من شدة الفرح ينهار ويقف، وفضلنا نرقص، ونرقص وكأننا لوحدنا، كل الموجودين

اختفوا، كنت أنا وهي وبس، حبيتي العنيدة، نسيت حزني وألمي طول الأيام اللي فاتت ورجعت ثاني للوقت اللي كانت فيه معايا، ملكي وأنا ملكها..

أنتهيت الحفلة وأخذت هينار وركبنا العربية، خلاص هخطف عروستي ونروح علي شهر العسل بعيد لوحدنا، مروة كانت حجزت شاليه في الغردقة لشهر غسلنا سوا، وكويس أن جدي حافظ علي الحجز، ركبنا العربية والكل ودعنا وأتحركت بينا بعيد وكل اللي عملته أني حطيت رأسي علي كتفها وضحكت، ومسكت ايديها وحطتها علي قلبي، كنت عايز أعرف منها حاجات كثير، لكن صعب في العربية، وكل ما أحاول أتكلم تضحك فأضحك، لحد ما وصلنا القرية السياحية، وصلنا الشالية وبعد ما دخلوا شنطنا وأخذت المفتاح، بصت لها والمجنونة غمزت ودخلت تجري، هي فكرة أني هسيبها، طبعاً لا، جريت وراها ومسكتها، وهي فضلت تضحك، لو تعرف قد أيه وحشتني ووحشني صوتها وضكتها، هموت وأعرف كل حاجه، ضمته لصدري وسألته:

- أنتي حقيقة، ولا أنا بحلم.
- حقيقة يا روح قلبي، وأنت معايا، صدقني ده مش حلم.
- بحبك يا مجنونة، بحبك.
- ثواني يا مستر، أنا بحبك أكثر.
- لا، أنا أكثر، أنا بعشقتك.
- وأنت روحي، وكياني، ووجودي، من غيرك، أنا ولا حاجه.

- لا، أنتي كل حاجه، أنا بحبك أكثر من نفسي.
- أمم، واضح أننا هنفضل اليوم كله، نحارب بعض، علي مين بيحب الثاني أكثر.
- أنا مستعد أعمل هدنة، بس الأول تعالي، عايز أقولك سر.
- سر، أوك، بس الأول لازم تمسكني.
- وهربت المجنونة وهي بتضحك، وبدأت أجري وراءها وبحاول أن أمسكها:
- طيب أصبري عليه، لو مسكتك، ساعتها هتفضلي في حضني علي طول، مش هسيبك ولا لحظة.
- وبدأت المعركة هي تجري وأنا أجري وراها وصوت ضحكنا مالي المكان كله، لكن أنا مش سهل أبداً مسكتها وأخذتها في حضني وفضلت أضم، وأضم وهي تضحك، لحد ما قالت.
- بطل بتوجعني، كده هجري ثاني.
- أنا موجوع أكثر منك.
- حاولت تخلص نفسها مني وهي بتقول:
- أحمد، أنت مسكني ليه، سيني، أنا تعبانة وعايزة أنام.
- تنامي، مستحيل، مفيش نوم.
- شيلتها وهي بتضحك وحطيتها علي السرير وبدأت أبوس رقبيتها وخدودها وشفافيفها وأستمرت في أثارها وفضلت لساعات طويلة غرقان في حبا مش قادر أسيبها ولا عايزها تنام، لحد ما الليل طلع علينا، لكن أعمل أيه العنيدة تعبت

وأنا كمان بس كنت مش عايز أعترف لأنها وحشاني، لكن النوم سلطان وعندها حق، أخذتها في حضني وغمضنا عيوننا واستسلمنا للنوم..

ومع طلوع الشمس صحيت، حاولت أتحرك براحة كنت خائف تصحي، وبدأت أدور علي حاجة البسها منظري وحش، وحببتي شعرها طول وكان مغطي ظهرها، وفي لحظة كنت بستر جمع لحظاتها مع بعض، أتقلبت والقمر ظهر ونور حياتي وبدأت تفتح عينيها، فضحكت فضحكت هي كمان وغمزت لي وقالت:

- صباح الخير يا مستر.

فضحكت بصوت عالي:

- صباح النور والياسمين يا عنيدة.

- مستر، أنا كنت، قرب كده، عايزة أقولك حاجه، أنت واقف بعيد ليه.

- أنتي عايزة أيه.

- مستر، أنت خائف مني، ده أنا طيبة.

- أنا أخاف منك، طبعاً لا.

قربت منها فقربت شفايفها من وشي ولمست خدي اليمين وبعدين الشمال وأنا بضحك وبعدين بوسة في الهواء ورقصت حواجبها، بصرحة شقية بس بموت فيها، رميت نفسي عليها وبوستها وضممتها وتوالت العواقب..

فعلاً الحب هو أحلي حاجه في الدنيا، بالحب تقدر أنك

تطير وتوصل للسماء، في حبها كل ذرة في جسمي هربت مني
وسكنت جسمها، حاسس أن صوتها يسري في دمي، حبيبي
والنور الي بيهدي قلبي، أنا المجنون، كل خلايا جسمي
أتجننت وعملت ثورة ضد حكمي وقررت أنك ملكة
كياني..

عشقي ليها بيزيد، والقاسية العنيدة هادئة زي الأعصار
بيدمر كل اللي يقابله ويخضعه لرغباته، اجتاحت كل حاجه
فيه، خلتنني مستسلم لضحكته، كانت دائماً تجري مني
والمفروض أني أجري وراها وأمسكها، مجنونة بتحب البحر،
فكنت بأخذها كل يوم تجري وأجري وراها وأمسكها وأشدها
لحضني وأضمها، وفي يوم وأنا ضممها في حضني علي البحر
همست لها:

- بحبك، لا، بعشقتك، أنتي روعي.

- بجد، طيب أنا كنت بفكر، أنك لو بتحبني هتعمل ،

قاطعتها بكلامي:

- أنا مستعد، أني أعمل أي حاجه، المهم أنك تكوني سعيدة
وراضيه.

كملت كلامها في ثقة:

- الموضوع صعب، معقول تكون بتحبني لدرجة أنك ،

فضمتها أكثر لصدري وبكل ثقة:

- أنا بحبك أكثر من نفسي، ومستعد أعمل أي حاجه، بس

تفضلي في حضني.

قالت وهي بتضحك:

- يبقي، غني.

فهمت المجنونة كانت بتلعب، وطبعاً أنا وقعت في الفخ:

- أغني.

- آه، غني.

حسيت بتوتر وخوف:

- هينار، أنا، صوتي وحش، وأنتي عارفة ده كويس، وممكن تهربي.

- لا، أنت كذاب، أنت مش بتحبني.

- خلاص، خلاص، هغني، بس من غير ضحك.

عمري ما أتصورت في يوم من الأيام أني ممكن أغني، أنا عارف صوتي مش حلو.. لكن كان لازم أغني، الضرورات تبيح المحظورات.. كويس أن المكان كان فاضي وكنا لوحدنا وإلا الناس كانوا اشتكوا من بشاعة صوتي.. أنا نفسي فضلت أضحك علي نفسي أما هي فكانت مبسوطة وبتضحك عليه..

وهوده الحب.. أنك تطير فوق السحاب وتحس أن الكون كله ملكك وأن المستحيل أصبح حقيقة.. وكل شيء جميل...

المرأة كائن أسطوري غذاءه الحب..
ملئ بالغموض.. كالإعصار..

أحببت قلباً يمنعني من تصور تواجدي في عالم الخيال بدونه
تجعلني بحبها ذنباً شريداً يبحث عنها في غابات الحب
وأجعلها بحبي صقراً يطير في سماء صافية السحب

مر الوقت وإحنا غرقنين في السعادة، شهر كامل عدي، مش عارف ليه الأيام الحلوة بتمر بسرعة، الشهر مر كأنه يوم، وخلاص لازم نرجع للبيت، وفعلا بدأت هينار في تجهيز الشنط.. وفي العربية كنت ماسك أيديها، كنت خائف من اللي ممكن يحصل والمشاكل الكثير اللي ممكن تبعتها عني، لكن لا مش هسمح لحد يبعتها عني أو يجرحها، وبدأت أفكر أزاى أحميها منهم من غير ما أتصرف بقسوة معهم ؟ لأن زى ما صعب عليه أعيش من غيرها، صعب عليه أجرح أهلي أو أعيش من غيرهم، وهي كمان كانت شاردة وبتفكر في اللي هيحصل وأيه اللي ممكن تعمله عشان تكسب ثقتهم..

وفجأة وقفت العربية وأنتبتهت أننا وصلنا البيت، نزل السواق وبدأ يخرج الشنط وخرجت أنا وهي ودخلنا البيت..

أول لما دخلت كان الكل في انتظاري، وجري عليه أسر وحضني وفضل ماسك فيه لحد ما وصلت عند جدي اللي بسرعة بوست ايده وحضنته، وقاعدنا سوا وفضل أسر يحكي عن الحاجات اللي حصلت في غيابي، حتى دادة رحمة كانت طبخت كل الأكل اللي بحبه، وبعد ما خلصنا الغذاء طلب جدي مني أروح معاه المكتب، وطلب من دادة رحمة تعملنا قهوة، وبعد ما دخلنا قعد جدي وكان القلق باين عليه وبصوت هادي قال:

- أحمد، كنت عايز أتكلم معاك عن ،
قطعت كلامه:

- ليه كل القلق ده، معقول تقلق وتحزن وأنا موجود.
- غصب عني، المشاكل بتزيد في الشركة، بس أنا خائف
عليك ومش عايز اتعبك، ومش عارف أعمل أيه.
- بطل قلق، طول ما أنا موجود مش هسمح لأمبراطورية
البنداري تتهز، وده وعد مني، المهم دلوقت أنك تضحك.
- وصحتك يا حبيبي، ما أنا خائف عليك، بس جدك
خلاص عجز.

- ده أنا لسه كنت هدور لك علي عروسة، فين الضحكة ،
ضحك وحضنته وشربنا قهوتنا وخرجنا، كانت قاعدة
وسطهم فحركت رأسي عشان تفهم وتيجي ورايا، ودخلت
واستنتها عند الباب وأول لما دخلت قفلت الباب وزيادة في
الاطمئنان قفلته بالمفتاح، فضحكت، فقولتلها:
- بتضحكي ليه، أنا كل اللي عملته، قفلت الباب.
- طيب، وليه بالمفتاح.

فضحكت وأنا بقرب منها:

- يمكن، لأنني، تعبت من الجري.
فضحكت ضحكة عالية:

- طيب ما أنا كمان، تعبت منك.

- مني أنا، ده أنا طيب .

- أنت هتقولي، إحنا نحط عليك سمينة وسكر وندخلك
الفرن، الله طعمك حلو بشكل، ممكن حته لو سمحت.

- سمنة وسكر وفرن، شكلك محتاجه ترجعي للبدو ثاني.
- وهون عليك يا قاسي، خلاص، مش ههزر معاك ثاني.
- ولا أنا، روحي نامي أحسن.
- أنا فعلاً هنام، تصبح علي خير.
- وأنتي من أهل الخير.
- فضلت تبص بغضب، طفلة، وأول لما نامت علي السرير، وطبعاً هو ده المطلوب، قربت منها ومسكت ايديها وأنا بضحك، طبعاً هي حاولت تبعدني عنها زعلانه بقي وقالت:
 - أبعد عني، أبعد، أنت وحش.
 - مش أنتي زعلانه مني، طيب، هصلحك.
 - لا، أنا زعلي وحش، وصعب أنك ترضيني.
 - لا والله، وأنا كمان غضبي وحش، وصعب جداً.
- فضحكت بصوت عالي:
 - أنت بتصلحني ولا بتهددني.
 - بحبك يا مجنونة، ومستعد أضحي بعمرى كله، بس المهم تكون سعيدة.
 - أنا كمان بحبك، ممكن تبوسني بقي ولا أغضب.
 - لا، إلا غضبك.
- بدأت أبوس عينيها وخدودها ورقبتها وأنتهيت بشفايفها اللي سحرتني والمهمه تمت بنجاح ساحق، ارتميت بين ايديها ونمت في حضنها لحد الصبح، كان نفسي يتأخر الصبح شوي لكن لازم أودعها وأروح الشغل، ولأول مرة اللبس بمساعدتها

وطبعاً هي اللي أختارت البدلة والقميص والجرافته وغصب عني لازم أوافق، وخرجنا سوا وفطرنا مع العائلة، وبعدين ودعتها وخرجت للشغل بس طبعاً قبل ما أخرج ضممتها وبوست رأسها، وكنت كل يوم أروح الشركة والمصنع ولما أرجع تكون منتظراني وهي بتضحك، البنت دي هتموتني. أنا بجد محظوظ، كانت الأيام بتمر وكنت بأخذ هينار كل يوم جمعة نزور أهلها ونرجع بالليل، لكن طول الأسبوع يكون في الشغل وهي لوحدها في البيت، والمشكلة أن كل اللي في البيت بيععدوا عنها، أوامر ماما طبعاً، الوحيدة اللي بتتكلم معاها هي دادة رحمة، كانت بتقعد معاها في المطبخ وتساعدنا..

وفي يوم حبيتي العنيدة قررت عملي مكرونة بالبشاميل وبعد ما جهزتها وحطتها في الفرن، سمعت صوت عالي وكأن في حد بيكي، ولما خرجت شافت أسر ومعاها شذا وهي بتكي وهو بيحاول يهديها، وكل اللي فهمته من كلامهم أنهم بيعبوا بعض وماما رافضه الموضوع ومصممه أنه يتجوز سهر بنت خالي وأنه حاول معاها لكنها رافضه تتكلم في الموضوع وأنها كلمت جدي وهو موافق علي جواز أسر من سهر، وأنه حاسس بالعجز لكن مش عارف يعمل أيه.. وفي الوقت اللي في أسر بيحاول يقنع شذارن موبايله، أنا اللي كنت بتصل بيه، كنت محتاج منه ملف وراح يجيبه من البيت وأفكرت ملف ثاني فأتصلت بيه:

- الو، أيوة لسه في البيت، الملف الأحمر، حاضر، نص ساعة بالكثير، وأكون عندك.

قفل معايا ورجع يكلم شذا:

- أنا مضطر أني أمشي، بس هرجع ثاني، لازم نتكلم ونلاقي حل.

- ده لو لسه في كلام، روح شوف شغلك.

مشي وهو حزين، وشذا فضلت تبكي ودموعها غرقت وشهها، وطبعاً حبيبي أتأثرت وبكت وقررت أنها تتصرف، فمسحت دموعها وقربت من شذا وقالت:

- الحب دمار، وخصوصاً لم الأحباب يضعفوا، الحب والضعف مش ممكن يتجمعوا، الحب قوة، وفي كل نهاية، الحب هو اللي ييفوز، مهما كانت المشاكل.

- عارفة لكن لازم الأثنين يجاربوا، صعب أحارب لوحدي وأحارب مين؟ عائلتي.

- وليه لا، أنت حبيبي وده حقك، ومش من حق حد أن يجرمك من حبك.

- كلام، لكن الفعل صعب، أنا مش عارفة أعمل أيه، وهو كمان واقف عاجز مش عارف يعمل حاجه، كله منها، نفسي أعرف هي ليه رفضاني.

- لأنها بتكره الحب، وخائفه منه، شذا، لازم تفكري أزاى تفوزي بحبيبيك، من غير ما تأذي حد، وكفاية دموع، وسيبي الموضوع عليه، أنا هتصرف.

- هتعملي أيه يعني؟! بكرا جدي هيحدد فرحه علي سهر،
والموضوع هينتهي، وهيكون لغيري.
ابتسمت هينار ابتسامة تحدي وقالت:
- هو فعلاً بكرا هيحدد فرح، بس فرحك علي أسر، وده
وعد مني، بس عندي شرط واحد عشان اساعدك.
- شرط، شرط أيه.
- أشوف ابتسامتك وأسمع ضحكك.
- وهيكون ملكي وأنا ملكه.
- ده أنا هينار، أضحكي أنتي بس، وهتشوفي.
وبسرعة مسحت شذا دموعها وبدأت تبتسم وتضحك:
شذا: أنا ضحكك، ومش هبكي ثاني، بكرا، هيحدد فرحي.
جريت شذا وهي فرحانه يمكن لأنها صدقت أن لسه في أمل
أنها تكون لأسر ويكون ليها، أما هينار فرجعت للمكرونة اللي
في الفرن، وبعد يوم طويل في الشركة رجعت، وبعد الأكل
دخلت المكتب مع جدي وأتكلمنا عن الشغل لساعات،
ولما خلصت مع جدي وقررت أدخل غرفتي أرتاح، وطبعاً
مش متوقع اللي بتخطط له العنيدة، لقيتها واقفه في الشرفة
وشاردة لدرجه أني دخلت وقربت منها من غير ما تحس
بيه، فحضنتها من ظهرها:
- حبيبتي، أيه اللي شاغل بالك؟!
أخذت نفس عميق وقالت:
- أسر.

الاسم اللي سمعته صح، حسيت أن في جزء من عقلي هيطير:
- أسر، وبتفكري فيه فيه، أنتي أتكلمتي معاه في حاجه.
- أحمد، أعقل، أسر يبقى أخوك أنت نسيت، وبعدين هتكلم معاه فيه.

حسيت براحة، لكن مستغرب فيه بتفكر فيه:
- طيب، وبتفكري فيه فيه؟! ردي يا هانم.
لفت جسمها وشدتني ليها وبصوت ناعم وبرئ:
- لأنني بحبك، وعازية أشوفك سعيد دائماً.
واضح أني داخل علي فنج جديد:
- أممممم، تمام وبعدين.

- ولا حاجه، أنا بس خائفه ينكسر قلبه، وده أكيد هيزعلك.
- ومين اللي ممكن يكسر قلبه، في أي يا هينار.
- لما الواحد ينكسر اللي بيحبه بينكسر، وأسر بيحب، لكن في تيار قوي وكبير واقف قصاد حبه، عارف لو أسر بيحب سكرتيرة كنت قولت، أنه غلط، مش هتكون مناسبة للعائلة، لكنه بيحب بنت عمه شذا، وهي كمان بتحبه، يبقى فيه ينكسر قلبهم، ويتظلموا.

- معقول، أسر بيحب شذا، طيب وفي المشكلة؟!
- مشكلة كبيرة، والدتك، أقصد مدام مديحه، تخيل أنها مصممة تجوز أسر لسهر بنت أخوها، وتحرموا من شذا اللي بيحبها، مش حرام حبهم يموت قبل ما يعيش، وأنت المفروض تسكت.

- طيب وأنا في ايدي آيه، هو لو قال الموضوع هينتهي.
- ومين قال أنه ساكت، راح وأتكلم مع والدتك لكنها
رفضت وطلبت منه ينساها، بحجه أن سهر هي اللي هتتفعه
طيب يرضيك أن قلبين يتكسروا وأسرتين يدمروا، أسر مش
ممكن ينسي شذا ولا هي كمان، وأكد حياتهم هتدمر.
- وأنتي طبعاً عايزاني أفنع ماما، كان غيرك أشطر، ده نقل
الهرم أسهل.

ضممتني قوي وبصوت هادي ورقيق:
- ومين قال أنك تقنعها، أنا عايزاك تتخيل بكر الصبح
وإحنا بنفطر، والعائلة كلها موجودة، وأنت بكل غضب
وحزن تتكلم مع جدك وتعرفه بالموضوع، تعرفه أن أسر
بيحب شذا، والجريمة اللي ممكن يعملها لو حرمهم من
بعض.

- فكرة حلوة ومجنونة، شبهك يا عنيدة.
- طبعاً، حلوة ومجنونة وعنيدة طول عمري، آيه الجديد؟!
- أنتي مشكلة، بجد مشكلة كبيرة.
- أنا مشكلة، طيب زعلانه منك، ده أنا غلبانه ومسكينة
وبحبك، هو ده ذنبي لأنني بحبك وبحب كل اللي بتحبهم،
أبقي مشكلة، لا أخس عليك أخس، بجد أخس عليك
أخس.

ضممتها لصدري بقوة لدرجه أني سمعت دقات قلبها جوايا،
مفيش كلام يوصف اللي جوايا ليها، بجد صعب، حاسس

بأن جسمي يبتفض بقوة وبيرتعش من قوة حبها، أن بقول
معلش ممكن تخرجوا وتسبوننا لوحدنا لأننا عايزين نتكلم في
موضوع مهم، والموضوع طويل وهياخذ وقت..

وكمان الأحسن أنكم تروحوا تشوفوا شذا وهي حزينة
وإسراء موجودة معها في غرفتها وبتحاول تتكلم معاها
وتخليها توافق ترد علي أسر لأنه بيتصل بيها ووصلت عدد
المكالمات أكثر من مائة مرة ومش راضيه ترد:

- شذا كفاية كده، ورددي عليه.

- لا، مش هرد، وأرد أقول آيه.

- أنتي عارفة أن ماما صعبه، وهو ذنبه آيه كلميه، هو كمان
تعبان وحزين ومحتاجك، وفكروا سوا أزاى تحلوا المشكلة.

- مش قادرة، ومش عارفة أفكر، ولو كلمته هنهار.

- طيب، والحل، هتعملي آيه.

- مش عارفة، بس هينار وعدتني أنها هتتصرف.

- هينار، وآيه في ايديها ممكن تعمله.

- مش عارفة، بس هي كانت واثقة من كلامها، ووعدتني
هتتصرف، وأسر هيكون لي وفرحنا هيتحدد بكرة.

أخذت إسراء شذا في حضنها:

- طيب كلمي أسر، ده هيتجنن، وحاولي تطمينه.

- لا، مش هقدر أكلمه، مش هقدر.

وفضلت تبكي، ومرت ساعات وأسر منتظر في الجنية
والموبايل في ايده، عنده أمل أنها تبطل عيند وترد عليه، كان

بيكي لأنه حاسس بالعجز، وفجأة حس بايد شذا علي كتفه، فضحك، ومسك يديها وبسها وشدها لحضنه وضمها:
- أنا بحبك، صدقيني أنا، هموت لو بعدتي عني.
- بعد الشر عليك، أنا كمان بحبك، وعايضة أكمل حياتي معاك.

ضمها ثاني وكل واحد فيهم بيمسح دموع الثاني، أما إسرائ وهينار فكانوا واقفين بعيد بيقبوا الطريق، طبعاً بتسألوا أزاى ده حصل؟! من شويأ كانت في حضني وفجأة تبقي مع إسرائ، الموضوع أن العنيدة حست بالجوع، فسبتني وراحت المطبخ، وهناك شافت إسرائ حزينه وبتبكي وبتطلب من دادة رحمة أنها تعمل عصير ليمون لشذا، فقررت تفهم منها اللي حصل، وطبعاً حببتي نسييني وراحت معاها عند شذا وفهمتها أن أسر محتاجها وأقنعتها تروح تتكلم معاها، ولما زهقت قررت أخرج للشرفة، لاقيت شذا في حضن أسر، والعنيدة مع إسرائ، وأنا لوحدي، لكن كنت سعيد، ومن حسن حظي أنها لحظت وجودي، كنت مبتسم وملفوف بملايه، طلبت منها تخلص، أنا محتاجها أكثر، فضحكت وخلاص كلها دقائق وتكون معايا، وأول لما فتحت الباب كنت واقف وفتح ايدي فجريت ورمت نفسها في حضني وغمضت عنيتها، فضمتها قوي:

- بحبك، بحبك يا مجنونة.

- مش أكثر مني.

وغمضت عيني وفضلت هي جوا حضني، ممنوع التركيز في لحظاتها سوا، اليوم مر والصبح شقشق والكل صحي ونزلوا وقاعدنا نفطر سوا، وده ميعاد بدايه حياة جديدة كلها حب وسعادة، وبعد دقائق وجهت كلامي لجدي:

- جدي.. أنا عايز أتكلم مع حضرتك.. في كارثة ولازم نلاقي حل..

قطع كلامي:

- كارثة، في حاجة حصلت في الشغل.

- للأسف لا يا جدي.. الكارثة هنا في البيت.

بص بابا والقلق في عيونه:

- كارثة وهنا في البيت، معقول.

وفجأة كل العائلة بطلت أكل وانتبهوا الكلامي، وبصوت كله غضب واستياء:

- الحب يا جدي، أكبر كارثة بتواجه العائلة.

رنت ضحكت ماما الساخرة وهي تقول:

- أنت بتهازار علي الصبح.

- لا مش بهزر، أنا بقول الحقيقة، أنا بتكلم عن كارثة حقيقية، وخطيرة جداً ولازم نلاقي لها حل، قبل ما العائلة دى تدمر.

وبكل هدوء قال جدي:

- طيب، ممكن تهدي، وتفهمني الموضوع.

- أسر يا جدي، تخيل أنه كبر ويحب، واللي بيحبها مش سكرتيرة، ممكن ترفضوها، لاده بيحب بنت عمه شذا، وهي كان بتحبه، يبقى ليه نحرهم من بعض، ولا هو تحكم وخلاص.

عيون جدي كان كلها غضب وهو بيكلم ماما ويقولها:
- مديحه، أيه اللي بسمعه ده، يعني أيه أسر بيحب شذا..
قاطعت كلامه:

- هي عارفه بس مش فارق معاها، كل اللي يفرق معاها أن كلامها هو اللي يتنفذ.
سأل جدي شذا:

- شذا، أنتي بتحبي أسر؟!

- بصراحة يا جدي، أنا،

وسكتت لحظات وكملت كلمها، وبصوت عالي:

- لا، يا جدي، أنا بعشقه.

- وأنت يا أسر، بتحب مين؟!

- هكون بحب مين يا جدي؟! بحب شذا طبعاً، دى روعي.

ضحك جدي وكانت ضحكته عاليه:

- فعلاً كارثة كبيرة، لكن حلها سهل وبسيط، وهو أنهم يتجوزوا.

نط أسر من الفرح ووقف جنب جدي:

- بجد، طيب أمتي الفرح، أقصد أن خير البر عاجله، ولا أيه.

ضحك جدي:

- يوم عيد ميلاد شذا، هيكون الفرحة.
- ولأول مرة أحس أني أخ حقيقي وبكل سعادة وفرح قولت:
- يعني فاضل شهر، واحد وثلاثين من مايو تاريخ مناسب.
- الكل كان سعيد ماعدا ماما اللي كانت غضبانة، أما شذا فجريت وحضنت هينار وهي بتضحك، وأسر جري عليه
- وحضني، مش ممكن أنسي صوت ضحكته وبكل فرح قالي:
- أنا بحبك يا أحلي أخ في الدنيا.
- أنا كمان بحبك، أوعدني أنك تفضل تجبها وتأخذ بالك منها.

- أوعدك، بس بشرط، أنك تكون الأشبين في فرحي.
ضمته لصدري وأنا بضحك:

- الأشبين، مرة واحدة، حاضر يا سيدي.
- خلصنا فطار وكل واحد راح يشوف وراه أيه، وفي اجتماع سري لهينار وإسراء وشذا، طبعاً عايزين يفكروا في ترتيبات الفرحة، وبدأت الجلسة شذا:
- هينار، أنتي هتكوني الأشبينه.
- أكيد طبعاً، بدل أحمد هو الأشبين، يبقى ضروري أكون الأشبينه.

صوت إسراء كان فيه نزعه غضب:

- شذا العروسة وهينار الأشبينه، وأنا ولا حاجه.
- ضحكت هينار وحضنتها:

- الأشيبينه الثانية طبعاً، واللي الفرح مش ممكن يكمل من غيرها.

فضحكت وبسرعة قربت شذا منها وحضتها هي كمان:

- أنا بجد محظوظة، عندي أشبنتين زي القمر، تعالوا بقي نتكلم عن الفرح والترتيبات، الفستان ونظام الحفلة والموسيقي.

رفعت إسرائ صبعها وهي تقول:

- الفستان أمره سهل.

فمسكت هينار بصبعها وهي بتضحك:

- وأمر الحفلة كمان سهل، نختار متعهد حفلات ونطلب منه كل اللي بتحلمي بيه.
فضحكت شذا:

- بما أن الموضوع مش صعب، يبقى نحتفل.

لكن هينار قامت وأتحركت كام خطوة وقالت:

- هو ممكن يبقى صعب في حاله واحدة، لو حماتك المستقبلية، قررت أنها تعمل كل الترتيبات، وتحشر نفسها في الحفله.
شذا وقفت والقلق ظهر عليها:

- يارب لا، لأن ده لو حصل، مش هيكون فرح.

مرت ساعات وهم بيتكلموا لحد ما ظهر أسر وقرب منهم، وده معناه أن هينار وإسرائ يرحوا يشوفوا وراهم أيه، وأول حاجه كان عايز يعرفها أسر، هو أزاى أن أنا عرفت بحبهم، فحكت شذا بأنها كلمت هينار عن الموضوع وهي أكيد

اللي عرفتنني، وبرغم أنه أستغرب من تصرف هينار إلا أنه كان سعيد وفضل يغازل شذا، خلاص بقي فاضل شهر ويتجوزوا وتكون ملكه..

لكن للأسف حصل اللي توقعته هينار، بدأت ماما بترتيبات الفرح وكم ان اختارت فستان الفرح من غير ما تأخذ رأي شذا، مر أسبوع ولسه شذا محتارة في اختيار فستان أحلامها، دخلت عليها ماما وبكل برود وثقة قالت:

- شذا، حبيبي، أنا مش عايزاكي تقلقي خالص، أنا أتفتت مع متعهد حفلات هائل، ومش هتصدقني لاقيت فستان يجنن وحجزته وكلها كام ساعة ويوصل، رحمة هتبقي تطلععه عشان تشوفيه.

من الصدمة اخرست شذا ومنطقتش ولا كلمة، وبعد ما خرجت ماما، انهارت وخرجت للجينية وهي غضبانه وبتعيط، أما إسرائ فكانت بدور علي هينار لكن المرة دي عشان موضوع يخلصها، وعرفت من دادة رحمة أن هينار في غرفتها، فخبطت علي الباب وطلبت تدخل، وبعد ما دخلت قالت:

- هينار، هو ممكن أتكلم معاكي في موضوع، هو موضوع خاص.

- اقعدي الأول وبراحه كده، أحكي لي.

قعدت إسرائ جنب هينار علي السرير، لكن من غير ما تتكلم، فقررت هينار تشجعها فقالت بصوت هادي:

- إسرائ، مالك، هتخبي عني، أنا مش هقول لحد.
- لا مش هخبي عليك، هو الحب، حلو ومهم في حياتنا،
صح.
- أكيد، الحب أجمل أحساس في الدنيا، خصوصاً لما يكون
متبادل.
- ما هو متبادل، أقصد..
فضحكت هينار:
- أممممم، واضح، ومين سعيد الحظ ؟
ردت بسرعة:
- حسام، معيد في الكلية، هو طيب وحنين وبيحبنى وأنا
كمان بحبه، لكن هو من عائلة متوسطة، وأنا خائفة، أن
جدي وبابا وماما يرفضوه، زى ما عملوا مع أحمد وحببته
لولا، أنا أسفه يا هينار مقصدتش أتكلم عنها، أنا مش
عارفه أعمل أيه، مشكلة أسر وشذا كانت سهلة، لكن
مشكلتي صعبه، بس عندي أمل أنك تقدرى تساعدينى.
ابتسمت هينار وحطت ايدها علي كتف إسرائ:
- كل مشكلة وليها حل، وبدل بيحبك وبتحبيه، يبقى
الصعب يهون.
- بجد، يعني هتساعدينى، أنا مش عارفة أقولك أيه، أنا
بحبك يا أحلي أخت في الدنيا، أنا هأتصل بيه وأقوله.
- وأنا كمان بحبك وبموت فيكى، وكل اللي يهمنى، أشوف
ضحكتك يا قمر، روحي كلميه وحطى في بطنك بطيخة
صيفي، أنا هتصرف.

خرجت إسرائ وهي بتجري فخبطت فيه، كانت فرحانة وبتضحكك، ومن غير أى مقدمات باست خدي وكملت جري، وبالرغم أني استغربت من اللي عملته، لكن كنت سعيد، دخلت غرفتي لقيت هينار قاعدة بهدوء علي السرير وأول لما لمحتني قالت:

- أخيراً، جيت يا حبيبي، أنا كنت بفكر فيك.

إسرائ وخروجها الغريب وهينار وتصرفها، أكيد في سر، قعدت جنبها وقولت:

- خير، خير، خير.

- أكيد خير يا حبيبي، أنت عارف أني بحبك، تخيل كده في حد قرر أنه يزورنا.

- حد، مين ده؟!!

- الحب، تخيل قرر أنه يزورنا لثاني مرة ويملاً حياتنا.

- إسرائ، عشان كده، كانت خارجه بتضحك.

- طبعاً، لأنها بتحب، بس لازم توعدني أنك مش هتغضب.

أخذت نفس عميق وابتسمت وقولت لها:

- أغضب، هو أنا ممكن أغضب منك، في حد بيغضب من روجه.

ضحكت ولفت ورايا وحضنتني:

- في معيد عندها في الكلية، اسمه حسام، بيحبها وعايز يتقدم.

- أممم، حسام معيد بيحبها وهي بتجبه وطبعاً المطلوب مني أقنع جدي والعائلة.

ضحكت وقربت شفائفيها من خدي وطبعتهم عليه:
- حبيبي ذكي، لكن الأول لازم تقابله، وتتعرف عليه، وتختبر
نواياه.

فطلبت منها أن تبوس خدي الثاني بإشارة من ايدي، ولما
نفذت ضحكت وقولت:

- تمام كده، أطلبني منها، تقوله يقابلني بكر الساعة عشرة
في الشركة.

- ربنا يخليك ليه يا حبيبي، وروح قلبي، بحبك وبموت
فيك.

ونطت بسرعة، فمسكتها وشدتها وضممتها وبدأت أبوسها:

- تعرفني، أنك وحشتيني، وحشتيني قوي يا مجنونة.

- أحمد، أعقل، أحمد، أنا مش فاضيه.

- مش فاضيه، لا، كده كثير، أنا الوحيد اللي أنتي مش
فاضيه له في البيت ده.

وسبيتها وأنا غضبان، وهي ما صدقت جريت في اتجاه الباب

وفتحته، وقبل ما تخرج لفت وبصت لي وغمزت بعيونها اللي

تسحر ورميت لي بوسه في الهواء وضحكت وقالت:

- وأنت كمان وحشتني، هقولها وارجع بسرعة، أوعي تنام،
بحبك.

وخرجت المجنونة وسبتني هائم بحبها، راحت تكلم إسراء،

وتطلب منها تكلم حسام عشان يقابلني في الشركة، فلقيتها

في وشها:

- إسرائ في آيه، بتعيطي ليه، أنا كلمت أحمد، ووافق أنه يقابل حسام بكرا في الشركة الساعة عشرة.
- أنا بيكي علي شذا، ماما أشترت فستان الفرحة وأتفتت مع متعهد حفلات، شذا منهارة، ومش عارفة تعمل آيه.
- طيب أهدي، كل مشكلة ولها حل.
- وبسرعة راحوا الشذا وقعدت هينار جنبها وقالت لها:
- شذا، أنا فهمتك قبل كده، الدموع مش هي الحل.
- عارفة أنها مش الحل، لكن فين الحل.
- الضحك هو الحل، الحكاية أن حماك مش سهله، هي كل اللي تقدر عليه أنها تضيقك فتغلطي، فيبقي عندها حق أنها ترفض جوازك من أسر.
- قالت إسرائ مستنكرة:
- طيب ما هي لو ضحكت، ماما هتضايق أكثر.
- ابتسمت هينار وقالت:
- وهو ده المطلوب، لكن هتعمل آيه؟! شذا، أي حاجه تقولها، ردي بحاضر.
- حاضر، يبقي الفرحة كده هيدمر.
- لا، الفرحة هيكون أحلي فرحة، أسمعني كلامي ونفذه، ومش هتندمي.
- حاضر هنفذه، وهضحك، وهرقص كمان.
- تعالي بقي، نشوف الفستان ونضحك.

طلعوا لغرفة شذا، كان الفستان موجود علي السرير، كان
شع بمعني الكلمة وموضة قديمة، فمسكته شذا ورميته
علي الأرض:

- معقول، هو ده الفستان الي المفروض البسه يوم فرحي.
حاولت إسرائ أنها تهديها:

- هو موضة قديمة، لكن أكيد في حل.
وبكل هدوء قالت هينار:

- أيه الأهم الفستان، ولا أسر.

- أسر طبعاً، لكن الناس كده هيضحكوا عليه.

مسكت هينار الفستان من الأرض:

- ممكن نهدي، شكلك نسييتي، أن أنا الأشيبينه، ومن مهمامي،
سلامه فستان العروسة.

فردت شذا:

- سلامته، تقصدي..

- أكيد، فستان شيك زى ده محتاج حمايه، ممكن يتقطع أو،

قاطعت كلامها إسرائ وهي بتضحك وبتمسك الفستان:

- أو، يتحرق، فكرة هائله، مبروك عليكى أخويا.

- إسرائ، روجي كلامي ال، بسرعة.

- تكلم ال، أيه، مش فاهمة

- بعدين هقولك يا شذا، إسرائ روجي بسرعة.

خرجت إسرائ وأتصلت بحسام وقالت له أنه لازم يقابلني في
الشركة بكر الساعة عشرة، أما أنا فدخلت المكتب قولت

أشغل أحسن، ولسه بفتح اللاب دخلت هينار وفي ايديها وردة صفراء وايديها الثانية وراء ظهرها، وبكل براءة سلمتني الوردة وهي مبتسمة، فتنهدت وقولت:

- شكراً، بس أنا مشغول، تعالي وقت ثاني.
- وقت ثاني، بس أنا فاضيه.

فرجعت ايدها وراها وسلمتني وردة حمراء، أخذتها منها وقولت:

- شكراً، ممكن تخرجي بقي، يمكن يكون في حد ثاني محتاجك في مشكلة.

- أممممم، ومين يجل مشكلتي؟

وأخيراً خرجت ايديها من وراها وفيها وردة زرقاء وغمزت لي، مشكلة، قلبي صعب يتحمل المجنونة اللي مصممه تدمرني، وبصوت غاضب:

- مشكلة أيه؟!!

قاعدت علي المكتب وحطت رجليها علي الكرسي وقالت:

- تخيل، حبيبي زعلان مني، ومش عايز يصلحني.

- متخيل، مشكلة كبيرة، وحلها صعب جداً.

نطت وقاعدة علي رجلي ولفت ايديها حولين رقبتني وبكل رقة ودلع قالت:

- مش ممكن يكون صعب عليه، لأنه بيحبنى.

- مجنونة، لكن بحبك، وصعب أزعل منك.

- أنا بحبك أكثر، وصعب أعيش بعيد عنك، تعالي بقي، كفاية شغل.

- أروح معاكي فين.
شدتني وخرجنا من المكتب:
- للمجهول.
- طيب، أصبري.
فضلت تشدني لحد ما دخلنا غرفتنا، وبكل عنف رمتني
علي السرير:
- هينار، مالك، في أيه، أنتي حاسه بحاجه.
لوح رقبتهأ ناحية اليمين ومسكت خصلة من شعرها
وبدأت تلعب لي بحواجبها، فبصت لها وبكل هدوء:
- براحة كده وأهددي، أنا مريض، وأنتي عارفة، التهور
ممنوع.
فقربت مني ورميت جسمها عليه:
- مريض، طيب ما أنا كمان مريضة.
- مريضة، والمرض اللي عندك ده بقي، له اسم.
- آه، اسمه وحشتني، ولمعلوماتك ده مرض خطير جداً،
وييموت.
زقتها بعيد وحاولت أقوم وأنا بضحك:
- فعلاً مرض خطير، بس أكيد له علاج.
فشدتني من ظهري فوقعت علي السرير وقربت مني لدرجة
التلاحم:
- طيب مستني أيه، بسرعة، ولا هتسيب الحالة تدهور.
فضحكت بصوت عالي:

- هو أنا أقدر، تعالي.

أخذتها في حضني وبوستها، حسيت أني بدوب جواها
وبخفتي، شعور رائع بيتخللني وهي بين ايديه، بحس أني
طائر في السماء، أنا مستسلم لعشقها لدرجه أني بنسي ألمي
والناس وبضيع أكثر لما بنكون جسد واحد..

ورحله أتحدنا بخاف أنها تكمل ويكون لها نهاية، عايز
أفضل غريق في بحرها، ويكفيني أني أموت عاشق لكل
تفصيله من تفاصيلها، مش عارف أعمل أيه من غيرها،
مش فاكر أمتي غلبنا النوم، كل اللي حصل أني فتحت عيني
كانت الساعة ستة الصبح وهي نائمة وشعرها مغطي وشها
فرفته براحه وبوست خدها ودخلت الحمام وبعد ما لبست
وقبل ما أخرج صوتها العذب وقفني:

- الساعة عشرة.

مش ممكن، مجنونة، فضحكت:

- حاضر، الساعة عشرة، مش هنسي.

خرجت وفطرت مع العائلة وهربت علي الشغل بسرعة
وأول ما دخلت المكتب طلبت من سوزان تدخل:

- سوزان، اسمعيني كويس، في شخص هيطلب مقابلي

اسمه حسام، أول ما يوصل بلغيني

- حاضر يا فندم.

الساعة عشرة إلا ربع، الموبايل رن، من غير ما أفكر أكيد

هي، فتحت وقولت بسرعة:

- لسه موصلش، عرفت سوزان، ولم يوصل هتقولي .
- هو أنا لسه أتكلمت، أنا بتصل، عشان أقولك أي بحبك .
- آه منها، العنيدة المجنونة هتموتني :
- لكن أنا لا ، عارفه ليه، لأني بعشقتك .
- وحشتني ، خذ بالك، التأخير ممنوع .
- وحشاني دى كلمة صغيرة، أنا نفسي ..
- الكارثة قطعت كلامنا، بصوتها الرخم :
- مستر أحمد، الأستاذ حسام وصل .
- حبيتي حسام وصل، نكمل لما أخلص معاه، أوعي
تنامي .
بعتلي بوسة كلها إثارة :
- بحبك، أتكلم معاه بهدوء، عشان خاطري .
- وقفلت المكالمة معها وكلمت سوزان :
- دخليه، أتفضل يا حسام، تشرب أيه .
- قهوة سكر زيادة، أنا سعيد أن حضرتك وافقت تقابلني .
- أنتي سمعتي، بسرعة،
خرجت سوزان، وابتسمت وأنا بقول :
- أنا أسعد يا حسام، إسرائ، قالت أنك معيد في الجامعة
عندها .
- فعلاً وبحبها، وهكون سعيد، لو كملت حياتي معاها .
- لكن هي في سنه ثانية، يعني قدامها ستين، مستعد
تستناها .

- طبعاً مستعد، وكم أن أكون جهزت نفسي.
- بس وظيفة المعيد، مرتبها، يدوب بيكفي متطلباتك، صح.
- يعني، لكن أنا بشتغل كمان بالليل في مكتب محاسبه.
- كلامه فرحني لأن ده دليل علي أنه شخص مجتهد ومعني كده أنه هيحافظ عليها:
- تمام، طيب أيه رأيك تشتغل هنا في الشركة، أنا محتاج محاسب.
- صوته كان متردد وكله قلق:
- للأسف الموضوع صعب، الكلية الصبح، والشغل الإضافي لازم يكون بالليل.
- وهو ده المطلوب، محاسب يسجل الواردات والصادرات للمصنع في ورديه بالليل.
- حسيت أنه خائف من كلامي وهو يقول:
- بصراحة أنا قلقان، الشركة هنا كبيرة وأنا..
- قطعت كلامه:
- حسام، أنا عايز أساعدك أنت وإسراء، وافق وأنا واثق أنك مش هتندم.
- أخذ نفس عميق وقال:
- اللي تشوفوا حضرتك مناسب، أنا موافق عليه.
- لكن أنا عندي شرط، أنك توعديني، أنكم تتقابلوا في الجامعة بس، ولو هتتقابلوا برا لازم يكون عندي خبر قبلها.
- طبعاً، طبعاً، وأنا مش عارف أقولك أيه، أو أشكرك أزي.

- ابتسمت وطلبت من سوزان تدخل:
- سوزان، وصلي الأستاذ حسام لقسم الحسابات وقولي للمدير يسلمه حسابات ورديه بالليل، فهمتي كلامي.
- طبعاً يا فندم، أتفضل معايا يا أستاذ حسام.
- أنا كده ارتحت، هو كده هيكون تحت عيني أدرسه كويس، خلصت شغل واتجهت للبيت وأول لما وصلت جريت عليه إسرائ وحضنتني، كانت فرحانه يا رب دائماً، سبتها وروحت أشوف العنيدة اللي نسيتني، دخلت غرفتنا كانت فاضيه، يبقى أكيد في المطبخ أو مع شذا، خرجت وبدأت أدور عليها، مش موجودة في المطبخ، ولقيت شذا فسألتها:
- شذا، هي فين هينار!؟
- خرجت، من ثلاث ساعات تقريباً.
- خرجت فين أكيد في حاجه حصلت، بس كان المفروض تعرفني قبل ما تخرج:
- خرجت، من غير ما تقولي.
- صوت ماما الساخر عصبي وقلقني أكثر:
- لا ومن غير أذنك، طبعاً ما هي بدوية، مش بيهما حد.
- ماما، أرجوكي كفايه.
- أعمل أيه، أيوة أتصل بيها، طلعت الموبايل واتصلت لقيته مغلق، طيب أتصل بعمي أسأله ولا يمكن تكون راحت مكان ثاني ويقلق هو كمان، أعمل أيه، قعدت منتظر والألم بيعصر قلبي، معقول يكون حد ضيقها ومشيت وسبتني..

الكل قعد علي السفرة عشان الغذاء، وطلبوا مني أقعد معاهم لكن مش قادر، هتجنن فضلت قاعد منتظر رجوعها وعينيه علي الباب طيب والحل، أبدأ أدور من فين، وفجأة دخلت من الباب وأول لما لقيتني قدامها ابتسمت وحطت ايديها علي بطنها وميلت رأسها وبعدين حركت ايديها كأنها شيله طفل، معقول اللي أنا فهمته، حامل، جريت عليها وشيلتها وفضلت أدور بيها، فرحان وهطير من الفرحة، أخيرا هكون أب، نزلتها وضممتها لصدري وأنا لسه بضحك وبصوت عالي ومنشكح:

- بعد كام شهر.

- سبعة، يا بابا.

- يبقي نوقف جنان ونهتم بنفسنا، أتفقنا.
- أتفقنا.

ضممتها ثاني، وطبعا الكل فهم الموضوع وفرحوا، إلا ماما مشيت وكانت غضبانه، وده لأن موضوع أنها تخرج هينار من حياتي كده هيبقي أصعب لأنها هتبقي أم ولادي، فقررت ماما أنها لازم تتصرف وتوقف الحمل ده بأي ثمن، وبعد تخطيط قررت تشارك حد معاهم من مصلحته هو كان أن هينار تخرج من حياتي، مروة، فطلبت منها تقابلها في غرفتها وهناك تم التخطيط لقتل ابني، وبكل جبروت قالت ماما:
- مروة، اسمعيني كويس، الطفل ده لازم ينزل، أحمد مش لازم يستمر مع البنت ديه أبدأ، أنتي اللي لازم تكوني أم ولاده، فاهمه.

- يريت، بس أزي، أزي نتخلص من الطفل ده ونتخلص منها.
- الموضوع سهل وبسيط، حقنه إجهاض، تشرها مع العصير، ويحصل اللي عايزينه، والموضوع يكون قضاء وقدر. ضحكت مروة وقالت:
- فعلاً، قضاء وقدر.
- لكن التوقيت أهم من الخطة، لازم نستني بعد الفرحة، هيكون الوقت المناسب، لأنها هتكون مجهددة من الفرحة وساعاتها هيكون الإجهاض بسبب الإرهاق، مش عايزين حد يعرف أننا وراء اللي حصلها.
- والفرحة خلاص قرب، والحمل نهايته هي كمان قربت، وهي ترجع للبدو، وأحمد يكون ملكي أنا، ونتجوز.
- أكيد أحمد هيطلقها وتتجوزوا أنتوا بقي، أمتي ده هيحصل؟ ويتتهي الكابوس اللي اسمه هينار ويخرج من حياتنا، وأرتاح.
- وفضلوا يضحكوا وصوت ضحكهم يعلو ويعلو ويعلو...

الحب طوفان يسير دون توقف ..
هادم كل السدود ..
الحب شريان الحياة ..

طائراً أنا يتخلل أجنحتي من ضوء الشمس
ألواناً تجذب لها الأنظار
أرغب في السقوط من أعلى شلالاً
وكان الماء هي موطني

حلمي قرب يتحقق وهبقي أب والعنيدة هتكوت أم، المجنونة
الي حطمت كل مقاييس الحب، الأيام بتمر وكل الي شاغل
تفكيرنا هو فرح أسر وشذا، حتى حبيتي مشغول عني
وطالعة نازله خارجه داخله تجهز للفرح..

لكن قبل الفرحة بأسبوع حصلت مشكلة كبيرة طلب حسام
مني يقابل إسرائ في النادي وأنا وافقت عادي، وهما قاعدين
مع بعض شففتهم مروة وطبعاً بسرعة أتصلت باما وقالت
لها، وماما غضبت واتعصبت وبمجرد رجوع إسرائ، كلمتها
ماما بغضب:

- أخيراً رجعتي يا هانم.

- في أيه يا ماما، أنا كنت في النادي.

- في النادي، ومع مين أن شاء الله؟

- مع أصحابي في الكلية.

- صحابك ولا صاحبك المعيد.

- ماما، الموضوع أن، حسام بيحبني وأنا كمان بحبه.

من شدة غضبها ضربتها بالألم:

- أخرسي، ولا كلمه، ومن النهاردة لا في كليه ولا في نادي،

فهمتني.

هربت إسرائ علي غرفتها وهي بتبكي وراحت وراها شذا،
طبعاً هينار مش ممكن تسكت فأتصلت بيه وأنا كنت في
اجتماع، وأول لما الموبايل رن ولمحت اسمها، وقفت الاجتماع
وردت عليها، فشرحت لي الي حصل وأن ماما ضربت إسرائ

وهي بتبكي دلوقت، فخلصت معاها المكالمه ولغيت الاجتماع وخرجت جري، ولما وصلت البيت لقيت ماما بتتكلم مع جدي وبابا عن الي حصل، وأول لما لمحني جدي استغرب: - أحمد، مش معادك، أنت تعبان، حاسس بحاجه، رديا حبيبي فيك أيه.

- هموت، من تصرفاتكم، لازم تعرفوا، الي قبلته علي نفسي مش هقبله علي حد من أخواتي، ومش هسمح لحد يكسر قلب إسرائيل.

كلامي خلي جدي في حيرة وغضب:

- تقصد أنك عارف بموضوع إسرائيل.

- طبعاً عارف، هي صارحتني وأنا أتكلمت معاه، حسام شاب طموح وبيحبها، وهو محاسب عندنا في الشركة، وأنا موافق عليه.

ردت ماما بغضب وعينها كلها شرار:

- موافق علي أيه، وتعرف كمان أنها كانت معاه في النادي.

- عارف، حسام أتصل وأستأذن مني وأنا وافقت، جدي حسام بيحبها بجد.

- لا والله، يعني أنت عايز جدك يوافق علي كلامك، ويجوز بنتي لفقير نصر فإحنا عليه، أنت أكيد مجنون، طبعاً ما أنت أتجوزت بدوية.

- ماما لو سمحت، خرجي هينار من الموضوع، وبعدين حسام معيد ومحاسب ويقدر يصرف علي نفسه وعلي إسرائيل،

وبكرا هيبقي دكتور في الجامعة له مكانته في المجتمع، جدي، فكر في مصلحة إسرائيل، الفلوس مش أهم من سعادتها. وبعدين هو الحب الممنوع، والتعليم وطريقة الحياة والشغل أنتم اللي بتحددوها، دي مش عيشة. قربت ماما مني:

- أحنأ بنفكر فيكم، وخائفين عليكم وعازين مصلحةكم.
- لا، أنتم خائفين علي سلطتكم وعلي مصلحةكم، وأنا مش هسمح أن أختي تتعذب ويتكسر قلبها طول ما أنا عايش.
رد بابا:

- الكلام ده سابق لأوانه، إسرائيل لسه في ثانية كليه.
- لا مش ناسي، وهو مستعد يستناها.
وأخيرا كلام جدي كلمات حسم الأمر:
- بدل أنت موافق ومتأكد أنه هيسعد أختك، الموضوع هيكون مسئوليتك، لكن عندي شرط واحد عشان أوافق، أن بعد الجواز، يعيشوا هنا معنا.
- بجد يا جدي، أنت موافق، بالنسبة للشرط أنا هتكلم معاه وهقنعه، ربنا يخليك لينا يا أحلي جد في الدنيا، أيه رأيك بقي لو نخلي خطوبتهم مع فرح أسر وشذا.
صرخت ماما في وشي:

- مستحيل، أنا مش ممكن أوافق.

رد جدي:

- وأنا موافق، بس الأول نتعرف علي أهله.

- هخلي حسام يجيب أهله ويشرفونا بكرة.
البيت كله فرحان، وإسراء رميت نفسها في حضني وفضلت
تبكي، دموع الفرحة طبعاً، وبالنسبة لماما موافقتها أو رفضها
مش هياثر في قرار جدي، وأخيراً قدرت أني أدافع عن سعادة
أخواتي، وبالرغم من سني ونضج عقلي إلا أن عيوني كانت
مغمضة عن أهم شيء في الحياة وهو الحب، كنت مستسلم
وتمتقيد بتحركات العائلة، لكن خلاص العنيدة فتحت عيوني
وكسرت كل الأسوار والحواجز وبدأت أتتنفس هواء الحرية،
دخلت حياتي، وأجبرتني أني أغامر وأثور..

حاجات كثير حصلت، حب أسر وشذا وحب إسراء وحسام،
وبالنسبة لحسام وافق علي شرط جدي، وجيه هو وعائلته
ومت المهمة بنجاح، والكل فرح والحياة بقيت جميلة، لكن
مفيش فايده، ظهرت مشكلة جديدة..

بما أن حبيتي خلاص تم تتويجها، كيوييد الحب، قررت أنها
تدخل مغامرة جديدة، وبما أنها قدرت تساعد شذا وإسراء،
قررت نرمين أنها تغامر وتعترف لهينار بحبها لرءوف
وتطلب منها مساعدتها..

وقبل الفرحة بـ 4 أيام نزلوا البنات يتفسحوا ويشتروا شويه
حاجات، وبعد ساعتين من اللف هينار تعبت وقررت
ترتاح، فقعدت في كافيتريا وقاعدت معاها نرمين أما شذا
وإسراء كملوا اللف، وأنتهزت نرمين الفرصة وقررت تعترف
لهينار عن حبها:

- هينار، ممكن أتكلم معاكي، لكن الكلام ده، سر بينا.
- أكيد طبعاً، شرك في بئر.
- هو بيحبني، أنا متأكدة، لكن ساعات بحس أنه بيبعد، يمكن خائف، المشكلة أي بحبه، ونفسي أنه يتكلم ويقرب مني ويعترف، بس هو متردد.
- فعلاً مشكلة صعبه، خصوصاً أن رءوف كتوم، لكن بيحبك.
- اندهشت نرمين من رد هينار:
- أنتي عرفتي منين أنه رءوف، وعرفتي منين أنه بيحبني.
- من نظرته ليكي، عيونه بتقول أنه بيحبك.
- وأنا كان بحبه، لكن مستحيل أني أقولها الأول، هو المفروض اللي يقولها الأول، بس ده يحصل أزاى.
- هو الموضوع صعب، لكن مش علي هينار، أول حاجه أنتي هتبعدي عنه، وبعدين هيظهر في حياتك عاشق ولهان بيحبك، وطبعاً هييعتلك ورد ورسائل حب عشان يشدك ليه.
- عاشق ولهان، وده هيخليه يعترف ويقول أنه بيحبني.
- أكيد طبعاً، لما يحس أنك هتروحي منه هييعترف، وفي ظرف أيام هيكون ملكك، أنتي بس مثلي الفرح وأنتي بتستلمي الرسائل.
- حاضر، ويارب، يعترف.
- هييعترف، وده وعد مني.
- رجعت إسراء وشذا وكانت نرمين مع هينار والأثنين

يضحكوا، فحسوا أن الموضوع في آن، رجعوا البيت وبدأت نرمين في تنفيذ خطه هينار، بطلت تخترع حجج عشان تتكلم معاه،

ثاني يوم الساعة 7 بالليل، في الوقت الي بيكون فيه رءوف قاعد في الجنينة، ده وقت قرأته للروايات، وصل الورد ومعاه رسالة باسم نرمين فنزلت واستلمتهم وهي فرحانه وبتضحك، وثاني يوم في نفس الوقت وصل الورد والرسالة، ورءوف هيطق ومضايق وعايز يقتلها، وهينار حبيتي بتضحك..

يومين وأنهار رءوف وفي اليوم الثالث الي المفروض آخر يوم قبل ميعاد الفرح، قعد في الجنينة منتظر الشخص الي بيوصل الرسالة والورد، وطبعاً هينار قررت أنها تضرب علي الحديد وهو سخن، فقعدت جنبه وقالت:

- نرمين الأيام ديه مبسوطه خالص، وده كله بسبب الحب، أيه رأيك يا رءوف في الحب.

رد وهو مرتبك:

- الحب معرفش، وبعدين هي تعرفه ولا شافته عشان تجبه. ضحكت:

- مش لازم تشوفه، لكن كفايه أنه يفكر أزاى يعبر لها عن حبه، مش أحسن من شخص بيحب وساكت، لحد ما هتضيع منه.

بدأ يتنهد وهو حزين:

- هي أصلاً أتغيرت، وبقيت معجبه بالولهان، عشان رغاى وبيبعث ورد.

- وأنت لأمتي هتخبي جبك ؟ في ايدك أنك ترجعها وتخليها
تنساه، وترمي الورد وصاحب الورد من حياتها، وتبقي
ملكك أنت وبس.

- أزاي بقي، الموضوع صعب.

- بالعكس، قولها بحبك وبموت فيكي وعاييز أكمل حياتي
معاكي، الكلام ده مش صعب، ولا هي هتنجم وتعرف
لو حدها أنك بتحبتها، عموماً نرمين دقائق وهتكون هنا، أكيد
عشان تستلم الورد والرسالة، لأنها أخيراً حسنت أن في حد
بيحبها ومستعد يجارب عشانها.

- يعني هي بتحبه.

- أكيد لا، بس معجبه بجرأته، لأنه قدر أنه يلمس قلبها،
نرمين وصلت.

كانت جي تجري من بعيد وهي بتضحك وأول لما وصلت
عندهم قالت:

- عاملين آيه، هينار، الورد وصل ولا لسه.

- لا، لسه، طيب أنا هروح أشوف شذا، يمكن محتاجه
حاجه مني.

رءوف كان غضبان جداً:

- للدرجه، ومهتمة بقي بالورد، ولا بصاحب الورد.

- في آيه يارءوف، واحد بيحبني أقوله لا.

- وأنا، أنا..

سكت وهو ييحاول أنه يستجمع قوته، قربت منه وهي

بتبتسم:

- أنت أيه..
- بص لها وبصوت متقطع:
- أنا، أنا بحبك وبموت فيكي وعاييز أكمل حياتي معاكي،
بحبك ومش هسمح لحد أنه يقرب منك، أنتي فاهمه.
قالتها وهي بتضحك:
- أخيراً، أخيراً أبو الهول نطق.
- أبو الهول..
- أيوة أبو الهول، وأنا كمان بحبك، ومش ممكن أكون
لغيرك.
- قرب منها أكثر:
- والولهان، هتنسيه.
- والله مش عارفه، بس صعب أنساه.
- صعب، يعني أيه، هنتجوز وهتفكري في واحد ثاني.
- لا، هنتجوز، وهي هتكون السبب.
- اندهش من كلامها:
- هي، هي مين، أنا بتكلم عن الولهان.
- ما أنا عارفه، أصل الولهان ده بيقى هينار، الولهان كانت
فكرتها.
- قصدك، أن الولهان، شخص وهمي، وأن هينار عارفه، ده
أصلاً فكرتها.
- أيوة، أيه، هترجع في كلامك.
- أرجع في أيه، أنا بعشقتك.

ومسكها وشدها لحضنه وضمها وهما يضحكوا..
وبدأت قصه حبهم بسببها وأنضح لي أني فعلاً عايش مع
كيوبيد شخصياً، معقول تقدر تخلي الحب يسكن بيت
البنداري ...

وفي نفس اليوم رجع الغائب، حسين، الي بعد المشكله اللي
أتسبب فيها وموضوع مرضي، شعر بالمسئوليه فهرب بعيد
وأخيراً رجع، ودخل البيت وفجأة لمحها، الشنطة وقعت
من ايده وثبت مكانه، ولمحه أسر فضحك وجري عليه:
- حسين، أخيراً رجعت، حمد الله علي سلامتك، فرحي كان

هيقي ناقص من غيرك، وحشتني.

- فرحك، معقول، ومين سعيدة الحظ.

- شخص أنت عارفه وبتحبه، أختك شذا.

- شذا، وكنتم هتتزوجوا وأنا مش موجود.

جاء رءوف وأخذه بالحضن:

- ونعملك أيه، ما أنت أختفيت، الفرحة بكرا وكم ان خطوبه

إسراء علي حسام معيد في الجامعة عندها، وقريب هيكون

فرحي علي نرمين.

وقف حسين وهو مندهش:

- معقول، أختفي كام شهر عن البيت يتغير، صح هي مين

الي دخلت المطبخ دلوقت؟!!

وبمجرد ما شذا عرفت، وصلت بتنهج من كثر الجري

واترمت في حضنه وفضلت تبكي:

- حسين حبيبي، أنت هنا، الحمد لله أنك رجعت، فرحتي
كملت برجوعك.

مسح دموع أخته.

- مبروك، يا أرق أخت في الدنيا، هو اللي دخلت المطبخ
دلوقت تبقي مين.

وضع أسر ايده علي كتف حسين:

- دى هينار.

- هينار، هينار مين.

قالت شذا وهي ماسكه في ذراعه:

- دى الشمس اللي نورت بيتنا، عروسة أحمد.

- هو أحمد أتجوز، بس شكلها..

قطعت كلامه:

- الموضوع كله غريب، حصل لما كنا في العريش، تخيل
ينقذها فتساعده ويتجوزها بدون مقدمات، لما بفتكر شكلها
أول مرة جسمي بيقشعر، كنا بنقول عليها الكتلة السوداء.
رد حسين:

- الكتله السوداء.

- أيوة، أصلها بدوية وكانت ملثمه، كتلة سوده.

كان متردد، بس هو عارفها، معقول تكون شبهها:

- بدويه، واسمها، هينار.

شد أسر حسين:

- حسين، مالك، أنا عارف الموضوع غريب، لكن حصل.

- خرج جدي من المكتب لقي حسين قدامه ففرح :
- حسين، أنت رجعت أخيراً، تعالي في حضني يا ولد.
- وحشتني يا جدي، ووحشتوني كلكم.
- ولما رجعت من الشركة عرفت أن حسين رجع، وبسرعة طلعت وخطبت علي بابا غرفته وقولت:
- ممكن أدخل، ولا.
- طبعاً تدخل، وحشتني، كنت خائف، أنك تكون لسه زعلان مني.
- قربت منه وأخذته في حضني:
- أزعل منك، يوم، أثنين، لكن علي طول لا، أنت ابن عمي وأخويا، أحنا عائلة واحدة.
- ضممني وهو بيكي:
- أنت أخويا الكبير يا أحمد، أرجوك سامحني.
- الموضوع أنتهي، والمهم دلوقت أن الشركة محتاجك، أنا محتاجك، أنا تعبت من الشغل لوحدي، ومن بكر اهتنزل معايا الشركة.
- بدأ يمسخ دموعه ويضحك:
- حاضر يا أحلي أخ في الدنيا، صح مبروك، عرفت أنك أتجوزت.
- الله يبارك فيك وعقبالك، نسييني ميعاد الغذاء، كده هنضرب.
- خرجنا وأتجمعت العائلة كلها علي السفرة من مدة طويلة

وأكلنا سوا، واللي يقول نكته واللي يهزر مع الثاني، فضلنا طول القاعدة نضحك، خلاص بكر الفرح..
خلصنا أكل ودخلت ارتاح شويا، طول الأيام اللي فاتت وهي مشغوله وبتلف، أكيد تعبت وأنا خائف عليها، شدتها ليه وقولت:

- وبعدين ارتاحي شويا، ولا عايزة ابني يعمل ثورة.
- ثورة، علي مين؟ الفرح خلاص بكر، الفرح يخلص، وهرتاح علي طول.
- هنشوف، طيب مش ممكن حاجه كده ولا كده.
فضحكت وجريت علي الباب وقبل ما تخرج غمزت لي وبعثلي بوسة:

- نبقي نكمل بالليل.
اليوم خلص، ولما دخلت لاقيتها نائمة علي الكرسي واللاب مفتوح، شيلتها وبكل رقة وهدوء حطتها علي السرير ونمت جنبها وأخذتها في حضني،
صحيت لقيت الساعة سته وحببتي مش جنبني، كانت واقفة قدام المرايا بتسرح شعرها، فحسيت بالغيرة:

- حببتي، أنت هتخرجي.
- من هنا أكيد، لكن من البيت لا، النهاردة الفرح.
- ما أنا عارف، أن النهاردة الفرح، ممكن ثواني، عايز أتكلم معاكي.
- أحمد، كفاية دلع، في حاجات كثير لازم أخلصها، نتقابل بالليل في الفرح.

- دلح، طيب.

خرجت والمفروض أني أسكت وأصبر، بس لحد الفرح، بعد كده مش هسكت، ولو فكرت تنشغل عني ثاني هعمل ثورة، فطرت ومشيت علي الشركة الحاجه الي بفهم فيها.. أما في البيت فكانت الأمور بتتطور، متعهد الأفراح الي أتفقت معاه ماما أختفي، بتتصل بيه مش بيرد، وطبعاً هينار كان عندها الحل متعهد هينفذ كل الي عايزاه شذا وهو المطلوب، وماما غضبت لكن مفيش حاجه في ايدها تعملها..

رجعت من الشركة وساعات والحفله هتبدأ، وطبعاً كنت مطرود من غرفتي لأن البنات قرروا أنها تكون غرفة تجهيز العروسة، وده لأن ماما مش ممكن تدخلها بسبب هينار، بدأت الحفله والناس وصلوا، خرجت للترحيب بيهم ووصل حسام وعائلته والكل حضر مش فاضل غير العروستين يخرجوا، وفجأة الموسيقى أشتغلت وأول عروسة المفروض هتوصل وهتكون إسراء، وقف حسام مستعد وأنا لقيت هينار بتشاور ليه، وطلبت مني أن أنا الي أوصل العروسة لعريستها وفعلاً مسكت إسراء ومشينا سوا لحد حسام وسلمتها له كانت بتشبه الأميرات في القصص الخياليه، وبعدين رجعت وأخذت شذا وهنا كانت الضربه القاضية لماما وطبعاً غضبت جدا، الفستان أتغير، هينار حبيتي غيرته بفستان يجنن كل الناس وقفوا مذهولين من

روعته، ومسكت ايديها ومشينا خطوة خطوة والكل منبهر لحد ما وصلنا لأسر وسلمتها له في ايده، وأول لما مسك ايدها بسها..

وصل المأذون وتم كتب الكتاب وطلبت الفرقة منهم يرقصوا سوا وبدأت الأغنية وقبل أي أحد، شدتها لساحه الرقص وبدأت أرقص معها..

وطبعاً رقص أسر مع شذا، وحسام مع إسرائ، ورءوف مع نرمين، وأتشجع حسين وطلب الرقص من مروة ووافقت، كانت لحظات جميلة اشتركنا فيها كلنا،

الحفله أنتهت وأخذ أسر شذا لشهر العسل في الغردقة، في نفس المكان ونفس الجناح، غيرة طبعاً، كلنا كنا مرهقين، ودخلنا غرفتنا وقبل ما أتكلم معاها، كانت عيونها بتغمض من كثر التعب، شيلتها وعلي السريير حطيتها بحنيه:

- حبيبي، لازم أغير الأول، قبل ما أنام.

- سيبي الموضوع عليه، أنا هتصرف، الموضوع تحت السيطرة، هفتح السوسته، وأشد الفستان، والمهمه أنتهت.

ضحكت بصوت خافت مرهق:

- طيب، تصبح علي خير.

- وأنتي من أهل الخير، يا روح قلبي.

وطبعاً أتصرفت، وبعد ما المهمه أنتهت غيرت أنا كمان ونمت جنبها بس بعد ما أخذتها في حضني، لما صحيت كانت لسه نائمة، فتحركت بحذر لحد ما خرجت وفطرت

مع العائلة، ولما أتكلمت مع حسين عن الشغل طلب مني أنه يرتاح النهاردة وبكرا هيروح معايا علي الشغل.. وبعد ساعات صحيت هينار، واكتشفت أني مش موجود فرنت عليه، فقولتلها أني محبتش اصحيحها واتعبها، وطلبت منها ترتاح وقفلت معاها، ولأن حبييتي جعانه فقامت تأكل وترجع تنام، وبعد ما عملت طبق حلو كده وكله أكل، وهي رجعة لغرفتنا لمحت حسين قاعد في التراس، كان شارد وحزين، علي ما أعتقد أن هو ده الوقت المناسب لظهور حب جديد، فقررت هينار تضايقه، قربت منه وقاعدت قصاده وقالت:

- واضح أنها تستاهل، أقصد أنها محظوظه لأنها قدرت تسرق قلبك وعقلك.

رد بغضب:

- أيه الكلام الفارغ ده، أنا قلبي وعقلي ملكي.

- مسكينة، مروة.

نط من الكرسي ووقف:

- مروة، حصلها حاجه، أتكلمي.

فضحكت:

- لا، لكن هيحصل، والشخص الوحيد اللي يحبها بجهد، مش عايز يعترف.

قعد ثاني وقال بيأس:

- ولو أعترف، هي مستحيل تفكر فيه وتجه.

- مين قال؟! لو بيحبها بجد، هتحس بيه وهتجبه.
- يريت، سنين وهي مش حاسه، وللأسف بتفكر في شخص
ثاني .

فقال بثقة:

- مش يمكن لأنها مش عارفه بحبك، وهتعرف أزاي من
غير ما تقولها، لو بس تعرف أزاي توصلها قد أيه أنت
بتحبها، هتكون ملكك وحييتك، عموماً أنا عندي فكرة
سهلة وبسيطة ومضمونة بس اللي يسمع..

قطع كلامها بلهفه:

- يسمع أيه.

- لو عايزها تحبك، لازم تفهمها، مروة رومانسية وبتحب
الورد والهدايا والشيافة والشخص الثقيل الجاد، واللي كلمته
واحدة، واللي يجبهها بشغف وبعنون، مش الشخص المهزوز.
- ده أنا، أقصد أنا بحبها، لكن الصفات دي ممكن تكون
مش فيه، بس أنا مستعد أتعلم، قولي أعمل أيه، وأنا هنفذ.
- تجري تقطف وردة حمراء، وأول لما تشوفها قدمها لها وقولها
،أن رقصها امبارح كان هائل، وأنك استمتعت بكل دقيقة
فيه، وسعيد لأنها وفقت وشاركتك الرقص، واسألها اللون
الأحمر حلو ولا بتحب لون غيره.

- تمام، وبعدين، أعمل أيه.

- ولا حاجه، تسيبها وتمشي وهي هتفرح بالوردة وبكلامك،
وهتفضل تفكر فيه، وبكرا تقدم لها هديه تليق بيها، طقم

شيك وتقولها أنك لمحت الطقم ده، وحسيت أنه مصنوع ليها هي وبس، وأنك هتكون سعيد لو قبلته منك. ابتسم والسعادة في عينيه:
- تمام، وبعد كده.

- كام يوم وأطلب منها تختار لك كام حاجه لأنك بتثق في ذوقها جداً، وبعد كام يوم وفي الجزء البعيد هناك، اشترى ورد ونظمه في كل الأماكن وأطلب منها تقابلك هناك، ولما توصل، تكون أنت في انتظارها، وأول لما تقرب منك أنزل علي ركبتيك وأطلب منها أنها تقضي باقي عمرها معاك.
- طيب، لو رفضت، أعمل أيه.
- مش هترفض، لأنها مش هتلاقي حد يجبها بالشكل ده، غيرك.

نط من الكرسي وجري:

- طيب سلام بقي، أروح أنفذ.
فضلت هينار تضحك علي تصرفه، أما حسين جري لتنفيذ الخطة وكان كله حماس وفعلاً شعر بسعادة مروءة في كل مرة كان بيتقرب فيها منها، لحد ما قرر أنه ينفذ الجزء الأخير وجهاز الورد وطلب من مروءة أنها تيجي تقابله، وأول لما وصلت ضحكت وهو راح نازل علي ركبته وطلب منها الجواز، وبرغم خوفه من ردها إلا أنها وبكل سعادة وهي بتضحك قالت له أنها موافقه، وقف ورفعها وفضل يلف بيها وهي بتضحك، وبسبب صوتهم العالي سمعتهم

من المكتب، ولما شوفت فرحتهم فرحت أنا كمان ، أخيرا
أكملت فرحتي، وحب جديد ظهر ولمع في الفضاء، والبيت
بقي كله حب وعشق وسعادة وفرح...
العنيدة حولت البيت لجنة، مجنونة بس بحبها...

لا يوجد شروق إلا ويأتي معه الغروب...

ما أنا إلا من الحالمين المبتدئين
ولا أعلم هل أستطيع المحاربة وحدي؟!
أم سأسقط فريسة للواقع المكار
أم هذا العمر القصير سينتهي بنهاية النهار
لا أزال منتظراً قدوم الليل
ولكن أخاف أن يستمر الجسد بعد فناء الروح

حسيت أمي بتهديد كبير لكيانها وكيان العائلة من هينار المتطفله اللي أقتحمت حياتنا من الصحراء، فطلبت من مروة أنها تحصلها علي غرفتها، وقت التنفيذ:

- مروة، روعي لأقرب صيدليه واطلبي من الدكتور الدواء الموجود في الورقة، وبسرعة، الطفل ده لازم ينزل حالاً.

- لكن ممكن يحصل الإجهاض، وأحمد يرفض يطلقها.

- لا، هيطلقها.

- حاضر، ساعة والدواء هيكون عندك.

خرجت مروة وهي مرعوبه أن حد يشوفها، وفعلاً أشرت الدواء ووصلت للبيت وهي حطاه جوا الشنطه ومسكاها في ايديها كويس، ولسه هتدخل مسك ايديها حسين وشدها ليه، فوقعت الشنطه وافتحت وخرج منها الدواء، فسيبها حسين ونزل يللم اللي وقع، ومن غير ما يقصد شد انتباه الدواء فقرأ اسمه والمكتوب تحت الاسم فاستغرب وغضب:

- دواء إجهاض، لمين الدواء ده؟!!

- الدواء ده ل، عمتي مديحه، طلبته مني.

- مروة، طلبته منك ليه، أتكلمي.

كانت نظراتها كلها خوف وقلق:

- لهينار، عمتي مش عايز الحمل يستمر أكثر من كده.

بعد عنها وهو حزين:

- معقول، وأنتي عايزة تشتركي معاها في الجريمة ديه، كنت فاكر أنك، نسيتي أحمد وبتحيني أنا، بس شكلي كنت غلطان.

قربت منه وهي بتبكي وشدته ليها:
- لا، أنا فعلاً نسيته، أنا بحبك أنت، لكن هي طلبت مني
اجيب الدواء، وأنا خفت أرفض فتزعل مني وتحرمني منك،
أنت عارفها، ممكن تقف في موضوعنا.
- فعلاً عمتي ممكن تقف في موضوعنا، بس أنا كنت حزين
ووحيد، وأنتي كمان كنتي وحيدة، وده لأنني كنت خائف
ومش عارف أعبر لك عن حبي، لكن هي ساعدتني،
وعرفتني أزاى أكسبك، وأنتي عايزة تدمر حياتها.
كلامه خلها مذهولة:

- أنت بتقول آيه، هينار هي السبب في سعادتي وقربك مني،
وأنا كنت عايزة ،
قطع كلامها:

- أيوة، هي اللي أقعتني، أني أعترف لك بحبي، فهمتني
أنك رومانسية وطيبة وتستاهلي حبي ليكي، حبي ليكي اللي
دفتته جوايا سنين، وأنا شايفك مصممه علي أحمد، وأنتي
عايزة تدمري حياتها، مروة، يكون في معلومك لو أشرتكتي
في تدميرها أنسي حبي، فاهمة، لأنني مش ممكن أحب مجرمه.
رميت نفسها في حضنه وقالت:

- متقولش كده، أنا كانت مهمتي أني أشتري الدواء، لكن
خلاص، الدواء معاك ارميه وسامحني، أنا عارفه أني غيبه،
لكن بحبك ومش عايزة أخسر.
ضحك حسين وضمها بقوة:

- بجد، يعني هتساعديني نساعد هينار ونحميها من عمتي .
- أكيد، المهم أنك تفضل معايا.
- طيب تعالي، لازم نتكلم مع الشباب ونعرفهم مخطط عمتي، الكل لازم يتعاون لحمايتها، زي ما هي فهمتنا أزاى نعيش .
- أتصل حسين بإسراء ونرمين ورءوف وطلب منهم يتجمعوا برا البيت، وفعلاً في خلال ساعة كانوا مع بعض في كافتيريا وهناك أتكلم معاهم حسين عن مخطط ماما لتدمير هينار، وبعد ما الكل فهم الوضع قال حسين:
- عمتي مش سهله، النهاردة طلبت من مروة، بكراممكن تطلب من حد ثاني، أو ممكن تشتريه هي بنفسها.
- رءوف كان مصدوم:
- فعلاً، بدل فكرت في الموضوع نفسه، يبقى ممكن تعمل أي حاجة .
- مسكت نرمين برءوف:
- طيب والعمل، هنسيبها تأذي هينار، بعد كل اللي عملته عشانا.
- لا، والحل بسيط، الموجود في البيت يراقب هينار في أكلها وشرها.
- قالت مروة وهي خائفه:
- بس في طرق ثانيه، ممكن عمتي تفكر فيها، هي مش هتغلب .
- مسكها حسين، وهو بيحاول يطمئنها:

- لا، عمتي ذكيه، مستحيل تلجأ لطرق تكشفها.

إسراء كانت مذهولة وبتبكي:

- معقول، ماما تفكر في كده، لكن ليه، هينار وقفت معنا
كلنا وساعدتنا، وأحمد سعيد ومبسوط وصحته بتتحسن
بسببها.

كلام رءوف نهي الاجتماع:

- لكن وجودها وكل اللي بتقوم بيه، ضد رغبة ماما، أحنا
نراقب هينار وماما، وده كل اللي نقدر عليه، ودلوقت إحنا
ننهي الاجتماع ده، وكل واحد ينسق مع الثاني، مش عايزين
حد يعرف بالموضوع، وخصوصاً أحمد.

كان البيت ناقصه أسر وشذا اللي كانوا مش عارفين اللي
بيحصل، كان فاضل أسبوعين ويشرفوا، كنت سعيد والحياة
جميلة، لكن كان لازم لسعادتي أنها تنتهي وحياتي تدمر
والأرض الصلبة اللي واقف عليها تتشقق وأقع..

صحيت من النوم مفزوع والدموع بتملأ عينيه، كابوس
فظيع حسيت أني بنهار، مرعوب وخائف، أخذتني في حضنها
وفضلت تهديني، لكن الكابوس كان مخيف جداً، ضمتها
جامد كنت هموت من الرعب، وأفتكرت لما حلمت قبل
كده، الحلم اللي دمر حياتي وبعدها عني، لا مش هسمح
أن حد يبعدها عني ثاني، حاولت أنها تعرف مني أيه اللي
شوفته لكن كان صعب أقولها، أقولها أيه أي كنت واقف
عاجز والنار حوليها وهي وبتصرخ وأنا واقف عاجز مش

عارف أعمل حاجه، النار سرقت كل حاجه حلوة ودمرتني، فضلت تمسح في دموعي لحد ما هديت وقمت بالعافيه وخرجنا، قعدت علي السفرة وهي راحت تساعد دادة رحمة، كنت شارد وبفكر في الكابوس، وأيه هو الخطر الي ممكن يكون يقرب منها، وفجأة سمعت صوت دادة رحمة وهي بتصرخ:

- هينار، الحقوني..

جريت بسرعة لقيتها وقعه علي الأرض ومغمي عليها، حاولت اخليها تفتح عنيتها لكنها مصحيتش، حلمي بيتحقق وهي بتضيع مني وهرجع وحيد، لا مش هيحصل، شيلتها لغرفتنا وحطتها علي السرير وأنا بحاول معاها:

- هينار ردي، عمي ماهر، أرجوك خليها ترد عليه.

- أهدي يا أحمد، ممكن الحمل يكون السبب، أن شاء الله خير.

مسك ايديها وبدأ يسمع النبض وأخذت من إسراء برفان وحطيته علي ايدي وقربتها منها فبدأت تتحرك وهي بتتألم، أخيراً فتحت عنيتها..

رميت رأسي علي صدرها وايدي حوطتها وفضلت أبكي كانت بتتنفس بصعوبه، حبيتي وروحي بتتألم، أتمسكت وقالت:

- أحمد، أهدي، أنا بخير، أهدي

- أهدي، أنا مرعوب، هينار، أنتي كويسه، أيه الي بيوجعك.

- عمي حاول أنه يهديني:
- أطمئن، هي بخير، خليها ترتاح ساعتين، وأشوفها في المستشفى، نعمل فحوصات ونظمن عليها، وعلي الجنين. مش عارف ليه مش مصدق أنها كويسه، لكن لازم أصدق، وإلا هموت من قلقي:
- المستشفى، تمام، ساعتين وهنكون هناك.
- غمضت عينيها ونامت وفضلت جنبها، كنت بفكر في الحلم وأزاي أنساه، مرت ثلاث ساعات وهي نائمة وفجأة رن موبايلي، كان عمي بيظمن ويسأل أتأخرنا ليه، فعرفته أنها لسه نائمه، فطلب مني أصحيتها ضروري، فخلصت معاه وقربت منها وبدأت أملس علي شعرها، فبدأت تتحرك، فقولت بصوت هادي:
- حبيتي، ممكن تسمحي لحبيك أنه يشوف أحلي عيون وأحلي ابتسامة.
- حبيتك، عايزة تنام، لأنها تعبانه.
- نروح المستشفى وبعد كده، هتنامي في حضني، ومش هقلقك ثاني.
- فتحت عينيها وكانت مش قادرة:
- نروح بكرأ.
- مسكتها وبدأت أساعدها تقوم:
- لا، وحياتي عندك، خليها النهاردة، وأنا هساعذك.

شدتها براحه وساعتها تلبس وأخذتها للمستشفى وهناك
فضلت منتظر برا، لحد ما خرج عمي وهو مرتبك، وقفت
وقربت منه:

- عمي، هينار، فيها حاجه، في مشكلة، صح.
- أنا أسف يا أحمد، الحل الوحيد هو الإجهاض، قلبها
يضعف بسبب الحمل، والمشكلة أنها حامل في توأم، أنا
أسف.

رجلي بدأت تخوني، مش قادر أقف:
- الإجهاض، ولادنا، مش مهم، المهم هي هتكون بخير،
هي الأهم عندي.

- حاله قلبها ممكن تدهور، لازم نقرر وبسرعه.
مسحت دموعي ودخلت أتكلم معاها لقيتها قاعدة وبتبكي
وماسكه بطنها، ولادنا الي حلمنا بيهم، نزلت علي ركبتي
وحطيت ايدي علي ايديها، مش قادر أكتم دموعي وحزني،
فدخل عمي علينا وقال:

- أحمد، أحنا ممكن نبدأ دلوقت، كل لما سرعنا كان أحسن..
وبصوت عالي قطعت كلامه:

- مستحيل يحصل، لا دلوقت ولا بعدين، أنا مش ممكن أقتل
ولادي.

- هينار، حبييتي، حياتك أهم عندي.
- لا يا أحمد، مستحيل، أنا مش هقتل ولادي.

قرب عمي وحاول يقنعها:

- أنتي كده بتنقذي نفسك، كل ما كبر حجم الجنين المشكلة هتزيد، وقلبك مش هيستحمل، الإجهاض هو الحل.
مسكت ايديها وحاولت أني أفهمها:
- أرجوكي، وافقي، أنا هموت من غيرك.
- لو بتحبني هتعيش، ترعاهم وتربيهم، ولادنا هما الأمل، هما المستقبل.
- أنا ممكن أعيش من غيرهم، لكن من غيرك صعب.
وقفت وراحت للباب وهي بتبكي:
- أنا تعبانة، وعازية أرجع البيت.
ده أكيد امتحان، لكن امتحان صعب ومش ممكن أنجح فيه، فكرة حرمانني منها صعب أني أتحملها، كفاية المرة اللي فاتت وحرمانني منها، أنا مصدقت لقيتها، أخذتها في حضني وضميتها وخرجنا وطول الطريق وهي ساكته، ولما وصلنا لبيت سييتني ودخلت لغرفتنا بسرعه، أنا رميت نفسي علي الكرسي وفضلت أبكي لدرجة أن الدنيا غيمت حوله من كثر الدموع، قربوا كلهم مني كانوا عايزين يعرفوا أيه اللي حصل، حط جدي ايده علي كتفي:
- أحمد، أحمد، في أيه يا حبيبي، مالك.
حاول بابا يفهم مني اللي حصل:
- أحمد، يا ابني، عمك قال حاجه، تخليك حزين كده!
كنت بأخذ نفسي بالعافيه، وحاولت أني أتكلم:
- أنا هموت من غيرها، هي مش فاهمه، لو راحت مني هموت.

قرب حسين مني:

- أحمد، هينار مش ممكن تسيبك، أكيد في حاجه غلط.

قربت إسرائ وهى بتبكي علي حالي:

- مش ممكن، هينار تعمل كده، هينار بتحبك.

أخذني جدي في حضنه:

- أصبروا، أهدي يا حبيبي، أتكلم في أيه.

ضمته بقوة وأنا بنهار وكل جزء في جسمي بيتهز:

- أنا ممكن أعيش من غير ما أكون أب، لكن مش ممكن

أعيش من غيرها، أنا عايزها هي، الإجهاض هو الحل يا

جدي، حد يقول لها، أني محتاجها هي، أنا مش عايز ولاد،

مش عايز أكون أب.

كان صوت ماما أشبه بالنار اللي كانت بدمر حياتي:

- وفين المشكلة؟ أحسن أنها تموت، الطفل أهم طبعاً.

سيبت جدي ووقفت:

- أنتي عايزاها تسييني ليه، لأنها مش قد المقام، ومش

مناسبه في نظرك، بعد كل اللي عملته للعائلة، عايزاها تموت

وتسبني، لا، أنا بحبها ولو بعدت عني هموت، كفايه بعد

بقي، كفايه.

فجأة حضنتني من ظهري، فلفيت وحضتها وابتسمت

ولعبت في شعري:

- أهدي، أنا موجودة معاك، وصعب أبعد عنك، أنت

حياتي.

حسيت بالفرح ولو للحظه:

- بجد، وافقتي علي الإجهاض.

كانت بتبكي برغم أنها كانت بتمسح دموعي:

- لا، أنا عايزاك تفهمني، أنا من يوم ما عرفتك وحببتك

بقيت ملكك وكنت معاك حتى لو كان جسمي بعيد عنك،

عمري ما سبتك، لأن روحي كانت معاك، أحمد، كلنا

هنموت، المهم أنك تفضل جوا الناس الي بتحبهم ويحبوك،

والطفلين هيكونوا شكلك لكن هياخذوا جنوني وحببي ليك،

لو مكتوب أي أموت حتى لو الحمل أنتهي، هموت،

صرخت بكل قوتي:

- مش عايزهم، فاهمه، مش عايزهم.

- حبيبي أنا، حس..

أخذت ايدي وحطتها علي بطنها كانوا بيتحركوا، وكملت

كلامها:

- دول ولادك، حس بيهم بيلعبوا، فرحين بالدنيا، عايزني

أموتهم أزي، أنا محتاجه وجودك جنبي أنا تعبانه، محتاج

أنك تقويني، ولا هتخلي عني.

أخذتها في حضني وضممتها لصدري بقوة وأنا بتألم:

- مش ممكن أتخلي عنك، بس أنا بحبك ومستحيل أتخيل

أنك تروحي مني ثاني، لكن هفضل معاكي، بس أرجوكي

أنتي كمان لازم تقاومي.

- طول ما أنت جنبي، أوعدك أني أقاوم، لأخر نفس.
ضمتها لصدري، كنت خائف تروح مني، بقيت خائف أن
الوقت يمر واتحرم منها، ونوصل ليوم نفترق فيه وتروح
مني..

وبالرغم أن ده الواقع وكلنا هيجي يوم ونسيب العالم ده
لعالم ثاني، لكن فراق الناس اللي بنحبهم بيقتلنا، وبتتحول
سعادتنا لسراب، وضحكنا لفراغ، بنبقي هيكل، جسم فارغ
من غير روح..

كانت الأيام بتمر وأنا بحاول أتماسك قدامها وقلبي جوايا
بينهار، المشكلة أن الوقت بيعند معانا لما نكون مش عايزينه
يجري ويجري، ويمر بسرعه، شهور عدة وبقيت في شهرها
السابع وكانت بصعوبة بتقدر تقوم، كنت بشلها وأخرجها
تقعد معاهم وفي يوم وإحنا بنفطر مع العائلة، لقيتها
بتضحك وبكل تفاؤل قالت:

- عارفين أحنا محتاجين أيه، محتاجين فرح يكسر الصمت
والهدوء اللي عايشينه.

رديت وأنا منكسر:

- فرح، وهو فين الفرحة.

ضحكت ضحكة هادئة:

- فرح رءوف ونرمين، وحسين ومروة، فرح ممكن يتم في
العائلة قبل ما..

قطعت كلامها بغضب:

- هينار، أنتي هتكوني بخير، فاهمه.
صوت حسين كان كله حزن وهو يقول:
- هيحصل، لكن لما تقومي بالسلامة، أن شاء الله.
ابتسمت وهي بتقول:
- لا، مش هقبل بالتأخير، جدي، أرجوك حدد الفرحة، فرح
يسعدنا كلنا، والبيت يرجع له الضحك من جديد، أرجوك.
وهي بتتكلم دموعها هربت من عيونها، حاول جدي أنه
يتماسك ورد عليها:
- أنا موافق، أول خميس في الشهر الجديد، هيكون فرحهم.
ضحكت ماما بسخريه:
- وليه نستعجل، مش يمكن حد يغير رأيه.
صوت مروة كان زى الصاعقه اللي هدمت أحلام ماما:
- نرمين بتحب رءوف وهو كمان، وأنا بحب حسين وهو
بيحبني.
ضحكت هينار ضحكة كلها ألم:
- يبقي خير البر عاجله، عايزة أفرح وأشوفكم في الكوشة.
خلصنا فطار ودخلتها ترتاح وروحت علي الشغل، دخلت
المكتب وطلبت من سوزان أنها تلغي أي مقابلات أو
اجتماعات لأني تعبان ومش قادر، خلاص مش قادر أستمر
في أن أكذب عليها وعلي نفسي أني مستمتع بعذابها، يريت
أقدر أهرب من الواقع وأعيش معاها في عالم ثاني، عالم
نفضل فيه سوا من غير ما حد يفرقنا..

رجعت للبيت لقيتها نائمه، قعدت جنبها وبدأت أتأمل وشها البرئ ومن غير ما أقصد دموعي نزلت عليها، معقول أقدر أعيش من غيرها، صوتها فوقني من أحزاني: - أحمد، أنت فاتح توكيل مع البحر، أصل دموعك مش بتخلص، أنت عارف أنك وحشتني قوي، تعالي بسرعة في حضني، وإلا هزعل منك.

رميت نفسي في حضنها وسييت روعي ليها، كنت بتنفس بصعوبه، قلبي كان بيوجعني لكن كنت بخبي عليها، وبصوت متقطع كله ألم: - بحبك، بحبك يا مجنونة، بحبك قوي.

وفضلت ماسك فيها، وهي بتحاول تهديني لكن أزاى، أنا هموت من حزني عليها، حبيتي بتذبل وتضعف، وألها ييموتني، وأنا عاجز مش عارف أعمل حاجه..

وبدأت التحضيرات للفرح، وكانت مروة ونرمين كل ما يعملوا حاجه أو يختاروا أي حاجه يجروا يقولوا لهينار، كانوا بيحولوا يسعدوها، كانت بتتألم وساعات بيبقي صعب عليها تنام من كثر الألم، فكنت بقعد وأخذها في حضني من ظهرها وأنا رافع جسمها كأنها قاعدة بس مريحه عليه عشان تقدر تنام..

ووصلنا ليوم الفرح، كانت الألوان والأنوار بتملأ البيت، لكن الحزن هو اللي كان مسيطر علي البيت كله، مروة ونرمين قعدوا مع هينار في غرفتنا عشان مجهزوا وإسراء

وشذا ساعدوا هينار تلبس، بدأت الحفلة والناس بدأت تظهر والموسيقى كانت هادئة، وفجأة لقيت إسرائ قدامي وبتطلب مني أروح لهينار وأنها عايزني، فجريت خفت تكون تعبت، المجنونة، كانت هتموتني من الرعب، قال أيه عايزني أوصل مروة ونرمين لحسين ورءوف زى ما عملت مع إسرائ وشذا، بس كان ليه شرط، وهو أنها تسمح لي أخرجها هي الأول، فوافقت وشيلتها وخرجت بيها والناس كلها كانت مذهولة، وبعد ما قاعدتها، دخلت وخرجت وفي ايدي نرمين وفضلت ماسك ايديها لحد ما سلمتها لرءوف، ودخلت ثاني وخرجت مع مروة وسلمتها لحسين..

كانت الحفلة أشبه بالعزاء، الكل ساكت بيسمع الأغاني لكن من غير أحساس، وفجأة وبدون أي مقدمات ضحكت بصوت عالي، المجنونة، فضلت تضحك، ضحكتها ضحكتني والكل بدأ يضحك، وضممتها جامد، وأخيراً أعلنت الفرقة عن آخر رقصة للعرسان والي كانت نفس الأغنية اللي رقصنا عليها يوم فرحنا، نشيد العاشقين، مش قادر أفهم أزاى قدرت تقف لوحدها وبسرعة مدت ايديها وطلبت مني نرقص سوا، وفعلاً مسكتها ورقصنا، وفضلنا نرقص ونرقص وكانت نشيطه وفرحانه وبتضحك، وأنا كنت طائر من الفرحة..

أنتهت الحفلة، هم كانوا رفضوا فكرة شهر العسل لكن هينار صممت وطلبت مني أن أحجز لهم في القرية اللي

قضينا فيها شهر العسل، وبعد ما ودعناهم أخذتها لغرفتنا ترتاح، وبعد ما ساعدتها في تغيير هدومها وغيرت أنا كمان، نمت جنبها وضمتها لصدري ونامت العنيدة، أنا حاولت أني أنام لكن التفكير في اللي ممكن يحصل منعي، كنت خائف وبحاول أشبع منها، لكن مين ممكن يشبع من الناس اللي بيحبهم، مين يقدر يتحمل فكرة الفراق، مين ممكن ينسي الذكريات اللي جمعته بالناس اللي بيحبهم، صعب، أنا مش عارف أزاي ممكن أنساها..

مرت الأيام وبقيت في نص الثامن، كانت سعيدة بحركة الولاد، وبرغم وجعها كانت بتضحك طول الوقت كأنها عايزة تصبرني علي فراقها، هي قدرت تعمل اللي كان صعب عليه أني أعمله، حاربت وفازت باللي بتجبه وعاشت معاه، كثير من الناس وأنا منهم بنستسلم للظروف والعقبات ونتخلي عن حبايبنا، لكن هينار كانت مثال حي لقوة الحب، كان نفسي أفضل جنبها طول الوقت لكن كانت بترفض، صممت أني أروح الشغل وكانت بتشجعني..

الغريبة أنها قدرت تقنعني أني اسببها واروح الشركة ولما كنت برجع كنت بليها منتظر رجوعي بفارغ الصبر وهي مبتسمة، وفي أول يوم في التاسع رجعت لقيتها نائم، استغربت لكن فكرتها ملت من انتظاري فنامت فقررت أصحيتها بحب:

- هينار، حبيبتي، أنتي سمعاني، هينار.

لكنها فضلت مغمضة عينيها، بدأت أصرخ فيها وأحركها لكن فضلت نائمته، كانت بالكاد بتتنفس، فمسكت الموبايل وأتصلت بعمي، كنت حاسس بالضيق والخوف:
- عمى، هينار مغمى عليها، وتنفسها ضعيف، أرجوك تعالى بسرعة .

- أهدي يا أحمد، أنا في الطريق .

وصل ومعاه الأسعاف، وبسرعة أخذناها للمستشفى، وصلنا الأول وباقي العائلة لحقونا، كلهم كانوا عارفين أن دى النهاية، لكن لا، مش هيحصل، هينار هتفضل معايا لأخر يوم في عمري، طيب أزاى أقدر أعيش من غيرها، لو أنا الجسد هي الروح، لو أنا القلب هي النبض، أرجوكي أنا محتاجك، مش عايز أبقى وحيد ثاني..

نهاية الأشياء بدايتها.. لكل نهاية بداية.. فلا
تتعجلوا نهايتكم..

أين أحياء في دنيا لم يعد بها حبيبي ؟
أين يمكنني تنشق هواءً لم يشتعل لفراقه؟
أين أذهب وتمزقت صمامات قلبي ؟
أين تتركني ذكريات حبي له ؟
أين تنير عيني برويتك وقد رحلت دون وداعي ؟
أين ذهبت ابتسامتي التي طالما عشقتها ؟
أين الفرح وقد أتى الحزن بابي ؟
أين النور لم أعد أراه ؟

مرت ساعات وأنا واقف منتظر أن حد يخرج ويظمني عليها، وأخيراً فتحت عمي الباب وطلب مني أدخل وقال أنها فاقت وعائزاني، وقالني أنهم هيجهزوا غرفه العمليات عشان هيعملها عملية قيصره لأن الولادة طبيعية هتكون خطيرة وصعبه عليها، دخلت وقربت منها ودموعي مش راضيه تنتهي، فحركت ايديها في اتجاهي كانت عايزة تمسحي دموعي، فمسكت ايديها وقربتها مني ومسحت دموعي بايديها، كانت بتحاول تأخذ نفسها بالعافيه وهي بتقول: - أحمد حبيبي، عايزة أشوف بابا، وأدهم..

حاولت أتماسك، لأن عرفت أنها عايزة تودعهم هم كمان:

- حاضر، هتصل بيهم، أنتي بخير، فاهمني، أنا بحبك.

- أنا كمان بحبك، وأنت عارف قد أيه أنا مستعدة أحارب الدنيا كلها بس عشان أكون معاك، ومستعدة أفضل أحارب لأخر نفس، أنت عمري كله.

قالتها وأتألمت جامد وغمضت عينيها، عمي فهمني أن ده طبيعي لأن قلبها منهك بسبب الحمل، خرجت الموبايل من الجاكت وأتصلت بيهم وطلبت منهم يجوا، وطبعاً صوتي فهمهم أن حالاتها خطيرة، خلصت معاهم وقربت منها:

- بابا وأدهم في السكه، عشرة دقائق وهيكونوا هنا.

وبدأت هينار تتألم وصوت ألمها يشتد، كانت بتبكي، بصت لي وقالت وهي بتحاول تتماسك:

- آآآآه، حبيبي، أنت هتنفذ أتفقنا، هتعيش وتربى ولادنا في
حضانك وهتفتكرنى دائماً، وهتعرفهم قد أيه أنا كنت بحبهم،
عايزاك تعيش وتتجوز، لأن الحياة هتستمر حتى بعد موتي
فاهم، وإلا هزعل منك، ولازم تعرف أنك مش ممكن تقابل
واحدة، تحبك قد ما أنا حبيتك، لكن الحياة لازم تستمر..
حطيت رأسي علي كتفها وأنا ببكي بحرقه:

- مش هتموتى، أنتي هتكوني بخير، ربنا موجود وهيحميكي،
ومش هيبعدك عني ثاني، لأنه عارف أني بحبك.
الباب أتفتح ودخلوا أثنين، وبمجرد ما لمحتهم، هتفت
بصوت ضعيف:

- بابا، أدهم، وحشتوني، أنا حبيت أشوفكم قبل ما، أدهم،
أنت ليه ساكت.

كان أدهم بيبيكي ولأول مرة يكون مش عارف يرخم عليها:
- أنتي بخير، أنا بحبك يا أطيب أخت في الدنيا، أن شاء الله
هتكوني بخير والولاد كمان.

عمي كان حزين وبيبيكي وده كان بيقتلني، لأن أنا السبب في
اللي حصلها، قرب منها وقال:

- حبيبي، أنتي أقوى مننا كلنا، ولازم تعرفي أني فخور بيكي،
وأنك أنتي اللي هتربي ولادك.

كانت بتتألم وبتتنفس بصعوبة :

- الحياة مش أنى أكون معاكم في الدنيا، أنا هعيش في عيون
ولادي وهكون معاكم دائماً، وروحي هتفضل معاكم، أنا

بحبكم كلكم، بابا، خذ بالك من أحمد كأنه أنا، وأنت
كمان يا أدهم أعمل معاه كل اللي كنت بتعمله معايا، مش
عايزاه يعيش وحيد.

قرب منها أكثر وملس علي شعرها:

- أحمد ابني، مش عايزك تقلقي عليه، المهم أنك تقومي
بالسلامة .

دخل عمي علينا، خلاص كده جهزوا غرفة العمليات، كان
متوتر وهو بيقول:

- غرفة العمليات جهزت، لازم نجهز هينار للعملية.

حسيت بالرعب من اللي ممكن يحصل، كنت حابب تفضل
معايا أكثر:

- طيب، مش ممكن نأجلها.

- صعب يا أحمد، كل ساعة بتمر، الخطورة بتزيد.

بصت لي وهي بتبتسم رغم كل ألمها ومسكت ايدي:

- أحمد أنا بحبك وهفضل أحبك، نفسي أعيش معاك عمر

ثاني، خذني في حضنك وضمني قوي، عارف، معاك بحس

بالأمان، بحس أنى عايشه، ساعني لو بعدت، البعد مش

بايدي، أحمد، أضحك عايزة أسمع ضحكك، لأخر مرة،

وأوعدني أنك مش هتضعف، وولادنا أمانه، أنا بعشقتك

وهفضل أعشقتك لأخر نفس، وهستناك هناك.

ضمتها بقوة وأنا حاسس بالموت بيحاول يخطفها مني:

- أنتي كمان لازم تسامحيني لو ضعفت، هيكون غضب عني،
أنا بحبك أكثر من نفسي، هستناكي تخرجي من العمليات،
ونكمل حياتنا سوا، لا إله إلا الله.

ردت بصوت ضعيف:

- محمداً رسول الله.

دخلت هينار غرفة العمليات ووقفت برا والكل معايا،
ويحاولوا يتماسكوا، وبعد مرور نص ساعة، بدأت ماما
تسأل عن أهل هينار، كانت مستغربه من لبسهم وكلامهم،
أتأخرت كثير علي ما لحظت:

- هو مش غريبة أن دول يكونوا بدو، شكلهم من هنا.

رد بابا عليها وهو حزين علي حالي:

- بعدين يا مديحه، الوقت مش مناسب.

- وأمتي أسأل، لما تموت؟!!

كلامها طعن قلبي فصرخت في وشها:

- كفايه، أرجو كي كفايه، عايزة تعرفي أيه، تبقى مين؟!
هي حبيبتني، عمري كله، وحلمي الي فجأة أتحقق ويهرب
مني، وخائف يضيع.

مسكني جدي وبدأ يمسح دموعي:

- أحمد، خلاص يا ابني أهدي، أن شاء الله خير.

قعدت علي الأرض وفضلت أبكي كانوا يحاولوا يهدوني
لكن صعب، الدقائق بتمر كأنها سنين، وأخيرا سمعنا صوت
صراخ طفل والكل حمدوا ربنا، بس أنا كان يهمني أظمن

عليها الأول، حبيتي الي ضحت بحياتها، وقفت وفضلت اراقب الباب، معقول تتخلي عني وأعيش لوحدي وفي مقابل حبيتي أهتم باثنين مش عارف إذا كنت هجهم ولا لا، دقائق وخرج عمي كان حزين ومتردد وكأن في حاجه حصلت لحبيتي، مسكت ذراعه:

- هينار، عامله أيه ؟ كويسه.

- العملية نجحت، والولاد بخير.

فرحوا كلهم وبابا قال:

- ولاد ولا بنات.

- ولاد، ويشبهوا أحمد كثير.

فمسكته بقوة:

- أنا بسألك، هينار عامله أيه ؟ هي بخير، صح، هينار بخير، أنت قولت أنها هتكون بخير.

كان بيتكلم وهو حزين:

- أنا أسف يا أحمد، هينار دخلت في غيبوبة، ومش عارف أمتي ممكن تفوق منها، ممكن تفوق منها في خلال أيام وممكن بعد شهور وممكن بعد سنين، وممكن تفضل في غيبوبة، على طول، أنا بجد أسف.

كلامه صدمني والدنيا بدأت تلف بيه وفقدت الإحساس بالعالم، كل اللي حاسس بيه هو الموت الي حوليه ووقعت جوا بركان من نار وفضلت أصرخ، أصرخ لكن من غير صوت..

وقعت مغمي عليه ونقلوني للغرفة الي جنب العناية المركزة
الموجودة فيها هينار، وبعد ما كشفوا عليه، طلعت لسه
عايش يدوب ذبحه صدرية، خرج عمي يبلغهم بالموضوع
وهو بيكي:

- للأسف ذبحه صدرية.

صرخ بابا:

- لا، ابني، كده هيضع مني.

لكن باباها كان متماسك وقال:

- لا، أحمد هيكون بخير، كلنا معاه حتى هينار معاه بقلبها،
ولادنا هيكونوا بخير، أحمد وهينار هيعيشوا وهيربوا ولادهم.
وصل أسر وإسراء وهما شيلين ولادنا، تبارك الله فيما خلق،
يشبهوني كثير، قرب جدي منهم:

- أحفادي، معقول، ما شاء الله.

- تبارك الله فيما خلق، ربنا يحميهم.

الكل نسيوا الحزن والهلم للحظات لكن الواقع المرر جمعهم
بسرعه، لأنني أنا كمان دخلت في غيبوبة بسبب وضع قلبي،
ثلاث أيام، وأنا غائب عن الوعي وفي اليوم الرابع، فتحت
عيني كنت في غرفة غريبه وفي أجهزة كثير وأسلاك وفي ألم
رهيب في صدري، حاسس بأن قلبي بيتمزق، هينار حبيبي
فين، لا، وفضلت أنادي بصوت ضعيف مهزوم:

- هينار، هينار، هينار،

صوت عمي وقفني:

- لسه نائمه، تحب تشوف الولاد.
- فحركت رأسي للناحية الثانية وغمضت عيني ودموعي بتجري كأنها بتتسابق، خرج عمي ودقائق وحسيت بايد علي كتفي، كان والد هينار ومعاه أدهم وكل واحد منهم شايل ولد من ولادنا، ومسح دموعي وقال:
- أحمد، هينار معانا، وهتفضل معانا.
- انهرت أكثر:
- أنا عايزها هي، أنا بحبها هي.
- قرب أدهم مني وقال:
- وهي موجودة معانا، سليم وسامر جزء منها.
- دموعه فوقتني من اللي أنا فيه، مش أنا الوحيد الحزين لفراقها:
- أحمد هينار محتاجه وجودك يا ابني، وأنك تأخذ بالك من ولادكم، ولادها اللي أتحرموا من حبها، لازم ترعاهم وتأخذهم في حضنك لأنها موجودة وحاسه بيك وبيهم، ولا عايزها تزعل منك.
- لا، يا عمي، الموت أهون من أنها تزعل مني، لكن صعب أعيش من غيرها، هينار مش بس حبيتي دي كل حاجه ليه، أنا محتاجها.
- ابتسم أدهم ابتسامه بها كثير من الألم:
- صعب علينا كلنا، لكن المهم أنها تكون سعيدة، أفتح ايديك وخذهم في حضنك وضمهم وأحميهم.

وحطوا الولاد جنبني وفي حضني، لمحت فيهم برائتها، ضمتهم لصدري وغمضت عيني لقيتها بتضحك، فتحت عنه أختفت، غمضت ثاني لقيتها فرحانه وبتضحك أيوة سامع صوت ضحكتها بيرن جوايا، فضحكت، هينار معايا يمكن لأنهم في حضني، مش هسيبهم ثاني أبداً، ورفضت أنهم يبعدوا عني، بدأت أتحسن، وأول حاجه عملتها أني صممت أروح أشوفها وأقعد جنبها يمكن تسمعني وتصحي، وكل يوم كنت بأخذ الولاد وأروح أقعد جنبها وأسمعها صوتهم، مش ممكن تكون سمع صوتي ومش عايزة ترد عليه، أكيد هي مش سمعاني، أسبوع وأنا بحاول أنها ترجع ليه، ومستعد أفضل عمري كله جنبها لحد ما تصحي، أيوة حبيتي نائمة وهتصحي، وأخيرا عمي سمح لي بالرجوع للبيت، لكن مستحيل اسيبها لو حدها، فطلبت من عمي أنه يشتري الأجهزة اللي هي محتاجها ويجهز بيها غرفتنا في البيت وينقلها هناك جنبني وجنب ولادها، وفعلاً في خلال يومين كنا رجعنا لبيتنا ولغرفتنا ولذكرياتنا سوا..

وكل يوم أقول هتصحي وأستني وتفضل نائمه، شهرين وأنا مستني ودموعي مش بتفرقني، نسيت طعم الراحة والسعادة والأمان، وإذا هي كانت محبوسة جوا غيبوبه أنا كمان كنت محبوس مش بخرج، كنت بخاف أبعد عنها تفوق وتزعل مني، كنت خائف حد يأذيها أو يقول كلمة تجرحها..

وفي يوم من الأيام اللي بقيت كلها نسخة واحده، بعد

الولاد ما ناموا، مددت جسمي جنبها وأتمنيت أنها تفتح
عينها وأشوف ابتسمتها وأسمع ضحكتها، حلم صحيت
منه علي صوت صراخ الولاد، خرجت لقيتهم مغلبين البيت
برا، الغربية أنهم بمجرد ما يسمعوا صوتي بيسكتوا ويطلوا
عياط، ولاد المجنونة،

حصل اللي كنت عارف أنه هيحصل بس كنت فاكر أن
لسه بدري عليه، خلاص هم قرروا موت هينار وعازيني
أبعد عنها وأنساها بس ده مستحيل، كلام ماما جرحني لأنها
عرفتني، أن بعد هينار مش هلاقي حد يحس بيه:
- هينار أنتهت، أنساها وعيش حياتك، ولا تهفضل منتظر
رجوعها كثير.

كنت غضبان من كلامها:

- أنا هستناها، لأخر عمري.

- كلام، مجرد كلام، هي مين اللي هستناها لأخر عمرك؟!

- روحي وقلبي وكياني كله، حب عمري، أنا حبيتها وبحبها
وهفضل أحبها.

ضحكت ضحكة كلها سخرية من مشاعري:

- بجد، ضحكتني، ولولا نسيته، السكرتيرة، مش قولت
أنك بتحبها وقدرت تبعد عنها، ولا نسيت وقدرت كمان
تعيش مع غيرها، مع هينار..

قطع بابا كلامها بغضب:

- كفايه بقي، أنتي أيه عايزاه يتعب ثاني، حرام عليك.

أتحركت كام خطوة وبصيت لولادنا وأفتكرت أول مرة قبلتها، وأول مرة دخلت عليه المكتب وضحكها وصوتها، وأفتكرت الاسم اللي كان في العقد لما كنت بوقع عليه، كان هينار ولم سألتها قالت أن لولا اسم والدتها ولأنها ماتت وهي صغيرة وهي بتشبهها كثير، بقي اسمها، وأفتكرت لحظه ما لمحتها وقفه علي السلم بالفستان الأبيض وهي مبتسمه، خرج كلامي من غير ما أحس:

- هينار هي لولا، لولا هي هينار، حبيتي وروح قلبي.

ظهرت الدهشة علي الجميع ماعدا حسين اللي عرف بمجرد ما شافها أنها هي، لكن قرر أنه يسكت، لكن خلاص وقت السكوت أنتهي، وبكل اندفاع قال:

- أنا كنت عارف، أنها هي.

قربت منه مروة وهي مذهوله:

- عارف، طيب ليه ما قولتش.

و طبعاً إسرائ وشذا وأسر وضحوا حيرتهم وذهولهم في كلمات بسيطة :

- معقول، لولا هي هينار.

- معني الكلام، أنها لعبت دور البدوية وكانت بتراقب أحمد.

- مش ممكن، أنا مش ممكن أصدق.

كنت ببكي حزن علي فراقها، كنت ضايع من غيرها:

- هي دي الحقيقة، أنا حبيتها، وهي دلوقت بتروح مني،

وأنا مش عايز أرجع ثاني وحيد، مش عايز، لأنني مش هقدر

أعيش من غيرها.

ماما شدتني بعنف من ايدي وبكل غضب قالت:
- مش ممكن ، أنت بتقول أية؟! أنت بتكذب، لولا خرجت
من حياتك، أنت أكيد حصل لعقلك حاجه.
فضحكت ضحكة كلها دموع وحزن وسخرية من كلامها:
- لا يا أمي، هينار هي لولا، الأثنين شخص واحد.
رد عليه بابا وهو قلقان ليكون الحزن أثر علي عقلي:
- مين ممكن يصدق؟! الموضوع صعب ومستحيل.
كان لازم أشرح الي حصل والي عملته العنيدة، ونطقت وأنا
بيكي وبتألم:

- لكنه الحقيقة، صعب أنكم تصدقوا، لكن هي دي الحقيقة...
الموضوع بدأ لما حسين عرفكم علاقة الحب الي بينا، ولما
رجعت من الشركة طلبتوا مني أن أنساها، أتصلت بيها
وطلبت منها تبعد عنى لأن صعب أتحمل أنكم تجرحوها،
كان صعب عليه أني أختار بينكم، كنت بموت لكن ساكت،
وكلكم كتتم بتتفرجوا عليه إلاهي، أنا فكرت أنها أختفت
للأبد من حياتي، لحد ما لمحتها بالفستان الأبيض، كنت
طائر من الفرح وعرفت منها أنها كان صعب عليها تبعد
عني، فقررت أنها تدافع عن حبها وتتغلب علي رفضكم
ليها، لأنني استسلمت لمرضي وحاولت أرضيكم وبعدت
عنها، لكنها عارفة أني صعب أتحمل البعد وهموت، كانت
بتعرف أخباري من سوزان ولما عرفت برحلة العريش،
سافرت وخطت لكل حاجه مع أدهم أخوها، مجنونة لكن

عنيذة وقوية، فضلت ترقبني لحد ما عرفت تحركاتي بالكامل والأماكن اللي بروحها، خططت تتجوزني حتى من غير موافقتي، لعبة البدو، لعبت دور البدوية الغريقة لأنها عارفة أنني هحاول أساعدها وكم إن عارفة أنى هتعب وفعلاً تعبت وساعدتني، ولما وصلنا الشاليه كان أدهم أخوها منتظر الإشارة، ولما جهزت كل حاجه رنيت عليه فقرب من مروة وأتكلم عن البدو وأنهم بيخطفوا الرجاله، وأنه من نص ساعة واحد دخل شاليه ومعه بدوية وقال رقم الشاليه، طبعاً مروة غضبت ودخلت الشاليه وشفت لولا، أقصد هينار معايا فغضبت وصرخت بصوت عالي، واتهمت البدو أنهم وحشين والناس بداءوا يدخلوا وأخواتي والبدوي اللي دخل والثاني كمان كانوا أصدقاء أدهم أخوها، وكل ده كان لعبه والحل أنني أتجوزها، أنا كنت يأس وحزين، فكرت أنها ضاعت مني وأني ختتها، لكن يوم الفرح اكتشفت أنها لولا حبيبتني، هي حبتني ودفعت صحتها وعمرها ثمن حبها، أنا السبب، مستحيل أقدر أنساها أو المس غيرها، أنا ملكها هي، فاهمين، مستحيل أكون لغيرها أبداً مهما كان الثمن، أنا محتاجها تكون معايا، حد يقولها أني تايه من غيرها، حد يفهمها أني بموت وهي بعيدة عني، أنا بموت كل يوم وكل لحظة من غيرها.

خلصت كلامي وفقدت السيطرة، وقعت علي الأرض، مسكني حسين ورءوف وأسر، وبرغم ذهولهم من كلامي،

كانوا مستغربين أكثر من حبها ليه، معقول أنها حبتي لدرجه أنها تنسي العادات والتقاليد الموجودة في مجتمعنا الشرقي، أنها تتخطي كل الحدود والأعراف، حد يقولها أي تايه من غيرها..

عندهم حق، يرفضوا أنهم يصدقوا الي عملته لولا، لأن البنت الي عاشت مستسلمة لمعتقدات مجتمعها وتقاليد حتى لو كانت التقاليد بتجردها من أغلى الأشياء الي تستحق الحياة، الحب، صعب أنها ترفض ده كله وتثور وتفوز بحبها، مع أي أنا الرجل والمعروف أن الرجل هو مصدر القوة، وكل عائلي كانت بتعتمد علي وجودي، أزي استسلمت للظروف والعقبات، ووقفت ثابت، لا عارف أهاجم ولا حتى عارف أدافع، وقبلت بالأمر الواقع، واقع مضحك..

الأيه اتقلبت البنت بتناضل والرجل بيقف مستسلم للواقع، اسأله كثير جواهرم وجوايا عن العنيدة الي بحبها، أيه هو سر قوتها؟ معقول الحب هو الي مدها بالقوة الي تحارب بيها؟ طيب ما أنا بحبها ليه فضلت ساكت، أزي أقدر أنسي الي عملته وأعيش من غيرها، وليه هي الي تدفع الثمن وتموت، أنا الي المفروض أموت مش هي..

ساعدني حسين ورءوف أي أقف، وسبتهم ودخلت غرفتنا، كانت نائم، ملاك برئ، مددت جسمي جنبها وملست علي شعرها ودموعي بتغرقه، حطيت رأسي علي صدرها وضممتها وغمضت عيني..

لقيت نفسي هناك في الغردقة في المكان اللي كنا بنجري ونلعب فيه سوا، كانت وقفة وبتضحك وشعرها بيطير زي موج البحر قربت منها وشدتها لحضني وضمتها بكل قوتي، صوت ضحكها كان عالي، وبعدين فلتت من حضني وجريت وطلبت مني الحقتها، وكل ما أقرب تبعد، وفضلت المسافة تزيد، وتزيد، لحد ما دخلت البحر ووجهت نفسها لسفينة بعيدة في البحر وفضلت أنادي وأصرخ، هينار، لولا، لكنها فضلت تدخل وتدخل، وفضلت أنا أصرخ وأجري عليها لكن كأنها مش سمعاني، وفجأة أختفت هي والسفينة، ووقعت علي الرمله وفضلت أصرخ وأنادي عليها، أختفت كأنها سراب..

وفجأة حسيت بايديها علي كتفي فلقيتها ورايا، كانت بتضحك، أزاي رجعت، يمكن أفكرتني ورجعت تأخذني معاها، روحي رجعت لي وفضلت ماسك أيديها ومشينا سوا وكانت بتضحك، خلاص حبيبي معايا وهنفضل سوا للأبد..

وفجأة سمعت صراخ ساهر، فصحيت وجريت عليه، كان جعان أكلته ونام وحطيته جنب أخوه، كل اللي كان شاغلني هو ليه أنا صحيت من حلمي، وهي لا، ومش بعيد تكون خائفة لأنها لوحدها وأنا مش معاها، العالم كله مش ممكن يعوضني عنها، هينار هي العالم اللي بتتمي ليه..

مرة ثانية نمت جنبها وضمتها، وفضلت أفكر فيها، حبيبي

يمزقني فراقك، بتكتب دموعي رسالة علي خدودك مشتاقه ليكي، مفيش حد ممكن يفهم يقرأها غيرك، بتنفس وأنفاسي بتسكن صدرك، كل دقة في قلبي بتصرخ باسمك، عيوني مشتاقه لعيونك، صوتك وحشني، حياتي أنتهت ببعذك، مين ممكن يحس بيه، مفيش ورق ولا حبر ممكن يكفي لوصف عذابي، بيتفتت الكلام جوايا وبتتمزق الروح من فراقك، أنتهيت وماتت روحي معاكي وأجسامنا لسه عايشة، حلفتك برب الكون ترجعيلي، يا الله فراقها بيدمرني وهي الي كانت بتهتم بيه، وحيد في البعد، إذا كان موتها هو قضاءك فخذني معها، أتوسل إليك، لا تأخذها مني يا رحيم يا مجيب الدعاء، ساحمني يا الله لا أقصد الاعتراض علي حكماً قد حكمته ولكني لا أريدها أن ترحل..

وغمضت عيوني ونمت، هناك في الأحلام بتكون معايا ويكون معاها..

والآن ننسي أحمد المنتظر عودت حبيبته ونحاول نتخيل النهاية، ستختلف النهاية من قارئ لأخر، حيث سيتغلب على البعض الشعور بالتفاني فيجعله يعيش وحيداً على ذكراها، والبعض شعور النهاية السعيدة فتستيقظ وتبتسم لهم الحياة من جديد، والبعض يرى موتها هو النهاية ويتزوج هو من أخرى، فالحب كلمه معناها قد دمر، وأقول لك هنا عزيزي القارئ والقارئة...،،،.

مهما كانت النهاية فهي مرتبطة برأيك في هذا العالم، هل العالم أبيض أم أسود أم مزيج من الحب والكراهة، السعادة والحزن، الضحك والبكاء؟! فلو لم تبكى لما قدرت قيمة الضحك تلك هي الحقيقة..

هل ترى الحب الحقيقي أم لا؟ هل مر على قلبك أم لا؟ هل أحببت بصدق؟ هل بكيت لفراق الحبيب؟ هل توصلت لربك أن يجمعك به؟

وهل على الإنسان أن يكتفي بالدعاء دون العمل؟! هل من الصائب الاستسلام لعقبات الحياة؟ هل سنكتفي بالوقوف دون التحرك أمام قطار الحياة؟ أم سنحارب من أجل غداً أفضل من أجل أبنائنا وأحفادنا؟

هل الرجل فقط من يستطيع النضال؟ وعلي المرأة السكون فقط، لا، فالمرأة قوة لا يستهان بها، هل يعقل أن تكون هي المخلوقة الضعيفة التي لا تستطيع التفكير وحدها فتكون لديها أعاقه ذهنية مثلاً فتحتاج لمن يفكر عنها ويتخذ

القرارات بدلاً منها فيتم تعيين الرجل من قبل المجتمع واصى عليها..

أن أحبت لاموها وأن تزوجت حكموها وأن طلقت علقت لها المشانق وأن لم تتزوج طعنت بسهام الكلمات الجارحه أما الرجل أن أحب فحقه ولكن أليس من المفترض أن تبادل له الحب، وأن تزوج يمكنه مصاحبه من يريد والتكلم مع من يريد وأن يفعل ما يريد فهو رجل لا يعيبه شيئاً مطلقاً من التي سيصاحبها أليست امرأة هي الأخرى، وأن طلق فألف من تتمناه حتى البكر الرشيد وأن لم يتزوج هو حر لم يجد من تناسبه أو ربما لا يريد، أليس هذا مضحك !

الحب لا يفرق بين رجل وامرأة، الحب هو البذرة التي يجب أن تروى بالدماء لكي تثمر عالماً ملئ بالسعادة، فالحب أهم من الخوف بل وأصعب، نعم، فمن السهل أن تجعل الناس تخاف منك ولكن من الصعب أن تزرع حبك داخلهم ؛ لأن من يزرع الحب داخلنا هو رب الوجود الخالق الذي بدع الحب ومن أوامره أن نحبه فأن أحبته فعلت ما يرضيه، الحب تضحية لتسعد من تحب، فرحتك في ابتسامته وألمك في حزنه..

تخيلوا خلية المجتمع وهي الأسرة تبني علي شهوة الجسد والمال، فهل تستطيع تلك الخلية أن تنتج جيلاً يبني مجدداً ويستطيع أن يصمد أمام عقبات الحياة..

لا.. لا يمكن..

لا أريد أن تملوا منى ولكن أريد أن نفكر معاً لنصل لبراً
نرتمي به من كل الإدعاءات الكاذبة بأننا نعيش في مجتمع
صادق ينظر للحب وللمرأة نظرة صائبة وليس بأن الحب
كلمة والمرأة جسد وشهوة، فالرجل ليس مجرد من المشاعر
كما يعتقد البعض ولكنه يتصنع اللامبالاة بالمشاعر فقط لأنه
ربي علي ذلك، فمن المذنب الرجل أم المرأة أم الاثنان معاً؟
من منهما سبب انهيار المجتمع؟! وضياع أجيال لا تقوي
علي محاربه أنفسها فما بالك بالغير..



أسفه نسيت أقولكم في يوم صحي أحمد، وكانت لولا
أقصد هينار صاحيه وبتضحك وده بعد ثلاثة شهور بس،
لأن من يدعوا ربه بقلب سليم، لن يتركه أبداً وسأترك
إليكم الباقي..

تم
بِحَمْدِ
اللَّهِ



دار لوتس للنشر الحر

مصرية مغربية، تأسست في مايو 2017

www.lotusforpub.com

رقم الإيداع

0000000000

ISBN

000000000000

جميع الحقوق محفوظة للمؤلف
